

**କରନ୍ତି ମଣ୍ଡଳୀ ନିମନ୍ତେ ପାଠଲଙ୍କ ଲିଖିତ  
ପ୍ରଥମ ପତ୍ର  
କରନ୍ତି କୁଲମିତାକି ପାଞ୍ଚୁଲ ରାଢ଼ାମାନି  
ର ଲମ୍ବର ଆକୁ  
ମୂଲ୍ୟ ହାତୀ**

କରନ୍ତି କୁଲମିତି ର ଲମ୍ବର ଆକୁ ପାଣ୍ଡୁଆହାମାନି ପାଞ୍ଚୁଲ ତାଣ୍ଡାଟି ଜୀସୁ କ୍ରୀସ୍ତତି ଜାର୍ନାତି ୫୫ ବାର୍ଷୀ କେତ ରାସ୍ତି ଆହାମାତେ ୧:୧  
□ ପାଞ୍ଚୁଲ ତାଣ୍ଡାଟି ରାସ୍ତି ଆହାମାନି ଜଡ଼େକା ଆକା ବିଦ୍ରାଟି ଇଦି ଆହିମାନେ ର ଲମ୍ବର ଆକୁ □ ଏଞ୍ଜାସି ଏପିସିୟତା ମାତିରେଲ୍ୟତା ଇ ଆକୁ ରାଢ଼ା ମାଣ୍ଡିତେସି ୧୭:୫-୯ □ ମାକିଦନିୟାଟି କରନ୍ତିତା ହାଜାଲି ମନ କିନି ନଟେଏ ଇ ଆକୁ ରାଢ଼ାମାତେସି □

ପାଞ୍ଚୁଲ ଇ ଆକୁତା କୁଲମି ଗତି ଗତି ଆନାୟି ଲାଗେଏତି କାମାତି ଜୁପ୍ତକା ତଲେ ହାରେକା ପାପୁ କାମା ଆହିମାନାଣି କୁଲମିତି ଲକୁ ତାଣ୍ଡାଟି ଝେଞ୍ଜାନା ଝେଣ୍ଣେ ଝେସାଲି ମନ ହାହିମାନେସି □ କରନ୍ତି ଗାଡ଼ା ଲାଗେଏ ପରେଏ ପାପୁ କାମାୟା କିହିମାନାୟି ଝେଞ୍ଜାମାତେ □ ଇଞ୍ଜା ଗାଡ଼ାତା ମାତି କୁଲମି ହାରେକା କାଞ୍ଜାଲ୍ୟା ଆହିମାତେରି □ ଏଦାଆଁ ଅଣ୍ପାମା ଏଞ୍ଜାରାକି ତିନା ଉନାଣି, ବୀହା ଆନାଣି ଅଡ଼େ କିନାଣି, ହାକି ଅଡ଼େ ଝେଣ୍ଣେ ନିଞ୍ଜିନାଣି, ସାତା ଜାଞ୍ଜୁନନାୟି ଏନାୟି ଇ ବାରେ କାତା ଆକୁତା ରାଢ଼ାନା ତସାମାନେସି ୧୩ □

**ପତିତା ମାନାୟି**

- ୧ ଜହରା କିହାନା ପୁଣ୍ଡିକିନାୟି □ ୧:୧-୯
- ୨ କୁଲମିକା ଗତି ଆନି କାତା ଜାପ୍ତନାୟି □ ୧:୧୦-୪:୨୧
- ୩ ଲାଗେଏତି ପାପୁ କାମା ଅଡ଼େ ଦାଞ୍ଜାକିନି କାତା □ ୫:୧-୭:୨୦
- ୪ ବୀହା, ପେଣ୍ଡକା ବମାୟାତି ବଗ୍ଗୁ, ଜାରୁ ଆହାନା ପ୍ରାଡ଼ାନା, ସୁଦୁଜୀଞ୍ଜୁତି ଦାନା, ଇଞ୍ଜା ଝେଣ୍ଣେ ନିଞ୍ଜିନି କାତା □ ୭:୧-୧୫:୫୮
- ୫ ଲେମ୍ବିନି କାତା, ଜାହାରା ଅଣ୍ପୁ ଇଞ୍ଜା ରାପ୍ତନାୟି □ ୧୬

୧ ନାନୁ ପାଞ୍ଜୁଲ, ମାହାପୁରୁତି ମନତଲେ କ୍ରୀସ୍ତ ଜୀସୁ ତାଣାଟି ଆଚାନା ପାଣ୍ଡୁଓ ଆହାମାନାତେଏଁ, ଅଡ଼େ ମା ତାୟି ସସ୍ତିନା ତଲେ,

୨ \*କରକ୍ତି ଗାଡ଼ାତା ମାନି ମାହାପୁରୁ କୁଲମିତାକି ଇ ଆକୁ ରାଟିମାନେରି; ଆମିନି ବାରେଜାଣା ଏଞ୍ଜାରିତାଣା, ପ୍ରବୁ ଜୀସୁ କ୍ରୀସ୍ତ ଦରୁତଲେ ପ୍ରାଡ଼ାନା କିହିମାନେରି, ଏଞ୍ଜାରିତଲେ କ୍ରୀସ୍ତ ଜୀସୁ ତାଣା ସୁବୁ ଆହାନା ହାଟ୍ଟକି ଆହାମାନି ମାହାପୁରୁ ଲକୁତେରି ମୀରୁ □

୩ ମିଙ୍ଗେତାକି ମା ଆବା ମାହାପୁରୁ ଅଡ଼େ ପ୍ରବୁ ଜୀସୁ କ୍ରୀସ୍ତ ତାଣାଟି କାର୍ମାମେହନାୟି ଅଡ଼େ ହିଡ଼ଡ଼ି ଆପେ □

### କ୍ରୀସ୍ତ ତାଣାଟି ବର

୪ କ୍ରୀସ୍ତ ଜୀସୁ ତାଣାଟି ମିଙ୍ଗେ ହୀହାମାଞ୍ଜାନି ମାହାପୁରୁତି ଆମିନି କାର୍ମାମେହନାୟି, ଏଦାଆଁତାକି ନାନୁ କାଲେଏ ମିଙ୍ଗେତାକି ମାହାପୁରୁଇଁ ଜହରା କିହିମାଇଁ,

୫ ଏନାଆଁତାକି ଇଟିହିଁ ଏଞ୍ଜାଣି ତାଣା ବାରେ କାତାତା, ହାରେକା କିହିଁ ବାରେଲେହେତି ଜାପୁନି ତାଣା ଅଡ଼େ ବାରେଲେହେତି ବୁଦିତା ମୀରୁ ଗାଡ଼ି ବାଡ଼କା ମାଞ୍ଜେରି;

୬ ଇଲେଆହିଁ କ୍ରୀସ୍ତତି ସାକି ମୀ ତାଣା ତୀରି ଆହାମାନେ □

୭ ଇଦାଆଁତାକି ମୀରୁ ମା ପ୍ରବୁ ଜୀସୁ କ୍ରୀସ୍ତତି ତଞ୍ଜା ଆହାଲିତାକି କାପୁ କାଚାନା ଏନି କାର୍ମାତି ଦାନାତା ଉଣା ଆହାହିଲଅତେରି;

୮ ମା ପ୍ରବୁ ଜୀସୁ କ୍ରୀସ୍ତତି ଦିନାତା ଏନିକିଁ ମୀରୁ ଦହ ହିଲାଆଗାଟାତେରି ଆଦେରି, ଇଦାଆଁତାକି ଏଞ୍ଜାସି ମିଙ୍ଗେ ରାନ୍ତି ଦିନା ପାତେକା ତୀରିକିହା ଇଟାନେସି □

୯ ମାହାପୁରୁ ନାମୁଗାଟାସି, ଆମ୍ବାଆରି ତାଣାଟି ମୀରୁ ତାନି ମୀରୁଏସି ଜୀସୁ କ୍ରୀସ୍ତ, ମା ପ୍ରବୁ ତାଣା ଆଣ୍ଡିନାଣାକି ହାଟ୍ଟକି ଆହାମାଞ୍ଜେରି □

### ନାମିତି କୁଲମି ବିତ୍ରା ଗଟି ଆନାୟି

୧୦ ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ମା ପ୍ରବୁ ଜୀସୁ କ୍ରୀସ୍ତ ଦରୁତଲେ ନାନୁ ମିଙ୍ଗେ ବାତିମାଲିମାଞ୍ଜାଇଁ, ଏନିକିଁ ମୀରୁ ବାରେଜାଣା ତେରି ରଣ୍ଡିଏ କାତା ଜଲିଦେରି, ଅଡ଼େ ମୀ ବିତ୍ରା ଗଟି

ଆଅତେରି, ସାମା ମୀରୁ ରଣ୍ଡିଏ ମନ ରଣ୍ଡିଏ ଅଣ୍ଡୁ ତଲେ କାଲ୍‌ଝି ଆଦୁ □

୧୧ ଇଚିହ୍, ଏ ନା ତାୟିୟା ଅଡ଼େ ତାଜିସ୍ମାତେରି, କ୍ଲୟିତି କୁଟମିଟି ମୀ କାତା ନା ତାଣା ଇଦି ତଞ୍ଜା ଆହାମାନେ, ମୀ ବିତ୍ରା ଗଡ଼ହା ମାନେ □

୧୨ \*ନାନୁ ଝେସ୍ତାନି କାତା ଇଦି, ମୀ ବିତ୍ରାଟି ଆମ୍ବା ଆମ୍ବାଆରି ଏଲେଇନେରି, ନାନୁ ପାଞ୍ଜୁଲ ଝାକି ତାତେଏ, ଇଞ୍ଜା ଆମ୍ବାଆରି ନାନୁ ଆପଲ ଝାକି ତାତେଏ, ନାନୁ କେପା ଝାକି ତାତେଏ ଅଡ଼େ ଏଚରଜାଣା ନାନୁ କ୍ରୀସ୍ତ ଝାକି ତାତେଏ ଇଞ୍ଜା ମାନେରି □

୧୩ କ୍ରୀସ୍ତ ବାଗା ଆହାମାନେସି କି ? ମିଙ୍ଗେତାକି ପାଞ୍ଜୁଲ କି ପାସି ମୁଣ୍ଡାତା ହାହାମାନେସି ? ଆଆତ ମୀରୁ କି ପାଞ୍ଜୁଲ ଦରୁତଲେ ବାପ୍ତିସ୍ମ\* ଅହାମାଞ୍ଜେରି ?

୧୪ \*ଇଦାଆଁତାକି କ୍ରିସ୍ତ ଅଡ଼େ ଗାୟ ପିସ୍ତପେ ମୀ ବିତ୍ରା ଆମ୍ବାଆରାଇଁ ଜିକେଏ ବାପ୍ତିସ୍ମ† ହାହାହିଲିଆଁ ଇଞ୍ଜା ନାନୁ ମାହାପୁରୁଇଁ ଜହରା କିହିମାଇଁ,

୧୫ ଏଡ଼େତା ମୀରୁ ନୀ ଦରୁତଲେ ବାପ୍ତିସ୍ମ‡ ଅହାମାଇଁ ଇଞ୍ଜା ଆମ୍ବାଆରି ଏଲେଇଞ୍ଜାଅରି □

୧୬ \*ଅଡ଼େ ସ୍ତ୍ରୀପାନତି କୁଟମିଇଁ ଜିକେଏ ବାପ୍ତିସ୍ମ§ ହାହାମାଇଁ; ଇଞ୍ଜାରି ପିସ୍ତପେ ନାନୁ ଅଡ଼େ ଆମ୍ବାଆରାଇଁ ବାପ୍ତିସ୍ମ\* ହାହାମାଇଁ ଇଞ୍ଜା ନା ଅଣ୍ଡୁତା ହିଲେଏ □

୧୭ ଇଚିହ୍ କ୍ରୀସ୍ତ ନାଙ୍ଗେ ବାପ୍ତିସ୍ମ† ହାହାଲିତାକି ପାଣ୍ଡାମାଞ୍ଜାଅସି, ସାମା ନେହ୍ କାରୁ ଝେସାଲି ପାଣ୍ଡାମାଞ୍ଜାନେସି; ଏଦି ଜିକେଏ ବଲୁଡି ରାହାଁ କିନି ତାଣା ଆଏ, ଏଡ଼େତା ପାଟେ କ୍ରୀସ୍ତତି ପାସିମୁଣ୍ଡା ଉଜେଏ ଆନେ □

କ୍ରୀସ୍ତ ମାହାପୁରୁତି ବାଡ଼ୟୁ ଅଡ଼େ ବୁଦି

☆ ୧:୧୨ ୧:୧୨ କାମା ୧୮:୨୪ \* ୧:୧୩ ୧:୧୩ମୁଞ୍ଜିନାୟି ☆ ୧:୧୪ ୧:୧୪ କାମା ୧୮:୮; କାମା ୧୯:୨୯; ରମି ୧୭:୨୩ † ୧:୧୪ ୧:୧୪ମୁଞ୍ଜିନାୟି ‡ ୧:୧୫ ୧:୧୫ମୁଞ୍ଜିନାୟି ☆ ୧:୧୭ ୧:୧୭ କେର ୧୭:୧୫ § ୧:୧୭ ୧:୧୭ମୁଞ୍ଜିନାୟି \* ୧:୧୭ ୧:୧୭ମୁଞ୍ଜିନାୟି † ୧:୧୭ ୧:୧୭ମୁଞ୍ଜିନାୟି

୧୮ ଇତିହାସ ନାସା ଆହିମାନି ଲକ୍ଷ୍ମୀତାକି ପାସି ମୁଣ୍ଡାତି କାତା ଉଦେଏତାୟି, ସାମା ଗେଲ୍‌ପି ଆହିମାନି ମା ବାରେଜାଣା ତାକି ଏଦି ମାହାପୁରୁତି ବାଡ଼ୁୟୁ ।

୧୯ ଇଦାଆଁତାକି ରାସ୍‌କି ଆହାମାନେ,  
 “ନାନୁ ବୁଦିଗାଟାରି ବୁଦି ନାସାଞ୍ଜି କିଇଁ,  
 ଅଡ଼େ ବୁଦିଗାଟାରି ବୁଦି ଅପଅଁ ।”

୨୦ ବୁଦିଗାଟାରି ଆମ୍ବିୟା ? ମେରା ଜାପନାରି ଆମ୍ବିୟା ? ଇ ଜୁଗୁତି କାତା କାଟଞ୍ଜିକିହାଁ ଖେହନାରି ଆମ୍ବିୟା ? ମାହାପୁରୁ କି ଦାର୍ତ୍ତିତି ବୁଦିଇଁ ଉଦେଏତାୟି ଇଞ୍ଜି ଖେସାହିଲଅସି ?

୨୧ ଇତିହାସ ମାହାପୁରୁତି ବୁଦି ତଞ୍ଜାଆହାମାତି ଜିକେଏ ଦାର୍ତ୍ତି ଜାହାରା ବୁଦିତଲେ ମାହାପୁରୁଇଁ ପୁନାଆତାକି ମାମ୍ବୁ ଖେକହାମାନି କାତା ଉଦେଏତାୟି, ଆଡ଼ିଜିକେଏ ନାମୁ ଗାଟାରାଇଁ ଗେଲ୍‌ପାଲିତାକି ମାହାପୁରୁ ଅଣ୍ଡପିତେସି ।

୨୨ ଇତିହାସ ଜୀହୁଦିକ୍ଷା ସିନା ପାରିନେରି, ସାମା ଗ୍ରିକ୍ ଲକ୍ଷ୍ମୀ ବୁଦିତି ପାରିନେରି ।

୨୩ ସାମା ମାମ୍ବୁ ପ୍ରାସି ମୁଣ୍ଡାତା ହାଡ଼ି କ୍ରୀସ୍ତତି କାତା ଖେକହି ମାନମି, ଏଞ୍ଜାସି ଜୀହୁଦି ଲକ୍ଷ୍ମୀତାକି ସାଡ଼ୁ ଲେହେଁତାସି ଅଡ଼େ ଜୀହୁଦିଆଆତି ଲକ୍ଷ୍ମୀତାକି ବୁଦି ହିଲାଆଲେହେଁ ।

୨୪ ସାମା ଜୀହୁଦି ଆପାରି କି ଜୀହୁଦିଆଆତାରି ଆପାରି, ଆମ୍ବାଆରି ହାଟ୍‌କି ଆଡାରି, ଏଞ୍ଜାରାକି କ୍ରୀସ୍ତ ମାହାପୁରୁତି ବାଡ଼ୁୟୁ ଅଡ଼େ ମାହାପୁରୁତି ବୁଦି ଲେହେଁ ।

୨୫ ଇତିହାସ ମାହାପୁରୁତି ବୁଦି ହିଲାଆଗାଟାୟି ମାଣସିୟାଁତି ବୁଦି କିହାଁ ହାରେକା ବୁଦି, ଅଡ଼େ ମାହାପୁରୁତି ଆଡାଆ ଗାଟାୟି ମାଣସିୟାଁତି ବାଡ଼ୁୟୁ କିହାଁ ହାରେକା ବାଡ଼ୁୟୁ ଗାଟାୟି ।

୨୬ ଏ ତାୟିୟାଁ ଅଡ଼େ ତାଜିୟା ମିଜେ ହାଟାମାନି କାତା ଅଣ୍ଡପାଦୁ, ଦାର୍ତ୍ତିତି ଲକ୍ଷ୍ମୀ ଅଣ୍ଡପୁ ଲେହେଁ ହାରେକା ବୁଦିଗାଟାରି, ହାରେକା ବାଡ଼ୁୟୁ ଗାଟାରି, କି କାଜା କୃତା ଗାଟାରି ହାଟ୍‌କି ଆହାହିଲଅସି;

୨୭ ଏଦାଆଁତାକି ମାହାପୁରୁ ବୁଦି ଗାଟାରାଇଁ ଲାଜା କିହାଲିତାକି ଦାର୍ତ୍ତିତି ବୁଦି ହିଲାଆଗାଟାଣି ଆଡ଼ିତେସି, ଅଡ଼େ ବାଡ଼ୁୟୁ ଗାଟାଣି

ଲୀଜା କିହାଲିତାକି ମାହାପୁରୁ ଦାର୍ତ୍ତିତ ବାଡ଼ୁୟୁ ହିଲାଆଗାଟାରାଈ ଆଡ଼ିତେସି □

୨୮ ଅଡ଼େ ଏନାୟି ଦାର୍ତ୍ତି ନକିତା ମାନି ଗାଟାୟି, ଏ ବାରେ ଉଜେଏ କିହାଲି, ମାହାପୁରୁ ଦାର୍ତ୍ତିତ ହୀଣି, ଇଞ୍ଜା ଅପାଆଗାଟାଣି, ହାଅ, ମାନି ହିଲାଆଗାଟାଣି ଆଡ଼ିତେସି □

୨୯ ଅଡ଼େ ଏନାୟି ଦାର୍ତ୍ତି ନକିତା ମାନି ଗାଟାୟି, ଏ ବାରେତି ଉଜେଏ କିହାଲିତାକି ମାହାପୁରୁ ଦାର୍ତ୍ତିତ ଉଣା ଅଡ଼େ ଅପାଆଗାଟାଣି ହାଅ ଉଜେଏତାଣି ଆଡ଼ିତେସି □

୩୦ ସାମା ଏଞ୍ଜାଣି ତାକି ମୀରୁ କ୍ରୀସୁ ଜୀସୁ ତାଣା ମାଞ୍ଜେରି, ଏଞ୍ଜାସି ମାହାପୁରୁ ତାଣାଟି ମାଞ୍ଜେତାକି ବୁଦି, ଇଚିହିଁ ଦାମ୍ବୁଗାଟାସି, ସୁଦୁଗାଟାସି ଅଡ଼େ ଗେଲ୍ପିନି ଲେହେଁ ଆହାମାନେସି □

୩୧ ଇଦାଆଁତାକି, ଦାମ୍ବୁପତିତା ରାସ୍ତକି ଆହାମାନେ, “ଆମ୍ବାଆସି ବତପଣ ଆନେସି, ଏଞ୍ଜାସି ମାହାପୁରୁ ତାଣା ବତପଣ ଆପାସି □”

## ୨

### ପାସି ମୁଣ୍ଡାତା କ୍ରୀସୁ ହାଡ଼ି କାବୁ

୧ ଏଦାଆଁତାକି ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ଏଚେତା ନାନୁ ମୀ ତାଣା ହାଜାମାଚେଏଁ, ଏଚିବେଲା ମାହାପୁରୁତି ତୁଗୁମାନି ସାତା କାତାତି ଗାଡ଼ି ବୁଦି ଗାଟାରିଲେହେଁ ମୀ ତାଣା ଝେକ୍‌ହାମାଚେଏଁ ଏଲେକ୍ ଆଏ □

୨ ଇଚିହିଁ ଜୀସୁ କ୍ରୀସୁ, ଇଚିହିଁ ପାସି ମୁଣ୍ଡାତା ହାଡ଼ି ଜୀସୁ କ୍ରୀସୁ ପିସ୍ପେ ମୀ ତାଣା ଅଡ଼େ ଏନାଆଁ ଜିକେଏ ପୁଞ୍ଜାଲି ଅଣ୍ପାଆତେଏଁ □

୩ ✱ଅଡ଼େ, ନାନୁ ବାଡ଼ୁୟୁ ହିଲାଆନା, ଆଜି ଅଡ଼େ ତୀରଗି ତୀରଗିହିଁ ମୀ ତାଣା ମାଚେଏଁ;

୪ ଇଦାଆଁତାକି ନା ଜାପ୍‌ନାୟି ଅଡ଼େ ଝେକ୍‌ନାୟି ମାଣ୍ଡସି ବୁଦିତି ନେହିଁ ହାଡ଼ାଲେହେଁ ଆଆନା ମାହାପୁରୁତି ସୁଦୁଜୀଞ୍ଜୁତି ବାଡ଼ୁୟୁ ତସ୍ପି ଆହାମାନେ □

୫ ମୀ ନାମ୍ନୁ ଏନିକିମ୍ ମାଣ୍ଡିୟାତି ବୁଦିତା ତୀରି ଆଆନା ମାହାପୁରୁତି ବାଡ଼ୁୟୁତା ତୀରି ଆନେ □

### ମାହାପୁରୁତି ବୁଦି

୬ ଆଡ଼ିଜିକେଏ ମାମ୍ନୁ ସୁଦୁଜୀଝୁତା ପାତାଆନି ବୁଦିଗାଟି ଲକୁତାଣା ବୁଦିତିକାତା ଝେହ୍ନମି, ସାମା ଏଦି ଇ ଜୁଗୁତି ବୁଦି ଆଏ, ଅଡ଼େ ଇ ଜୁଗୁତି ଗାଡ଼େକା ତାକି ନାସା ଆନି ସାଲୁଝି କିନାରି ବାଡ଼ୁୟୁତି ହାରିଝି କିନାରି ବୁଦି ଆଏ □

୭ ସାମା ନାମ୍ନୁ ଡ଼ଗୁମାନି ଲେହେଁତି ମାହାପୁରୁତି ବୁଦିତିକାତା ଝେସିମାଲ୍; ଏ ଡ଼ଗୁମାନି ମାହାପୁରୁ ବୁଦି ମା ଗାଝୁରମି ତାକି ଦାରତିତି ଗାଡ଼ି ଆଆ ନକେଏ ଆତାନା ଇଚକି ଆହାମାତେ □

୮ ଇ ଜୁଗୁତି ସାଲୁଝି କିନାରି ଜିକେଏ ଆମ୍ବାଆରି ଏଦାଆଁ ପୁଞ୍ଜାହିଲଅରି, ଏଦାଆଁତାକି ଇଚିହ୍ ଏଝାରି ଏଦାଆଁ ପୁଞ୍ଜାମାଟିହ୍ ମା ଗାଝୁରମିଗାଟି ପ୍ରବୁଲ୍ କୁସତା ପାୟାଆତେରିମା □

୯ ସାମା ଏନିକିହ୍ ଦାମ୍ନୁପତିତା ରାସ୍ତକି ଆହାମାନେ,  
 “କାମ୍ନୁ ଏମିନାଣି ମେସା ହିଲେଏ, କିୟ୍ ଏମିନାଣି ଝେଞ୍ଜା ହିଲେଏ,  
 ଅଡ଼େ ମାଣ୍ଡିୟା ହିୟାତା ଏମିନାଣି ଅଶ୍ପା ହିଲଅରି,  
 ଏ ବାରେତି ମାହାପୁରୁ ତାଙ୍ଗେ ଜୀଝୁ ନନାରାକି କିହାମାନେସି  
 □”

୧୦ ସାମା ମାହାପୁରୁ ମାଙ୍ଗେତାକି ସୁଦୁଜୀଝୁ ତଲେ ବାରେ ତସାମାଞ୍ଜାନେସି; ଏନିକିମ୍ ଏ ସୁଦୁଜୀଝୁ ବାରେ କାତା, ହାଅ, ମାହାପୁରୁତି ଡ଼ଗୁମାନି କାତା ଜିକେଏ ପାରିନେସି □

୧୧ ମାଣ୍ଡିତି କାତା ବାରେ ମାଣ୍ଡି ତାଣା ମାନି ଜୀଝୁ ପିସ୍ପେ ଅଡ଼େ ଆମ୍ବାଆସି ପୁନେସି ? ଏଲେକିହ୍ ଏ ମାହାପୁରୁ କାତା ବାରେ ମାହାପୁରୁ ଜୀଝୁ ପିସ୍ପେ ଆମ୍ବାଆସି ପୁନଅସି □

୧୨ ଏନିକିମ୍ ମାହାପୁରୁ ତାଣାଟି ମାଙ୍ଗେ କାର୍ମାମେହ୍ନି ତାଣାଟି ହାପକି ଆହାମାନି କାତା ବାରେ ମାର ପୁଞ୍ଜାଲି ଆଡ଼ିନାୟି, ଏଦାଆଁତାକି ମାର ଦାରତିତି ଜୀଝୁ ପ୍ଲାଝଆନା ମାହାପୁରୁତି ଜୀଝୁ ବେଟା ଆହାମାନାୟି □

୧୩ ଏ ବାରେ କାତା ଜିକେଏ ମାର ମାଣ୍ଠିତି ବୁଦିତି ଜାପାମାନି ବଲୁ ତଲେ ଝେସିହିଲାଆୟି, ସାମା ସୁଦୁଜୀଝୁତି କାତା ବାରେ ସୁଦୁଜୀଝୁତି କାତାତଲେ ତେଲହି କିହାନା ସୁଦୁଜୀଝୁ ତଲେ ଜାପାମାନି ବଲୁ ତଲେ ଝେସିମାନାୟି □

୧୪ ସାମା ଦାରତିତି ମାଣ୍ଠି ମାହାପୁରୁତି ସୁଦୁଜୀଝୁତି କାତା ବାରେ ଅପଅସି, ଏନାଆଁତାକି ଇଚିହିଁ ଏ ବାରେ ତାନି ନକିତା ଉଜେଏତାୟି, ଅଡେ ଏଝାସି ଏ ବାରେତି ତେଲହାଲି ଆଡଅସି, ଇଚିହିଁ ଏ ବାରେ ସୁଦୁଜୀଝୁ ତଲେ ନାହାଁୟି କିଝିଆନେ □

୧୫ ସାମା ଆମ୍ବାଆରାକି ସୁଦୁଜୀଝୁ ମାନେ, ଏଝାସି ବାରେ କାତା ନେହିଁକିଁ ଅଣ୍ଠିନେସି, ଆଡିଜିକେଏ ଆମ୍ବାଆସି ଏଝାଶାଇଁ ଅଣ୍ଠପଅସି □

୧୬ ଏନାଆଁତାକି ଇଚିହିଁ,  
 “ଆମ୍ବାଆସି ମାହାପୁରୁତି ଅଣ୍ଠପୁ ପୁଞ୍ଜାମାନେସି,  
 ଇଞ୍ଜା ଏଝାସି ଏଝାଶାଇଁ ଜାପୁହାଲି ଆଡିନେସି ?”  
 ସାମା ମାମୁ କ୍ରୀସ୍ତତି ମନ ବେଟା ଆହାମାନମି □

## ୩

### କୁଲମିତା ଗଡ଼ହା

୧ ଏ ନା ତାୟିୟାଁ ଅଡେ ତାଙ୍ଗିସ୍ତାତେରି ନାନୁ ସୁଦୁଜୀଝୁ ବେଟାଆହାମାନି ଲକୁଣି ଝେହ୍ନିଲେହେଁ ମିଙ୍ଗେ ଝେସାଲି ଆଡାଆତେଏଁ, ସାମା ଆଙ୍ଗା ତଲେ ମାନି ଲକୁ ଅଡେ କ୍ରୀସ୍ତ ତାଣା ନାମୁତି କକାରି ପଦାଁଣି ଝେହ୍ନିଲେହେଁ ମିଙ୍ଗେ ଝେସ୍ତାତେଏଁ □

୨ \*ନାନୁ ମିଙ୍ଗେ ପାଲୁ ଉଚ୍ଚହାନା ଆଟ୍ଝା ରାନ୍ଦା ହିନ୍ଦାଆତେଏଁ, ଏନାଆଁତାକି ଇଚିହିଁ ଏଲେତି ରାନ୍ଦା ତିଞ୍ଜାଲି ଆଡିହିଲାଆତେରି, ଅଡେ ନାଏଁ ଜିକେଏ ଆଡଅତେରି,

୩ ନାଏଁ ପାତେକା ମୀରୁ ଦାରତିତି ନାମାଆତି ଲକୁ ମାଣ୍ଠିକି ତଲେ ମାଞ୍ଜେରି, ଏନାଆଁତାକି ଇଚିହିଁ ମୀ ବିତ୍ରା ତାହାରା ଅଡେ ଗଡ଼ହା

କିନାହିଁମାନେ, ଏଦାଆଁତାକି ମୀରୁ ଦାର୍ତ୍ତିତି ନାମାଆତି ଲକୁତେରି ଆଏକି ଇଞ୍ଜା ମାଣ୍ଡସି ନୀତିନି ଲେହେଁ ନୀତି ହିଲଅତେରି ?

୪ ☆ଏଚେତା ରଅସି ଏଲେଇନେସି, “ନାନୁ ପାଞ୍ଜୁଲ ତାଣା ତାତେଏଁ” ଅଡ଼େ ରଅସି ଏଲେଇନେସି “ନାନୁ ଆପଲ ତାଣା ତାତେଏଁ” ଏଚେଟିଏ ମୀରୁ ଦାର୍ତ୍ତିତି ନାମାଆତି ଲକୁତେରି ଆଏକି ?

୫ ଆପଲ ଆମ୍ବାଆସି ? ପାଞ୍ଜୁଲ ଆମ୍ବାଆସି ? ଏଞ୍ଜାରି ଝାରଇ ସେବା କିନାରି, ଆମ୍ବାଆରି ତାଣାଟି ବାରେତାକି ପ୍ରବୁ ଏନିକିଁ ହୀହାମାନେସି ଏଲେକିଁ ମୀରୁ ନାମାମାଞ୍ଜେରି □

୬ ☆ନାନୁ ଉହାମାଈଁ, ଆପଲ ଏମୁ ହୀହାମାନେସି, ସାମା ମାହାପୁରୁ ପାତି କିହାମାନେସି □

୭ ଇତିହିଁ ଆମ୍ବାଆସି ଉହିନେସି ଇଞ୍ଜା ଆମ୍ବାଆସି ଏମୁ ହୀନେସି ଏଞ୍ଜାସି ଏନାସି ଆଏ, ସାମା ଆମ୍ବାଆସି ପାତି କିନି ମାହାପୁରୁ ଏଞ୍ଜାସି କାଜାସି □

୮ ଆମ୍ବାଆସି ଉହିନେସି ଅଡ଼େ ଆମ୍ବାଆସି ଏମୁ ହୀନେସି ଏଞ୍ଜାରି ରିଆରି ରଲେଏତାରି, ସାମା ବାରେଜାଣା ତାନି କସ୍ତତି ଲେକାତଲେ କୂଲି ବେଟାଆନେରି □

୯ ଇତିହିଁ ମାମ୍ମୁ ମାହାପୁରୁ ତଲେ ଆଣ୍ଡାନା କାମା କିନାତମି, ମୀରୁ ମାହାପୁରୁତି ତାସା ବୁମି ଅଡ଼େ ମାହାପୁରୁତି ଇଲୁ □

୧୦ ନାଈଁ ହୀପକି ଆହାମାଞ୍ଜାନି ମାହାପୁରୁତି କାର୍ମାତଲେ ନାନୁ ର ବୁଦିଗାଟି ଇଲୁ ଦହନି ଲକୁ ଲେହେଁ ପୁନାଦି କିହାମାଈଁ, ଅର ରଅସି ଏଦାଣି ଲାକ ଇଲୁ ଦସି ମାନେସି, ସାମା ବାରେଜାଣା ତାନି ଲାକ ଏନିକିଁ ଦସି ମାନେରି ଏଦାଆଁତାକି ଜାଗ୍ରାତା ଆପେରି □

୧୧ ଇତିହିଁ ଆମିନି ପୁନାଦି କିଞ୍ଜିଆହାମାନେ, ଏଦାଣି ପିସ୍ପେ ଏଟକାତି ପୁନାଦି ଆମ୍ବାଆସି କିହାଲି ଆଡ଼ଅସି, ଏ ପୁନାଦି ଜୀସୁ କ୍ରୀସ୍ତ □

୧୨ ସାମା ଆମ୍ବାଆସି ଏ ପୁନାଦି ଲାକ ବାଂଗାରା, ଝେଣ୍ଡି, ଗାଡ଼ି ଦାରାଗାଟି ଝାଲକା, ମାରକା, ଜାଡ଼ା, ଅଡ଼େ ଝିକା ତଲେ କିନେସି,



୧୩ ଆତିହ୍ନି ଆତ୍ମାଆରି କାମା ଏନିଲେହେତାୟି ଏଦି ତଞ୍ଜାଆନେ, ଇତିହ୍ନି ଏ ନେରୁ ଏଦି ତହ୍ନେ, ଏ ନେରୁ ହିରୁତଲେ ତଞ୍ଜାଆନେ, ଇଞ୍ଜା ବାରେଜାଣାତି କାମା ଏନିଲେହେତାୟି ଏ ହିରୁ ତାୟିପାରି କିନେ □

୧୪ ଆତ୍ମାଆସି ଏନିକ୍ନି ଇଲୁ ଦସା ମାନେସି ଏଞ୍ଜାଣି କାମା ଏଲେକ୍ନି ତ୍ରିୟତିହ୍ନି ଏଞ୍ଜାସି ଏ ଦାନା ବେଟା ଆନେସି □

୧୫ ଇଞ୍ଜା ଆତ୍ମାଆରି କାମା ଶ୍ରେହାହାନେ, ଏଞ୍ଜାଣିଞ୍ଜାୟି ନାସଞ୍ଜି ଆନେ, ଆଡିଜକେଏ ଏଞ୍ଜାସି ଗେଲ୍ପି ଆନେସି, ସାମା ଏଦି ହିରୁ ବିତ୍ରାତି ହଟା ହାତି ସମାନା ଆନେ □

୧୬ \*ମୀରୁ ପୁଞ୍ଜାହିଲଅତେରି କି ମୀରୁ ମାହାପୁରୁତି ଇଲୁତେରି, ଅଡେ ମାହାପୁରୁତି ସୁଦୁଜୀଞ୍ଜୁ ମୀ ହିୟାତା ବାସା କିନେ □

୧୭ ଆତ୍ମାଆସି ମାହାପୁରୁ ଲକୁଇଁ ନାସା କିନେସି, ମାହାପୁରୁ ଏଞ୍ଜାଣାଇଁ ନାସା କିନେସି, ଇତିହ୍ନି ମାହାପୁରୁତି ଇଲୁ ଅଟ୍ଟାୟି ଇଞ୍ଜା ମୀରୁଏ ଏଞ୍ଜାଣି ଇଲୁ □

୧୮ ଆତ୍ମାଆସି ତାନୁଏ ତାଙ୍ଗେ ନାଡିକିହା କତାଆପେସି, ଆମିନି ଲକୁ ଇ ଦାର୍ତତିତା ବୁଦି ଗାଟାତେଏଁ ଇଞ୍ଜି ଅଣପିନେସି, ଆତିହ୍ନି ଏଞ୍ଜାସି ଏନିକ୍ନି ବୁଦିଗାଟାସି ଆନେସି ଏଦାଆଁତାକି ଦାର୍ତତିତି ଲକୁତାଣା ବୁଦି ହିଲାଆଗାଟି ଲକୁ ଲେହେଁ ଆପେସି □

୧୯ ଇତିହ୍ନି ଇ ଦାର୍ତତିତି ବୁଦି ମାହାପୁରୁ ନକିତା ବୁଦି ହିଲାଆଗାଟାୟି, ଏଦାଆଁତାକି ରାସ୍କି ଆହାମାନେ, “ମାହାପୁରୁ ବୁଦି ଗାଟାରାଇଁ ତାମି ସୁତ୍ତମି ତଲେ ପାନ୍ଦାତା ଆହ୍ନେସି;”

୨୦ ଅଡେ ରାସ୍କି ଆହାମାନେ “ବୁଦିଗାଟାରି ଅଣ୍ପୁ ବାରେ ଉଜେଏତାୟି ଇଞ୍ଜି ପ୍ରୁ ପୁଞ୍ଜାମାନେସି □”

୨୧ ମାଣ୍ଡସି ତାଣା ଆତ୍ମାଆସି ବଡପଣ ଆଆପେସି, ଇତିହ୍ନି ବାରେ ମୀଦିଏ □

୨୨ ପାଞ୍ଜୁଲ, ଇଞ୍ଜୁ କି ଆପଲ, ଇଞ୍ଜୁ କେପା\*, ଇଞ୍ଜୁ ଅଡେ ଦାର୍ତତି ଇଞ୍ଜୁ କି ଜୀଞ୍ଜୁ ଇଞ୍ଜୁ, କି ହାନାୟି ଆପେ, ନୀଏଁ ତାୟି ଆପେ, କି ତାୟୁତାୟି ଆପେ, ଏ ବାରେଏ ମୀଦି □

☆ ଶା:୧୬ ଶା:୧୭ ଏକର ୬:୧୯; ୨କର ୬:୧୭

\* ଶା:୨୨ ଶା:୨୨ ପିତର

୨୩ ସାମା ମୀରୁ କ୍ରୀସ୍ତତି ଲକ୍ଷ୍ମଣେରି ଅଡ଼େ କ୍ରୀସ୍ତ ମାହାପୁରୁ ତାଣାତାସି □

## ୪

କ୍ରୀସ୍ତ ତାଣାଟି ପାଣ୍ଡୁଞ୍ଜି ଆହାମାନାରି

୯ ଲକ୍ଷ୍ମ ମାଙ୍ଗେ କ୍ରୀସ୍ତତି ସେବା କିନାରି, ଅଡ଼େ ମାହାପୁରୁତି ତରୁମାନି ଇଲୁତି ଗୁମୁସ୍ତା ଇଞ୍ଜି ଅଶ୍ଵପାପେରି □

୧୦ ଇଲେଆହ୍ ଗୁମୁସ୍ତା ବେଟାଆହାମାନି ମାଣ୍ଠି ଜାହାରା ପ୍ରବୁ ତାଣା ମାନିଗାଟାସି ତଞ୍ଜା ଆପାସି □

୧୧ ସାମା ମୀ ତାଣାଟି ଆପେ କି ଆମିନି ନୀହାୟି କିନି ତାଣା ନୀହାୟି କିଞ୍ଚି ଆନାୟି ନା ତାକି ଏଡ଼ି କାଜା କାତା ଆଏ, ଇଲେକ୍ ନାନୁ ଜାହାରାଇଁ ନୀହାୟି କିହା କତଅଁ □

୧୨ ଇତିହ୍ ନାନୁ ନା କପାଟି ଏନାଆଁ ପୁଞ୍ଜାହିଲଅଁ, ଆଡ଼ିଜିକେଏ ନାନୁ ଇମ୍ପାଆଁ ଦହ୍ ହିଲଆ ଗାଟାତେଏଁ ଇଞ୍ଜି ତଞ୍ଜା ଆହାହିଲଅଁ, ସାମା ଆମ୍ପାଆସି ନା ନୀହାୟି କିୟାନେସି, ଏଞ୍ଜାସି ପ୍ରବୁ □

୧୩ ଏଦାଆଁତାକି, ତୀରିକିତି ଦିନା ଝାଆ ନକେଏ ଇତିହ୍ ପ୍ରବୁ ଝାଆ ନକେଏ ମୀରୁ ଆମ୍ପାଆରାଇଁ ନୀହାୟି କିଆଦୁ, ଏଞ୍ଜାସି ଆନ୍ଦେରିତା ତରୁମାନି ବାରେ ଉଜେଡ଼ିତା ତହ୍ନେସି, ଅଡ଼େ ହିୟାତି ଅଶ୍ଵ ବାରେ ଏଞ୍ଜାସି ଝେହ୍ନେସି, ଏରିବେଲା ବାରେଜାଣା ମାହାପୁରୁ ତାଣାଟି ଗାଞ୍ଜୁରମି ବେଟାଆଦେରି □

୧୪ ଏ ତାୟିୟାଁ ଅଡ଼େ ତାଞ୍ଜିସ୍ତାତେରି, ନାନୁ ମୀରୁ ଜାପାଲି ତାକି ଇ ବାରେ କାତା ନାନୁ ନାଙ୍ଗେ ଅଡ଼େ ଆପଲଇଁ ତସାଁ ଝେସିମାଞ୍ଜାଇଁ, “ଇତିହ୍ ଏନାୟି ରାସ୍ଵକି ଆହାମାନେ ଏ କାତାତି ଗାଣ୍ଡାଦୁ,” ଇଦାଆଁ ମୀରୁ ମା ତାଣାଟି ଜାପାଦୁ, ଅଡ଼େ ଏନିକ୍ ମୀ ବିତ୍ରାଟି ଆମ୍ପାଆସି ରଥଣି ଝାକିଟି ଅଡ଼େ ରଥଣାଇଁ ଅପାଆନା ବତପଣ ଆଆଦୁ □

୧୫ ମିଙ୍ଗେ ଆମ୍ପାଆସି କାଜାସି କିହାଁ ମାଞ୍ଜାନେସି ? ଅଡ଼େ ମୀରୁ ଏନାଆଁ ଦାନା ଲେହେଁ ବେଟାଆହା ହିଲଅଡ଼େରି, ଇଲେକ୍ ମୀଦି ଏନାୟି ମାନେ ? ସାମା ମୀରୁ ଏଦାଆଁ ଦାନା ଲେହେଁ

ବେଟାଆହାମାଞ୍ଜେରି, ଆତିହିଁ ମୀରୁ ଦାନା ଆଏ ଇନି ଲେହେଁ ଏନାଆଁତାକି ବତପଣ ଆହିମାଞ୍ଜେରି ?

୮ ମୀ ବାରେ ଲଡ଼ାମାନାଣି ବେଟାଆଡ଼େରିଏ କି ? ଇଚେକାଟିଏ ମୀରୁ ବାଡ଼କା ହାଚେରିଏ କି ? ମା ପିସପେ ମୀରୁ ରାଜା ଆହାମାଞ୍ଜେରି ? ହାଅ, ମୀରୁ ରାଜା ଆହାମାତିହିଁ ନେହିଁ ଆଡେମା, ଏନିକିଁ ମାମ୍ମୁଜିକେଏ ମୀ ତଲେ ସାଲୁଝି କିହାଲି ଆଡ଼ିତମିମା □

୯ ଏନାଆଁତାକି ଇତିହିଁ ନା ଅଶପୁତା ମାର ପାଶୁଝି ଆହାମାନାତାୟି, ମାର ମାହାପୁରୁତି ଡଣ୍ଡତା ହେରପି ଆହାମାନି ଡାୟୁତି ଲକୁ ସମାନା ତସାମାଞ୍ଜାନେସି, ଇତିହିଁ ମାମ୍ମୁଦାରତିତା, ମାହାପୁରୁତି ଦୂତୁୟାଁ ଇଞ୍ଜାଁ ମାଶସିୟାଁ ନକିତା ଲାଜାକିଝି ଆନାତମି ଲେହେଁ ଆହାମାନମି □

୧୦ ମାମ୍ମୁ କ୍ରୀସ୍ତ ତାକି ବୁଦି ହିଲାଆ ଗାଟାତମି, ସାମା ମୀରୁ କ୍ରୀସ୍ତ ତାକି ବୁଦି ଗାଟାତେରି; ମାମ୍ମୁ ବୁଡ଼ୁୟି ହିଲାଆ ଗାଟାତମି, ସାମା ମୀରୁ ବାଡ଼ୁୟି ଗାଟାତେରି; ମୀରୁ ଗାଝୁରମି ବେଟା ଆନାତେରି, ସାମା ମାମ୍ମୁ ବେଟା ଆଆଗାଟାତମି □

୧୧ ନୀଏଁ ପାତେକା ମାମ୍ମୁ ହାକି, ଅଡ଼େ ଏସକି ଗାଟାତମି, ଗେଞ୍ଜିତି ହିମ୍ବରି ହୁଟାମାନମି, ଅଡ଼େ ମାଡ଼ା ବେଟାଆହିଁ ମାନମି, ଇଞ୍ଜାଁ ବାସାଟାୟି ହିଲାଆନା ରେଜିମାନମି □

୧୨ ☆ମା କେୟୁଟି ଝାହୁତି କାମା କିହିମାନମି, ଆମ୍ବାଆସି ବାକା ଇଟାସାରେ, ମାମ୍ମୁ ଏଞ୍ଜାୟି ବର ହାହିମାନମି, ସାସ୍ତି ହିୟାତିହିଁ ଜିକେଏ ଅରହିମାନମି □

୧୩ ମାଞ୍ଜେ ଲାଜା କିୟାତିହିଁ ଜିକେଏ ମାମ୍ମୁ ଆଶୁଝିଆନି କାତା ଝେସିମାନମି; ନୀଏଁ ପାତେକା ମାମ୍ମୁଦାରତିତି ତୁକିଁ ଜାଶୁ ଅଡ଼େ କିଟସି ରୁଡ଼ିତି ଲେହେଁ ଆହାମାନମି □

୧୪ ନାନୁ ମିଞ୍ଜେ ଲାଜା ହାହାଲି ଇ ବାରେ କାତା ରାଡ଼ିମାଞ୍ଜାଅଁ, ସାମା ନା ଜୀଝୁତି ମୀରକା ଇଞ୍ଜାଁ ଅଶପାମା ମିଞ୍ଜେ ସେଡ଼ନା ହାହାଲିତାକି ଇ ବାରେ କାତା ରାଡ଼ିମାଞ୍ଜାୟି □

୧୫ ଇତିହାସ କ୍ରୀଷ୍ଟି କାତା ମିଙ୍ଗେ ଜାପାନାରି ଦସ ମାଣା ଲକ୍ଷ୍ମ ତ୍ରିୟନେରି, ଆଡ଼ିଜିକେଏ ହାରେକା ତାଞ୍ଜିୟା ହିଲଅରି; ଇତିହାସ କ୍ରୀଷ୍ଟ ଜୀସୁ ତାଣା ନାନୁ ମିଙ୍ଗେ ନେହା କାରୁତଲେ ମୀ ତାଞ୍ଜି ଲେହେଁ ଆହାମାଇଁ □

୧୬ ଏଦାଆଁତାକି ନାନୁ ମିଙ୍ଗେ ବାତିମାଲିମାଞ୍ଜାଇଁ ନାନୁ କିହିମାନି ଲେହେଁ କିଦୁ □

୧୭ ଏଦାଆଁତାକି ନାନୁ ତିମତିଇଁ ମୀ ତାଣା ପାଣ୍ଡିମାଞ୍ଜାଇଁ, ଏଝାସି ମାହାପୁରୁ ତାଣା ନା ଜୀଝୁତି ନାମୁତି ମୀରଏସି; ଏନିକିଁ ନାନୁ ବାରେଝାକି ବାରେ କୁଲମିକାଣା ଜାପୁହି ମାଇଁ, ଏଲେକିଁ ଏଝାସି ମିଙ୍ଗେ ନା କ୍ରୀଷ୍ଟି ଲେମ୍ବିନାଣି ଅଣ୍ଡପି କିୟାନେସି □

୧୮ ନାନୁ ମୀ ତାଣା ଝାହି ହିଲଅଁ ଇଞ୍ଜିଁ ଅଣ୍ଡପାନା ଏତରଜାଣା ବତପଣ ଆହିମାଞ୍ଜେରି □

୧୯ ସାମା ମାହାପୁରୁ ମନ କିତିହାଁ, ନାନୁ ମୀ ତାଣା ତବେ ଝାଇଁ; ଅଡ଼େ ଆମ୍ବାଆରି ବତପଣ ଆହିମାନେରି, ଏଝାରି କାତାତଲେ ଆଏ, ସାମା ବାଡ଼ୁୟୁତି ସିନିକଇଁ □

୨୦ ଇତିହାସ ମାହାପୁରୁତି ରାଜି ଝାରଇ ଜଲିନି କାତାତଲେ ଆଏ, ସାମା ବାଡ଼ୁୟୁ ତଲେ ତଞ୍ଜାଆନେ □

୨୧ ମୀ ଅଣ୍ଡପୁ ଏନାୟି ? ନାନୁ ବାଡ଼ୁଗା ଆସାଁ ମୀ ତାଣା ଝାଇଁ କି ଜୀଝୁ ନନାଣି ଆସାନା ଇଞ୍ଜା ସୁଦୁ ସୁଝାଲା ଗାଟି ଜୀଝୁ ଆସାଁ ଝାଇଁ ?

## ୫

### କୁଲମି ବିତ୍ରାମାନି ଲାଗେଏତାୟି

୧ ସାତେଏ ଝେଙ୍ଗାମାନେ କି ମୀ ବିତ୍ରା ଦାରିକାମା ମାନେ, ଅଡ଼େ ମୀ ତାଣା ଇଲେତି ଦାରିକାମା ମାନେ, ଅଡ଼େ ଇଲେତାୟି ଜୀହୁଦିଆଆତାରି ତାଣା ଜିକେଏ ଆଏ, ଇଲେକିଁ ରଅସି ତାନି ଆବା ତକ୍ତିନି ଇଟାମାନେସି □

୨ ଅଡ଼େ, ଆମ୍ବାଆସି ଇଲେତି କାମା କିହାମାନେସି, ଏଝାସି ଏନିକିଁ ମୀ ତାଣାଟି ହେକ କିଝିଆନେସି, ଏଦାଆଁତାକି ଦୁକୁଆହାଁ ତୀଆନା ବତପଣ ଆହିମାଞ୍ଜେରି ?

୩ ସାମା ନାନୁ ଆଜ୍ଞା ତଳେ ହିଲାଆତି ଜିକେଏ ଏମ୍ବାଆଁ ମାନିଲେହେଁ ମାଇଁ, ଆମ୍ବାଆସି ଇଲେତି କାମା କିହାମାନେସି, ନାନୁ ମାନି ଲେହେଁ ପ୍ରବୁ ଜୀସୁ ଦରୁତଲେ ଏଞ୍ଜାଣି ବିଚାରା କିହା ରାହାମାଇଁ,

୪ ଇଚିହଁ ମୀରୁ ଅଡ଼େ ନା ପ୍ରବୁ ଜୀସୁ ବାଡ଼ୁୟୁ ତଲେ କୁଡ଼ା ଆନାଟି ନା ଜୀସୁ ଜିକେଏ ଏମ୍ବାଆଁ ଡ଼ୟିନେ ଇଞ୍ଜି ପୁଞ୍ଜାମାଇଁ,

୫ ଇଞ୍ଜା ଇଲେତି ଲକୁଇଁ ଆଜ୍ଞା ତଲେ ନାସା ଆହାଲି ସୟତାନ କେୟୁତା ହେରପିନାୟି ମାନେ, ଏନିକଁ ପ୍ରବୁ ଜୀସୁତି ଦିନାତା ଏଞ୍ଜାଣି ଜୀସୁ ଗେଲପି ଆହାଲି ଆଡ଼ିନେ □

୬ ✨ମୀରୁ ଇଲେଆହଁ ବଡ଼ପଣ ଆନାୟି ନେହେଁ ଆଏ □ ମୀରୁ ପୁଞ୍ଜାହିଲଅତେରି, “ଇଚରା ପୁଲାଏୟୁ ବିତିତା ମାନି ଗୁଣ୍ଡାତି ପୁଲା କିନେ □”

୭ ମୀରୁ ପୁଲା ତିନାଆ ଲକୁତେରି, ଏଦାଆଁତାକି ଏନିକଁ ମୀରୁ ପୁଞ୍ଜା ତ:କା ଆହାଲି ଆଡ଼ିଦେରି, ଏଦାଆଁତାକି ପୁଞ୍ଜା ପୁଲା ଏୟୁତି ହପହା ତୁହଦୁ; ଏଦାଆଁତାକି ଇଚିହଁ ମା ପିସପିଆନି ପାର୍ବୁତି ମେଣ୍ଡା ତାଲୁ, ଇଚିହଁ କ୍ରୀସୁ, ଜିକେଏ ପୂଜା କିଞ୍ଜିଆହାମାନେସି □

୮ ଏଦାଆଁତାକି ଖାଦୁ, ମାର ପାପୁ ଅଡ଼େ ଲାଗେଏତି ପୁଞ୍ଜା କାମାତି ରୁଚି ପଞ୍ଜିକିନି ଗୁଣ୍ଡା ତଲେ ପାର୍ବୁ କିଆନା ତୀରି ଅଡ଼େ ସାତା ତଲେ ପୁଲାଏୟୁ ହିଲାଆ ରୁଚିତି ପାର୍ବୁ କିନ □

୯ ଦାରି କାମାକିନାରି ତଲେ ଆଣ୍ଡାଆଦୁ ଇଞ୍ଜି ନାନୁ ନା ଆକୁତା ରାଟାମାଚେଏଁ;

୧୦ ଇ ଦାର୍ତତି ଦାରିକାମା କି ଦନ ଜୁପକା, ଏଚକାତାରି ଦିଶସୁ ସରୁ ଆନାରି, ପେଶକା ବମାୟାଁ ପୂଜା କିନାରି ତଲେ ଆମ୍ବାଆସି ଏଚେଲା ଆଣ୍ଡାଆସି, ଏଡ଼ି ଆଏ, ଏଲେଆଡ଼ିହଁ ଦାର୍ତତି ହଟା ହାନାୟିମାନେ;

୧୧ ଇଚିହଁ ନା ରାଡ଼ିନି ଅଶ୍ପୁ ଇଦି ମାଚେ, ଇଚିହଁ ଆମିନି ଲକୁତି ତାୟି ଇଞ୍ଜି ଝେଙ୍ଗାନା, ଦାରିକାମା, ଦନ ଜୁପକା, ପେଶକା ବମାୟାଁ ପୂଜା, ନିନ୍ଦା ଗାଟାରି, କାଡ଼ୁବୁଡ଼ୁ, ଏଚକାତାରି ଦିଶସୁତି

ସରୁ ଆନେରି, ଆତିହ୍ ଏଲେତାରି ତଲେ କୃତାଆଦୁ, ଅଡ଼େ ଏଞ୍ଜାରିତଲେ ରାନ୍ଦା ଜିକେଏ ତିନାଆଦୁ □

୧୭ ପାଙ୍ଗାତି ଲକୁତି ନୀହାଁୟି କିହାଲି ନାନୁ ଆମ୍ବାଆତେଏଁ ? ସାମା କୁଲମି ବିତ୍ରା ଆମ୍ବାଆରି ମାନେରି ଏଞ୍ଜାରି ବିଚାରା ମୀରୁ କିଅତେରି କି ?

୧୮ ସାମା ଆମ୍ବାଆରି ପାଙ୍ଗାତା ମାନେରି ମାହାପୁରୁ ଏଞ୍ଜାରି ବିଚାରା କିନେସି □ ଦାମ୍ବୁ ସାଢ଼ସ୍ତରିତା ରାସ୍ତକି ଆହାମାନେ, “ମୀ ତାଣାଟି ଲାଗେଏତି ଲକୁଣି ଏଟ୍ଟକା କିଦୁ □”



### କ୍ରୀସ୍ତାନା ତାୟିୟାଣି ଦାଞ୍ଜାକିନି ମେରା

୧ ମୀ ବିତ୍ରାଟି ଆମ୍ବାଆରି କପାଟି କାତା ମାଟିସାରେ ଏଞ୍ଜାସି ନୀହାଁୟି କିହାଲି ମାହାପୁରୁ ଲକୁତାଣା ହାଲାଆନା ଦାମ୍ବୁ ହିଲାଆଗାଟି ନୀହାଁୟି କିନାଣି ତାଣା ଅହାଲି ଏନିକ୍ ସାସା ମାନେ ?

୨ ମାହାପୁରୁ ଲକୁ ଇ ଦାର୍ତତି ନୀହାଁୟି କିନେରି, ଇ କାତା କି ମୀରୁ ପୁଞ୍ଜାହିଲଅତେରି ? ଇଞ୍ଜା ଦାର୍ତ ମୀ ତାଣା ନୀହାଁୟି କିଞ୍ଜିଆନେ, ଆତିହ୍ ଇ ଇଚି ଇଚି କାତାଟି ନୀହାଁୟି କିୟାଲି ଆଡ଼ଅତେରି କି ?

୩ ମୀର ଲାକପୁରୁତି ଦୂତୁୟାଁଇଁ ଜିକେଏ ବିଚାରା କିନାୟି ଇ କାତା ମୀରୁ ପୁଞ୍ଜାହିଲଅତେରି କି ? ଆତିହ୍ ଦାର୍ତତି ଜାମ୍ଲିତି ଜିକେଏ ନୀହାଁୟି କିନାୟି ମାଙ୍ଗେତାକି ଉସାସା ଆୟେଏ କି ?

୪ ମୀ ଜୀଞ୍ଜୁତି କାତା ଏନାୟି, ସାମା ନୀହାଁୟି କିୟାଲି ଏନି ଦାର୍ତତି କାତା ମାଟିହ୍, ଏଦାଆଁ ନୀହାଁୟି କିୟାଲି କୁଲମିତି ପୁନାଆ ଗାଟାରାଇଁ ନୀହାଁୟି କିୟାଲି ହାଟିଦେରି କି ?

୫ ନାନୁ ମିଙ୍ଗେ ଲାଜା ହୀହାଲିତାକି ଇଦାଆଁ ଝେସିମାଞ୍ଜାଇଁ □ କ୍ରୀସ୍ତଇଁ ନାମାମାନି ତାୟିୟାଁ ବିତ୍ରା ଆହିମାନି ଗଡ଼ହାତି ତୁକ୍ତହାଲି, ଇଲେତି ର.ବୁଦିଗାଟାସି ଜିକେଏ କୁଲମିତା ଆମ୍ବାଆସି ହିଲଅସି କି ?

୬ ସାମା ନାମ୍ବୁଗାଟି ତାୟି ଅର ତାୟି କପାଟି ନୀହାଁୟି ଇଲୁତା ଦାଞ୍ଜା କିନେସି, ଏଡି ଜିକେଏ ନାମାଆଗାଟାରି ତାଣା □

୭ ସାମା ମୀ ମୀ ବିତ୍ରାତି କାତାତାକି କର୍ତ୍ତା ଦାଝା କିହିମାଝେରି, ଏମ୍ମାଆଁ ସାତେଏ ଦହ ଗାଟାତେରି, ଏନାଆଁତାକି ଲାଗେଏତାଣି ଅରୁହି ହିଲଅତେରି ? ଏନାଆଁତାକି ନାସଞ୍ଜି ଆନାଣି ଅପିହିଲଅତେରି ?

୮ ସାମା ମୀରୁ ମୀରୁଏ ଲାଗେଏ ଅଡ଼େ ନାସା କିହିମାଝେରି, ଅଡ଼େ ଏଦାଆଁ ତାୟିୟାଣି କିହିମାଝେରି □

୯ ଅଡ଼େ ଦାମ୍ନୁ ହିଲାଆ ଗାଟାରି ମାହାପୁରୁ ରାଜିତି ଅଦିକାରା ଆଅରି, ଇଦାଆଁ କି ମୀରୁ ପୁଞ୍ଜାହିଲଅତେରି ? ନାଡ଼ିକିଞ୍ଜି ଆଆଦୁ, ଦାରିକାମା, କି ପେଣକା ବମାୟା ପୂଜା କିନାରି, ଲାଗେଏତି କାମାକିନାରି, ଆବା ଆଦାୟା ଦହ କିଞ୍ଜିଆନାରି,

୧୦ ସରୁ କିନାରି, ଦନ ଜୁପକା, କାଡ଼ ରୁଡ଼ୁ, ଲକୁଣି ନିନ୍ଦା କିନାରି, ଏଟକାତାରି ଦିଶସୁ ମୀଞ୍ଜନାରି, ଇଝାରି ମାହାପୁରୁ ରାଜିତା ଅଦିକାରା କିହାଲି ଆଡ଼ଅରି □

୧୧ ଅଡ଼େ, ମୀ ବିତ୍ରା ଆମ୍ମା ଆମ୍ମାଆରି ଇଲେକ୍ ମାତେରି; ସାମା ପ୍ରୁ ଜୀସୁ କ୍ରୀସୁ ଦରୁତଲେ ଇଞ୍ଜା ମାହାପୁରୁତି ସୁଦୁଜୀଞ୍ଜୁ ତଲେ ମୀରୁ ନରଞ୍ଜି ଆହାମାଝେରି, ଇଞ୍ଜା ସୁଦୁଗାଟାତେରି ଆହାନା ତାରିଗାଟାତେରି ଇଞ୍ଜା ଝେଙ୍ଗା ମାଝେରି □

**ମାହାପୁରୁତି ଗାଞ୍ଜୁରମି ତାକି ଆଙ୍ଗାତି ଲେନ୍ଦିନାୟି**

୧୨ ✨ଆମ୍ମାଆସି ଏଲେଇନେସି “ନାଙ୍ଗେ ବାରେ କାମା କିହାଲି ଅଦିକାରା ହୀପକି ଆହାମାଞ୍ଜାନେ,” ସାତା କାତା, ସାମା ବାରେ କାମା ନିଙ୍ଗେତାକି ନେହାୟି ଆଏ, ନାଙ୍ଗେ ବାରେ କାମା କିହାଲି ହେଲ ମାନେ ସାମା ନାଙ୍ଗେ ଲକହାଲି ଆମ୍ମାଆରାକି ଏରେଲ୍ମା ପାରୁ ହୀଅଁ □

୧୩ ଏତରଜାଣା ଏଲେଇନେରି “ରାନ୍ଦା ବାଣ୍ଡି ତାକି ଇଞ୍ଜା ବାଣ୍ଡି ରାନ୍ଦା ତାକି □” ସାମା ମାହାପୁରୁ ଇ ରିଶ୍ଟାଆଁତି ଜିକେଏ ମ୍ମେକ୍ନେସି □ ଆଙ୍ଗା ଦାରି କାମାତାକି ଆଏ, ସାମା ପ୍ରୁବୁତି ସେବାତାକି, ଅଡ଼େ ପ୍ରୁ ଆଙ୍ଗା ତାକି □

୧୪ ମାହାପୁରୁ ପ୍ରୁ ଜୀସୁଇଁ ହାକିଟି ନିକ୍ହେସି, ଇଞ୍ଜା ତାନି ବାଡ଼ୟୁ ତଲେ ମାଙ୍ଗେ ଜିକେଏ ନିକ୍ହାନେସି □

୧୫ ମୀ ଆଜ୍ଞା କ୍ରୀସ୍ତତି ଆଜ୍ଞା ଲେହେଁ, ଇଦାଆଁ ପୁଞ୍ଜାହିଲଅତେରି କି ? ଆତିହିଁ ନାନୁ କ୍ରୀସ୍ତତି ର ଆଜ୍ଞା ଅହାନା ଦାରେଣି ଆଜ୍ଞା କିଇଁ ? ଏଦି ଏରେଲା ଜିକେଏ ଆଆପେ □

୧୬ ଅଡ଼େ ଆମ୍ବାଆସି ଦାରେଣି ତଲେ ଆଣ୍ଡିନେସି ଏଞ୍ଜାସି ଏଦାନିତଲେ ରଣ୍ଡିଏ ଆଜ୍ଞା ଆନେସି, ଇଦାଆଁ ମୀରୁ ପୁଞ୍ଜାହିଲଅତେରି ? ଏଦାଆଁତାକି ଦାମ୍ବୁପତିତା ରାସ୍‌କି ଆହାମାନେ “ଏ ତକ୍ତି ତକ୍ତା ରଣ୍ଡିଏ ଆଜ୍ଞା ଆନୁ □”

୧୭ ସାମା ଆମ୍ବାଆସି ପ୍ରୁ ତଲେ ଆଣ୍ଡିନେସି, ଏଞ୍ଜାସି ଏଞ୍ଜାଣିତଲେ ରଣ୍ଡିଏ ଜୀଞ୍ଜୁ ଆନେସି □

୧୮ ଦାରିକାମାଟି ହେକ ଆନୁ, ମାଣ୍ଡସି ଏଦି ପାପୁ କିନେସି, ଏଦି ଆଜ୍ଞାତି ଲାଗେଏ କିନେସି, ସାମା ଆମ୍ବାଆସି ଦାରିକାମା କିନେସି, ଏଞ୍ଜାସି ତାନି ଆଜ୍ଞା କପାଟି ପାପୁ କିହିମାନେସି □

୧୯ ✨ମୀ ଆଜ୍ଞା ମାହାପୁରୁ ତାଣାଟି ବେଟାଆହାମାନି ମୀ ହିୟାଁ ବିତ୍ରା ସୁଦୁଜୀଞ୍ଜୁ ବାସାଆନି ଦେଞ୍ଜୁଡ଼ି, ଇଦାଆଁ ମୀରୁ ପୁଞ୍ଜାହିଲଅତେରି କି ? ଅଡ଼େ ମୀରୁ ମୀରୁଏ ମିଆତେରି ଆଏ; ସାମା ମାହାପୁରୁତି ଲକୁତେରି □

୨୦ ଇତିହିଁ ମୀରୁ ଗାଡ଼ି ଦାରାତଲେ କଡ଼ଞ୍ଜି ଆହାମାଞ୍ଜେରି; ଏଦାଆଁତାକି ମୀ ଆଜ୍ଞା ତଲେ ମାହାପୁରୁତି ଗାଞ୍ଜୁରମି କିଦୁ □

## ୭

### ବୀହା ଆନି ମେରା

୧ ମୀରୁ ମୀ ଆକୁତା ଆନିନି କାତା ରାଚା ମାଞ୍ଜେରି, ଏ ବାରେତାକି ନାନୁ ଖେସ୍ତାନାୟି ଇଦି, “ଇୟାନି ତୀଗାଆ ଗାଟାୟି ଆବାକି ନେହେଁ;”

୨ ସାମା ଦାରି କାମାଟି ଆଜିତାକି ବାରେ ଆବାୟାକି ଜାହାରା ତକ୍ତି ମାଣ୍ଡେ, ଅଡ଼େ ଇୟାସିକାକି ଜାହାରା ତକ୍ତା ମାଣ୍ଡେସି □

୩ ତକ୍ତା, ତକ୍ତିନାକି ଏନାୟି ଲଡ଼ା ଏଦାଆଁ ହୀପାସି, ଇଞ୍ଜା ଏଲେକିହିଁ ଏ ତକ୍ତି ତକ୍ତାକି ତାନି ଲଡ଼ାମାନାଣି ହୀପେ, ଅଡ଼େ ତାମ୍‌ଜେ ଏନାୟି ଲଡ଼ାମାନାଣି ପୁରା କିନାୟିମାନେ □



୪ ଡକ୍ରି ତାନି ଆଜ୍ଞାତି ମୁହେଁ ଅଦିକାରା ହିଲେଏ, ସାମା ଡକ୍ରିକି ମାନେ □ ଏଲେକିହିଁଏ ଡକ୍ରିକି ତାନି ଆଜ୍ଞାତି ମୁହେଁ ଅଦିକାରା ହିଲେଏ, ସାମା ଡକ୍ରିନାକି ମାନେ □

୫ ତାମ୍ବୁତାମି ତାଣାଟି ଏଟ୍ଟକା ଆହାନା ଡୟାଆପୁ; ସାମା ପ୍ରାଡାନା କିହାଲି ଏତରଦିନା ପାତେକା ରିଆତେରି ରଣ୍ଡିଏ ମନ୍ ଆହାନା ଏଟ୍ଟକା ଡୟାଲି ଆଡିଦେରି; ଅଡେ ମା ଆଜ୍ଞାତି ଜୁପ୍ପକାତାକି ଡୟାଲି ଆଡାଆକି ସୟତାନ ଏନିକିଁ ମିଙ୍ଗେ ତାୟିପାରି କିୟେଏ, ଏଡାଆଁତାକି ଝେଣ୍ଡେ ଆଣ୍ଡୁଆଦୁ □

୬ ସାମା ନାନୁ ହୁକୁମି ହାନି ଲେହେଁ ଝେହୁଆନାହାଁ ଜାପୁନି ଲେହେଁ ଝେସିମାଲ୍ □

୭ ଆତିହିଁ ଜିକେଏ ଏନିକିଁ ବାରେ ଲକୁ ନାଲେହେଁକିଁ ଆନେରି, ଇଦି ନା ଅଣପୁ □ ସାମା ଆମ୍ବାଆରି ଇଲେତି ଦାନା, ଅଡେ ଆମ୍ବାଆରି ଏଲେତି ଦାନା ମାହାପୁରୁ ତାଣାଟି ବେଟାଆହାମାନେରି □

୮ ସାମା ନାନୁ ବାହା ଆଆତି ଲକୁଇଁ ଇଞ୍ଜା ରାଣ୍ଡେଣିସିକାଣି ଝେସିମାଲ୍, ଏଡି ନାଲେହେଁକିଁ ଡୟିତିହିଁ ଏଝାସିକାକି ନେହେଁ □

୯ ସାମା ଏଡି ଆଜ୍ଞାତି ଲକ୍‌ହାଲି ଆଡିହିଲାର ଇତିହିଁ ଏଡି ବାହା ଆପୁ; ଇତିହିଁ ଆଜ୍ଞା ଲାଗେଏତି କାମାତା ଝେନିକିହାଁ, ବାହା ଆନାୟି ନେହେଁ □

୧୦ ☆ସାମା ବାହା ଆଡି ଲକୁଇଁ ନାନୁ ହୁକୁମି ହାହିମାଲ୍, ନାନୁ ଆଏ ସାମା ପ୍ରୁ ହୁକୁମି ହାହିମାନେସି, ଡକ୍ରି ତାନି ଡକ୍ରି ତାଣାଟି ଏଟ୍ଟକା ଆଆପେ □

୧୧ ସାମା ଏଡି ରଣ୍ଡିଏ ଏଟ୍ଟକା ଆନେ, ଆତିହିଁ ଏଡି ବାହା ଆଆପେ, ଇଞ୍ଜା ତାନି ଡକ୍ରିତଲେ ଅଡେ ଆଣ୍ଡାପେ; ଅଡେ ଡକ୍ରି ତାନି ଡକ୍ରିନି ହେଲ ହାଆପେସି □

୧୨ ଏଟ୍ଟକା ତାରାଇଁ ନାନୁ ଝେସିମାଲ୍, ମା ବିଡ୍ରା ଆମ୍ବାଆରି ଡକ୍ରି କ୍ରୀସ୍ତୁଇଁ ନାମାହିଲାଆତି ଜିକେଏ ଡକ୍ରିତଲେ ଡୟାଲି ମନ୍ କିତିସାରେ, ଆତିହିଁ ଏ ତାୟି ଏ ତାଜିନି ହେଲ ହାଆପେସି □

☆ ୭:୧୦ ୭:୧୦ ମାତି ୫:୩୨; ୧୯:୯; ମାର୍କ ୧୦:୧୧,୧୨; ଲୁକ ୧୭:୧୮

୧୩ ଏଲେକିହିଁ ଆମିନି ତକ୍ତି ମାହାପୁରୁଇଁ ନାମାଆତି ତକ୍ତାକି ବୀହା ଆହାମାନେ, ଇଞ୍ଜା ଏଡ଼ି ଏଞ୍ଜାଣିତଲେ ତୟାଲି ମନ କିନେ, ଏଡ଼ି ତାନି ତକ୍ତାଇଁ ପିହୁଆପେ □

୧୪ ଇତିହିଁ ନାମାଆତି ତକ୍ତା ନାମିତି ତକ୍ତି ତାକି ମାହାପୁରୁ ତାଣାଟି ସୁଦୁ ଆହାମାନେସି, ଅଡ଼େ ନାମାଆତି ତକ୍ତି ନାମିତି ତକ୍ତା ତାକି ମାହାପୁରୁ ତାଣାଟି ସୁଦୁ ଆହାମାନେ; ଆଆତିହିଁ ମୀ ମୀରକା ମାସ୍ତକା ଲାଗେଏ ଆଡେରିମା, ସାମା ନୀଏଁ ଏଞ୍ଜାରି ସୁଦୁଗାଟାରି □

୧୫ ସାମା ନାମାଆ ଗାଟାସି କି ନାମାଆ ଗାଟାୟି ଏଟକା ଆହାଲି ମନ କିତିହିଁ ତାନି ମନଲେହେଁ ଏଟକା ଆପାରି; ଇଲେତି ତାଣା ତାୟି କି ତାଜି ଦସପି ଆହାହଲୀତ; ମାହାପୁରୁ ମିଜେଁ ହିଡ଼ଡ଼ି ତଲେ ମାଞ୍ଜାଲି ଆଟାମାଞ୍ଜାନେସି □

୧୬ ନୀନୁ ନାମିତି ତକ୍ତି ଆହାନା ନୀ ତକ୍ତାକି ଗେଲପିନାତି ଆଡ଼ି, ଇଦାଆଁ ପୁଞ୍ଜାହିଲଅତିକି ? ଇଞ୍ଜା ନୀନୁ ନାମିତି ତକ୍ତା ଆହାନା ନୀ ତକ୍ତିନାକି ଗେଲପିନାତି ଆଡ଼ି, ଇଦାଆଁ ପୁଞ୍ଜାହିଲଅତିକି ?

**ମାହାପୁରୁ ଆଟାମାନି ମାଣ୍ଡକି ଲେହେଁ ନୀତିନାୟି**

୧୭ ଇତିହିଁ ପ୍ରୁ ଆମ୍ବାଆରାକି ଏନିକିଁ ଦାନା ହୀହାମାନେସି, ମାହାପୁରୁ ଆମ୍ବାଆରାଇଁ ଏନିକିଁ ହାଟାମାନେସି, ଏଞ୍ଜାସି ଏଲେକିଁ ତାକାପେସି, ନାନୁ ବାରେ କୁଲମିତି ଏଲେକିହିଁ ଏ ହୁକୁମି ହୀହିମାଇଁ □

୧୮ ଆମ୍ବାଆସି ତଲୁ ଦାପିଆହାଁ ହାଟକି ଆହାମାନେସି ? ଏଞ୍ଜାସି ତଲୁ ଦାପି ଆଡ଼ି ସିନାତି ତଲୁଆପେସି; ଆମ୍ବାଆସି ତଲୁ ଦାପି ଆଆନା ହାଟକି ଆହାମାନେସି ? ଏଞ୍ଜାସି ତଲୁ ଦାପି ଆଆପେସି □

୧୯ ତଲୁ ଦାପି ଆନାୟି କି ଆଆଗାଟାୟି କାଜା କାତା ଆଏ, ସାମା ମାହାପୁରୁ ହୁକୁମି ମାନୁଞ୍ଜି ଆନାୟି କାଜା କାତା □

୨୦ ବାରେ ଜାଣାଇଁ ଏନିକିଁ ମାହାପୁରୁ ହାଟାମାନେସି ଏଲେକିଁ ମାଣ୍ଡେସି □

୨୧ ମୀରୁ ହଲିୟାଜା ଆହାମାଟାଟି ହାଟକି ଆହାମାଞ୍ଜେରି ? ଅଣ୍ପାଆଦୁ; ସାମା ଗେଲପିଆୟାଲି ଆଡ଼ିଦେରି ଆଡ଼ିହିଁ ଗେଲପି ଆୟାଲି ପାରୁ ପାରାଦୁ □

୨୨ ଆତ୍ମାଆସି ହଲେଏସି ଆହ୍ନା ପ୍ରବୁ ତାଣା ହାଟ୍‌କି ଆହାମାନେସି, ଏଞ୍ଜାସି ପ୍ରବୁତି ଗେଲ୍‌ପି ଆଡାସି; ଏଲେକିହିଁଏ ଆତ୍ମାଆସି ଗେଲ୍‌ପିଆହ୍ନା ହାଟ୍‌କି ଆହାମାନେସି ଏଞ୍ଜାସି କ୍ରୀସ୍ତତି ହଲେଏସି □

୨୩ ମୀରୁ ହାରେକା ଦାରାତଲେ କଡ଼୍‌ଝି ଆହାମାଞ୍ଜେରି; ମାଣସିୟାଁତି ହଲିୟାଙ୍ଗାତେରି ଆଆଦୁ □

୨୪ ତାୟିୟାଁ ଅଡ଼େ ତାଙ୍ଗିୟାତେରି, ମାହାପୁରୁ ମିଙ୍ଗେ ହାଟାତାଟି ମୀରୁ ଏନିକିଁ ମାରେରି ଏଲେଆହିଁଏ ମାହାପୁରୁ ତଲେ ଡ଼ୟିନାୟି ମାନେ □

**ବୀହା ଆଆତି ଲକୁ ଇଞ୍ଜା ରାଣ୍ଡେଣିସିକା କାତା**

୨୫ ଡାଆସିକା କାତା, ନାନୁ ପ୍ରବୁ ତାଣାଟି ଏନି ହୁକୁମି ବେଟା ଆହାହିଲଅଁ; ସାମା ପ୍ରବୁତି କାର୍ମାଟି ନାମୁଗାଟାସି ଆହାନା ନା ଅଣ୍‌ପୁତା ଝେସିମାଞ୍ଜାଇ □

୨୬ ନାନୁ ଅଣ୍‌ପିମାଇଁ, ମାଣସି ଏନିକିଁ ମାନେସି, ନୀଏଁତି କସ୍ତ ବାଦା ତାକି ଏଲେକିହିଁଏ ମାନାୟି ନେହେଁ □

୨୭ ନାନୁ ତକ୍ତି ତଲେ ଦସ୍‌ପି ଆହାମାଞ୍ଜି ? ଆତିହିଁ ପିସ୍‌ପି ଆହାଲି ଅଣ୍‌ପାଆନି, ଇଞ୍ଜା ନାନୁ ତକ୍ତି ତାଣାଟି ପିସ୍‌ପି ଆହାମାଞ୍ଜି ? ଆତିହିଁ ତକ୍ତିନି ଇଟାଲି ଅଣ୍‌ପାଆନି □

୨୮ ସାମା ନାନୁ ବୀହା ଆହାମାଞ୍ଜି, ଆଡ଼ିଜିକେଏ ପାପୁ କିହାହିଲଅତି; ଅଡ଼େ ଡାଆପଦା ବୀହା ଆହାମାନେ, ଆଡ଼ିଜିକେଏ ଏଡ଼ି ପାପୁ କିହାହିଲେଏ, ଆଡ଼ିଜିକେଏ ଇଲେତି ଲକୁ ଆଙ୍ଗାତା ହାରେକା କସ୍ତ ବେଟାଆନୁ, ଅଡ଼େ ମୀରୁ ଏମ୍‌ପାଟି ଏନିକିଁ ଗେଲ୍‌ପି ଆଡେରି ଇଦି ନା ଅଣ୍‌ପୁ □

୨୯ ସାମା ଏ ତାୟିୟାଁ ଅଡ଼େ ତାଙ୍ଗିୟାତେରି ନା ଅଣ୍‌ପୁ ଇଦି, ଦିନା ତାଗେ ଏଦାତେୟିଏ, ଏଦାଆଁତାକି ଆତ୍ମାଆରାକି ତକ୍ତି ମାନେ, ଏଞ୍ଜାସି ତକ୍ତି ହିଲାଆଲେହେଁ ମାଣ୍‌ମେସି □

୩୦ ଅଡ଼େ ଆତ୍ମାଆରି ଡ଼ାହି ମାନେରି, ଏଞ୍ଜାରି ଡ଼ାହି ହିଲାଆ ଲକୁ ଲେହେଁ ଆପେରି; ଅଡ଼େ ଆତ୍ମାଆରି ରାହ୍ନା କିହିମାନେରି, ଏଞ୍ଜାରି ରାହ୍ନା କିହି ହିଲାଆ ଲକୁ ଲେହେଁ ଆପେରି; ଇଞ୍ଜା ଆତ୍ମାଆରି କଡ଼ିନେରି ଏଞ୍ଜାରି ଅଦିକାରା ବେଟାଆଆତି ଲେହେଁ ଆପେରି;

୩୧ ଅଡ଼େ ଆମ୍ବାଆରି ଦାରତ୍ତି ଦିଶ୍ଵୁ ଲେନ୍ଦିମାନେରି ଏଞ୍ଜାରି ଲେନ୍ଦାଆଗାଟି ଲକୁ ଲେହେଁ ଆପେରି; ଏନାଆଁତାକି ଇତିହୁଁ ଇ ଦାରତ୍ତିତ ଖାଣା ତିରିମ୍ବୁହି ମାନେ □

୩୨ ସାମା ମୀରୁ ଏନିକିଁ ଅଶ୍ଵପଅତେରି ଏଡ଼ି ନା ଅଶ୍ଵପୁ, ଆମ୍ବାଆସି ବୀହା ଆଆତାସି ଏଞ୍ଜାସି ଏନିକିଁ ପ୍ରବୁଇଁ ରାହାଁ କିଞ୍ଜିକହାଲି ଖାରଇ ପ୍ରବୁତି କାମା ଅଶ୍ଵପିନେସି;

୩୩ ସାମା ଆମ୍ବାଆସି ବୀହା ଆହାମାନେସି ଏଞ୍ଜାସି ଏନିକିଁ ତାନି ତକ୍ତିନି ରାହାଁ ଗାଟାସି ଆନେସି, ଏଦାଆଁତାକି ଦାରତ୍ତିତ କାତା ଅଶ୍ଵପିନେସି ଇଞ୍ଜା ତାନି ମନ ବାଗା ଆନେ □

୩୪ ବୀହା ଆଆତି ଇୟାସିକା ଅଡ଼େ ଡାଆସିକା ଆଜ୍ଞା ଇଞ୍ଜା ଜୀଞ୍ଜୁତା ସୁଦୁ ଆହାଲି ପ୍ରବୁତି କାତା ଆସାନା ଅଶ୍ଵପିନୁ; ସାମା ଆମ୍ବାଆୟି ବୀହା ଆହାମାନେ ଏଡ଼ି ଏନିକିଁ ଜାହାରା ତକ୍ତାଇଁ ରାହାଁ କିୟାଲି ଆଡ଼ିନେ, ଏଦାଆଁତାକି ଦାରତ୍ତିତ କାତା ଅଶ୍ଵପିନେ □

୩୫ ଇ କାତା ନାନୁ ମୀ ନେହେଁତାକି ଖେସିମାଞ୍ଜାଇଁ, ମିଙ୍ଗେ କସ୍ତ ହାନି ମେରା ତଲେ ଦସ୍ପି ଆହାଲି ଖେସିମାଞ୍ଜଅଁ, ସାମା ମୀରୁ ଏନିକିଁ ମାନି କିହାଁ ରଣ୍ଡିଏ ମନତଲେ ପ୍ରବୁ ତାଣା ତୟିଦେରି, ଏଦାଆଁତାକି ଖେସିମାଞ୍ଜାଇଁ □

୩୬ ସାମା, ଆମ୍ବାଆସି ତାଙ୍ଗେତାକି ରୀସ୍ପଆଡ଼ି ମାଙ୍ଗାନି ଡାଆବେଲା ରାଡ଼େୟିଏ ଇଞ୍ଜାଁ ଅଶ୍ଵପିନେସି, ଅଡ଼େ ଏଞ୍ଜାସି ମୁର୍ସାନା ମାଞ୍ଜାଲି ଆଡାଆସାରେ ଅଡ଼େ ତାଙ୍ଗେ ଲଡାଆନେ ଆତିହୁଁ ତାନି ମନତା ଏନାୟି ମାନେ ଏଲେଆହୁଁ ବୀହା ଆନାୟି ମାନେ, ଏମ୍ବାଆଁ ପାପୁ ହିଲେଏ, ଏଦାଆଁତାକି ଏଞ୍ଜି ବୀହା ଆପୁ □

୩୭ ସାମା ଆମ୍ବାଆସି ହିୟାତା ତୀରି ମାନେସି, ଅଡ଼େ ବୀହା ଆହାଲି ମନ କିଅସି ଇଞ୍ଜା ଆମ୍ବାଆସି ତାନି ମନତି ଲକହାଲି ଆଡ଼ିନେସି ଅଡ଼େ ଏଞ୍ଜାସି ତାନି ମନତା ଏନାଆଁ କିହାଲି ଅଶ୍ଵପାମାନେସି ଆତିହୁଁ ଏଞ୍ଜାସି ତାଙ୍ଗେ ରୀସାମାନି ଡାଆ ପଦାଇଁ ବୀହା ଆଆତାଁ ନେହେଁ □

୩୮ ଏଦାଆଁତାକି ଆମ୍ବାଆସି ତାଙ୍ଗେ ରୀସାମାନି ଡାଆ ମାଙ୍ଗାନି ବୀହା କିନେସି ଏଞ୍ଜାସି ନେହୁଁ କିନେସି, ଅଡ଼େ ଆମ୍ବାଆସି ବୀହା ଆଅସି ଏଞ୍ଜାସି ଏଦାଆଁ କିହାଁ ହାରେକା ନେହୁଁ କିନେସି □

୩୯ ବୀହା ଆଡ଼ି ଡକ୍ରି ତାନି ଡକ୍ତା ଜୀଝୁ ମାନି ପାତେକା ଦସ୍ପି ଆହା ଡ଼ିନେନେ; ସାମା ଡକ୍ତା ହାଡ଼ିସାରେ ଏ ଡକ୍ରି କ୍ରୀସ୍ତ ତାଣା ନାମାମାନି ଆମ୍ବାଆରାଇଁ ମନ ଏଝାଣାକି ବୀହା ଆୟାଲି ଆଡ଼ିନେ □

୪୦ ସାମା ନା ଅଣ୍ପୁତା, ଏଡ଼ି ଏନିକିଁ ମାନେ ଏଲେକିହିଁ ଏ ଡ଼ିନିତିହିଁ ହାରେକା ରାହାଁତଲେ ଡ଼ିନେନେ, ଇଦି ମାହାପୁରୁ ଜୀଝୁତି ହେଲ ଇଞ୍ଜିଁ ନାନୁ ଅଣ୍ପିମାଇଁ □

## ୮

ପେଣ୍ଡକା ବମାୟାକି ଡାକାମାନି ରାନ୍ଦାତି କାତା

୧ ପେଣ୍ଡକା ବମାୟାକି ଡାକାମାନି ବଗୁଡ଼ି କାତା ନାନୁ ଝେହ୍ନାୟି ଇଦି, “ବାରେତାକି ବୁଦି ମାନେ” ଇଞ୍ଜିଁ ମୀରୁ ଝେସିମାଞ୍ଜେରି, ଏଦାଆଁ ମାମ୍ବୁ ପୁଞ୍ଜାମାନମି □ ବୁଦି ତାହାରା କିଝିକିୟାନେ, ସାମା ଜୀଝୁନନାୟି କାଲ୍ଡି କିୟାନେ □

୨ ଆମ୍ବାଆସି ଏନି କାତାତା ଜିକେଏ ନାନୁ ପୁଞ୍ଜାମାଇଁ ଇଞ୍ଜିଁ ଅଣ୍ପିନେସି, ଆତିହିଁ ଏଝାଣାକି ଏନିକିଁ ପୁନାୟିମାନେ, ଏଝାସି ନୀର୍ବି ପାତେକା ଏଲେକିଁ ପୁଞ୍ଜାହିଲଅସି □

୩ ସାମା ଆମ୍ବାଆସି ମାହାପୁରୁଇଁ ଜୀଝୁ ନନେସି, ଏଝାଣାଇଁ ମାହାପୁରୁ ପୁଞ୍ଜାମାନେସି □

୪ ଏଦାଆଁତାକି ପେଣ୍ଡକା ବମାୟାକି ଡାକାମାନି ବଗୁଡ଼ି ତିନି କାତା ମାର ପୁଞ୍ଜାମାନାୟି, ଦାର୍ଡିତା ପେଣ୍ଡକା ଇଞ୍ଜିହିଁ ଏନାଇ ହିଲାଡ, ଅଡେ ରଣ୍ଡିଏ ମାହାପୁରୁ ପିସପେ ଅଡେ ରଅସି ହିଲଅସି □

୫ ଇତିହିଁ ଲାକପୁରୁ ଆପେ କି ଦାର୍ଡିତା ଆପେ, ଆମ୍ବାଆରାଇଁ ମାହାପୁରୁ ଇନେରି, ପେଣ୍ଡକା ମାତିହିଁ ଜିକେଏ ସାତେଏ ହାରେକା “ପେଣ୍ଡକା” ଅଡେ ହାରେକା “ପ୍ରବୁୟା” ମାନୁ,

୬ ଆଡ଼ିଜିକେଏ ମାଙ୍ଗେତାକି ରଣ୍ଡିଏ ମାହାପୁରୁ ଇତିହିଁ ଏ ଆବା ତାଣାଟି ବାରେ ଗାଡ଼ି ଆହାମାନେ, ଇଞ୍ଜା ମାର ଏଝାଣି ତାକି ନୀତାମାନାୟି; ଇଞ୍ଜା ରଣ୍ଡିଏ ପ୍ରବୁ ଇତିହିଁ ଜୀସୁ କ୍ରୀସ୍ତ, ଏଝାଣି ତାଣାଟି ବାରେ ଗାଡ଼ି ଆହାମାନେ, ଅଡେ ମାର ଏଝାଣି ତାଣାଟି ନୀତାମାନାୟି □

୭ ଆଡ଼ିଜିକେଏ ବାରେତାକି ଇ ବୁଦି ହିଲେଏ; ସାମା ଏଚେକା ଲକୁ ନୀଏଁ ପାତେକା ପେଶକା ମାନୁ ଇଞ୍ଜି ଅଶ୍‌ପାନା ପେଶକା ବମାୟାକି ଡାକାମାନି ବଗୁ ତିନେରି, ଇଞ୍ଜା ଏଞ୍ଜାରି ଅଶ୍‌ପୁତି ବାଡ଼ୁ ଉଣା ମାନାକି ଦହଗାଗାରି ଆନେରି □

୮ ସାମା ତାନି ରାନ୍ଦା ମାଜେ ମାହାପୁରୁ ନକିତା ନେହୁଁ କି ଲାଗେଏ କିୟେଏ; ତିନାଆତିହୁଁ ମା ଏନାୟି ନସ୍ତୁ ଆଏ ଅଡ଼େ ତିତି ସାରେ ମାଜେ ଏନି ଲାବା ଆଏ □

୯ ସାମା ଜାଗ୍ରାତା, ନଲେ ମୀ ତାଣା ମାନି ଅଦିକାରା ନାମୁତା ବାଡ଼ୁ ହିଲାଆ ଗାଟାରାକି କସ୍ତୁ ବାଦା ହାନାୟି ଆନେ □

୧୦ ବୁଦି ଗାଟାତେରି ମୀରୁ, ମିଜେ ଆମ୍ବାଆସି ପେନୁତି ଦେଖୁତି ବକିତା କୁଗାମାନାଣି ମେସ୍ତାତିହୁଁ, ଏଞ୍ଜାସି ନାମୁତା ଉଣା ମାତିହୁଁ, ତାନି ଅଶ୍‌ପୁତି ବାଡ଼ୁ ଉଣା ମାନାକି ପେଶକା ବମାୟାକି ଡାକାମାନି ବଗୁ ତିଞ୍ଜାଲି ସାସା ଆଅସି କି ?

୧୧ ଇଞ୍ଜା ଆମିନି ବାଡ଼ୁ ହିଲାଆ ନାମିତି ତାୟି କି ତାଜି ତାକି କ୍ରୀସ୍ତ ହାଡେସି, ଏଞ୍ଜାସି ନୀ ଏ “ବୁଦି” ତଲେ ନାସା ଆହିମାନେସି □

୧୨ ଇଲେକିହୁଁ ମୀ ତାଣା ମାନି ନାମିତି ତାୟିୟା କପାଟି ପାପୁ କିହାଁ ଇଞ୍ଜା ଏଞ୍ଜାରି ବାଡ଼ୁ ହିଲାଆ ଅଶ୍‌ପୁତି କସ୍ତୁ ହୀହାନା ମୀ କ୍ରୀସ୍ତା କପାଟି ପାପୁ କିହିମାଞ୍ଜେରି □

୧୩ ଇଦାଆଁତାକି ତିନି କାଦି ନା ତାୟିକି କସ୍ତୁ ହନେ, ଆତିହୁଁ ନା ତାୟି ଏନିକି ନା ତାଣାଟି କସ୍ତୁ ଆଅସି, ଏଦାଆଁତାକି ନାନୁ ଏଚେଲା ଉଞ୍ଜା ତିନଅଁ □



### ପାଣ୍ଡୁ ଆଡ଼ାରି ଅଦିକାରା ଅଡ଼େ ଦାୟିପତି

୧ ନାନୁ ନା ମନତଲେ ମାଞ୍ଜାଲି ଆଡ଼ଅଁ ? ନାନୁ ର ପାଣ୍ଡୁ ଆଡ଼ାତେଏଁ ଆଏ ? ନାନୁ ଏନାଆଁ ମା ପ୍ରବୁ ଜୀସୁଇ ମେସାହିଲଅଁ ? ମୀରୁ କି ମାହାପୁରୁ ତାଣା ନା କିତି କାମାତି ପାଡ଼େୟି ଆଏ ?

୨ ନାନୁ ଏଟକାତାରି ତାଣା ପାଣ୍ଡୁ ଆହାହିଲାଆତି ଜିକେଏ, ମିଜେତାକି ନାନୁ ସାତେଏ ପାଣ୍ଡୁ ଆହାମାନାତେଏଁ, ଇତିହୁଁ ପ୍ରବୁ

ତାଣା ମୀରୁ ନା ପାଶୁଣ୍ଡିଆହାମାନି ପାଣାତା ଝେଟାମାନି ବୁଟୁ ମୁଦ୍ରା  
ଲେହେଁ ଆହାମାଞ୍ଜେରି □

୩ ନାଞ୍ଜେ ନାହାଁୟି କିୟାନାରିକି ନାନୁ ଝେଣ୍ଡେ ଝେସ୍ତାନି କାତା ଇଦି  
□

୪ ନା କାମାତାକି ତିଞ୍ଜା ଉଣ୍ଡାଲି ମାଞ୍ଜେ ଅଦିକାରା ହିଲେଏ ?

୫ ଅର ପାଶୁଣ୍ଡି ଆହାମାନାରି ପ୍ରବୁତି ତାୟିୟାଁ ଅଡେ କେପା\*  
ଲେହେଁ କ୍ରୀସ୍ତାନା ତାଞ୍ଜିନି ବାହା ଆହାଁ ଏ ଇୟାନି ତଲେ ରେଜାଲି  
ମାଞ୍ଜେ ଅଦିକାରା ହିଲେଏ କି ?

୬ ଅଡେ ଜୀଞ୍ଜୁତା ନୀତାଲିତାକି କାମାତି ପିସାଲି ନାଞ୍ଜେ ଅଡେ  
ବର୍ନବାତି ଅଦିକାରା ହିଲେଏ କି ?

୭ ର ଜୁଜୁ କିନାସି ଜୁଜୁତା ମାନି ବେଲା ତାନୁଏ ତାଞ୍ଜେତାକି କାରୁଁ  
କିନେସିକି ? ଇଞ୍ଜା ଆମ୍ବାଆସି ଅଞ୍ଜୁରି ବାଡ଼ା କିହାଁ ଏମ୍ବାତି ପାଡେୟି  
ତିନଅସି କି ? ଇଞ୍ଜା ର ଗଡ଼ ତୁତାନି ମାନ୍ଦାତି ପାଲୁ ଗହଅସି କି ?

୮ ନାନୁ ମାଣସି ଆହାଁ ଇ ବାରେ କାତା ଝେସିମାଞ୍ଜାଈ ? ଇଞ୍ଜା  
ସାସ୍ତେରି ଜିକେଏ ଇ ବାରେ କାତା ଝେସିମାଞ୍ଜେଏ କି ?

୯ ✨ଇଚିହଁ ମସାତି ମେରାତା ଇଲେଇଞ୍ଜିଁ ରାସ୍ତକି ଆହାମାନେ,  
“ନପର୍ ମାନି କଡ଼ିତି ଗୁତିତା କଡ଼ା ଦହଆଦୁ,” ମାହାପୁରୁ ଝାରଇ ଏ  
କଡ଼ିତି ଅଣ୍ଡପିମାନେସି କି ?

୧୦ ଏଞ୍ଜାସି ଇଦାଆଁ ମାଞ୍ଜେତାକି ଝେସା ମାଞ୍ଜଅସି ? ହାଅ,  
ମାଞ୍ଜେତାକି ଇଦି ରାସ୍ତକି ଆହାମାନେ, ଏନାଆଁତାକି ଇଚିହଁ  
ଆମ୍ବାଆସି ତାସା କିନେସି ଆସା ତଲେ ତାସା କିନାୟିମାନେ, ଅଡେ  
ନପର୍ ନାସି ଗାତି ବାଗା ବେଟାଆହାଲି କଡ଼ା ଦହନେସି □

୧୧ ମାମ୍ବୁ ମିଞ୍ଜେତାକି ନେହଁ ଜୀଞ୍ଜୁତି ବିଚା ମାଟା ମାଟାମାନମି,  
ଅଡେ ମୀ ତାଣାଟି ଇ ଦାରତିତି ତାସା ଦାଡ଼ିହଁ ଏଦି ଏନ୍ଦି କାଜା  
କାତା ଆଏକି ?

୧୨ ଏଟକା ଲକୁଁ ମୀ ତାଣାଟି ବାଗା ବେଟାଆହାଲି ଅଦିକାରା  
ମାତିହଁ, ଏଦାଆଁ କିହାଁ ଆଗାଡ଼ା ବେଟାଆହାଲି ମା ଅଦିକାରା  
ହିଲେଏ କି ? ଆଡ଼ିଜିକେଏ ମାମ୍ବୁଏ ଅଦିକାରା ଲେମ୍ବା ହିଲଅମି

\* ୯:୫ ୯:୫ ପିତର ☆ ୯:୯ ୯:୯ ଚିତମ ୫:୧୮

□ ସାମା ଏନିକ୍ ମାମ୍ବୁ କ୍ରୀସ୍ତତି ନେହ୍ କାରୁ ଝେକ୍ କିନି କାମାତା ଏନି ବାଡ଼ା ଝାଆପେ ଇଞ୍ଜି ବାରେ ଅରୁହିମାନମି

୧୩ ଆମ୍ବାଆରି ଦେଖୁଡ଼ିତା ପୂଜା କିନାରି ଏଝାରି ଦେଖୁଡ଼ିତି ରାନ୍ଦା ବେଟାଆନେରି, ଇଞ୍ଜା ଆମ୍ବାଆରି ପୂଜା କିନାରି ପୂଜା କିହାଲି ପୂଜା ପିଣ୍ଡାତା ଇଚିତି ବଗୁତି ବାଗା ବେଟାଆନେରି, ଇଞ୍ଜି ମୀରୁ ପୁଞ୍ଜାହିଲଅତେରି କି ?

୧୪ ☆ଏଲେକିହ୍ ଏ ଆମ୍ବାଆରି ନେହ୍ କାରୁତି ଝେକ୍ ହି ମାନେରି, ଏଝାରି ନେହ୍ କାରୁ ଝେକ୍ ନି ତାଣାଟିଏ ନୀତିନେରି, ଇ କାତା ପ୍ରବୁ ହୁକୁମି ହୀହାମାନେସି □

୧୫ ସାମା ନାନୁ ଇ ବାରେ ଏନାଆଁଝା ଲେମ୍ବାହିଲଅଁ, ଅଡ଼େ ନାଞେତାକି ଏଲେ କିଝିଆଡ଼େ, ଏଡ଼ାଆଁତାକି ରାଡ଼ିମାଞ୍ଜଅଁ; ଇଚିହ୍ ଆମ୍ବାଆରି ନା ନେହ୍ ବତପଣତି ଉଜେଏ କିନି କିହାଁ ନାନୁ ହାହାହାନାୟି ନେହ୍ □

୧୬ ଇଚିହ୍ ନାନୁ ନେହ୍ କାରୁ ଝେକ୍ ଇ, ଏମ୍ବାଆଁ ନା ବତପଣ ଆନାୟି ହିଲେଏ, ଏନାଆଁତାକି ଇଚିହ୍ ଏଡ଼ାଆଁ କିହାଲି ହୁକୁମି ବେଟାଆହାମାଈ, ଇଞ୍ଜା ନାନୁ ନେହ୍ କାରୁ ଝେକ୍ ଆତେଏଁ ଇଚିହ୍ ନାନୁ ଏତେକା ତଣ୍ଡ ବେଟାଆନାତେଏଁ □

୧୭ ଇଚିହ୍ ନାନୁ ଜାହାରା ମନତଲେ ଇ କାମା କିଈ, ଆତିହ୍ ନାଞେତାକି ଦାନା ମାନେ; ସାମା ନାନୁ ନା ମନତଲେ କାମା କିଆତିହ୍ ଜିକେଏ ମାହାପୁରୁ ନାଞେ ସେବାକିନି କାମାତି ବନ୍ତୁ ହେର୍ପା ମାଞ୍ଜାନେସି □

୧୮ ଆତିହ୍ ନା ଦାନା ଏନାୟି ? ଏଦି ଇଦି ନାନୁ ନା ନେହ୍ କାରୁତା ମାନି ଅଦିକାରା ଲେମ୍ବାଆନା ନେହ୍ କାରୁ ଝେସି ଝେସି ଏ ନେହ୍ କାରୁତି ଉଜେଏ ଝେକ୍ ଇ □

୧୯ ନାନୁ ଆମ୍ବାଆରି ହଲେଏଣା ଆଆତି ଜିକେଏ, ଏନିକ୍ ନାନୁ ହାରେକା ଗାତି ଲକୁଣି ବେଟାଆହାଲି ଆଡ଼ିଈ, ଏଡ଼ାଆଁତାକି ନାନୁ ଜାହାରାଈ ବାରେତି ହଲେଏସି କିତେଏଁ □

☆ ୯:୧୪ ୯:୧୪ ମାତି ୧୦:୧୦; ଲୁକ ୧୦:୭



୨୦ ଏନିକିଁ ନାନୁ ଜୀହୁଦିୟାଣି କ୍ରୀସ୍ତ ତାକି ଜୀଣା ଆହାଲି ଆଡ଼ିଇଁ, ଏଦାଆଁତାକି ଜୀହୁଦି ଲକ୍ଷୁ ନକିତା ନାନୁ ଜୀହୁଦି ଲେହେଁ ଆହିମାଇଁ; ଏନିକିଁ ମସାତି ମେରାତା ଦସ୍ପି ଆହାମାନାରାଇଁ ଜୀଣା ଆହାଲି ଆଡ଼ିଇଁ, ଏଦାଆଁତାକି ନାନୁ ମେରାତା ଦସ୍ପି ଆଆତି ଜିକେଏ ମେରାତା ଦସ୍ପି ଆଡ଼ି ଲକ୍ଷୁଲେହେଁ ଆଡେତଏଁ □

୨୧ ଏନିକିଁ ନାନୁ ମସାତି ମେରା ପୁନାଆତି ଏଟକା କୃଡାତି ଲକ୍ଷୁଣି ବେଟାଆହାଲି ଆଡ଼ିଇଁ, ଇଦାଆଁତାକି ନାନୁ ମାହାପୁରୁତି ମେରାତା ହିଲାଆ ଲକ୍ଷୁ ଆଆନା କ୍ରୀସ୍ତତି ମେରା ମାନୁଡ଼ି ଆଡ଼ିଜିକେଏ ମସାତି ମେରାତା ହିଲାଆ ଲକ୍ଷୁ ନକିତା ମସାତି ମେରାତା ହିଲାଆ ଲକ୍ଷୁଲେହେଁ ଆଡେତଏଁ □

୨୨ ଏନିକିଁ ନାନୁ ବାଡ଼ୁୟୁ ହିଲାଆଗାଟାରାଇଁ ଜୀଣା ଆହାଲି ଆଡ଼ିଇଁ, ଏଦାଆଁତାକି ବାଡ଼ୁୟୁ ହିଲାଆ ଗାଟାରି ନକିତା ବାଡ଼ୁୟୁ ହିଲାଆଲେହେଁ ଆଡେତଏଁ; ଏନିକିଁହଁ ଜିକେଏ ନାନୁ ଏଚର ଜାଣାଇଁ ଗେଲ୍ପାଲି ଆଡ଼ିଇଁ, ଇଦାଆଁତାକି ବାରେ ଲକ୍ଷୁ ଏନିଲେହେଁତାରି ନାନୁ ଏଞ୍ଜାରିଲେହେଁ ଆଡେତଏଁ □

୨୩ ନାନୁ ଏନିକିଁ ନେହଁ କାରୁତି ବରତା ଆଣ୍ଟାଲି ଆଡ଼ିଇଁ, ଏଦାଆଁତାକି ନାନୁ ନେହଁ କାରୁତାକି ବାରେ କିଇଁ □

୨୪ ଆମ୍ବାଆରି କାହିନି ତାଣା ହଣ୍ଡନେରି ଏଞ୍ଜାରି ବାରେଜାଣା ହଣ୍ଡନେରି ସାତା, ସାମା ରଅସିଏ ଜୀଣା ଆହଁ ଦାନା ବେଟା ଆଡେନସି, ଇଦାଆଁ ମୀରୁ ପୁଞ୍ଜାହିଲଅତେରି ? ମୀରୁ ଏନିକିଁ ଦାନା ବେଟାଆଡେଦରି ଏଦାଆଁତାକି ଏଲେକିଁ ହଣ୍ଡୁ □

୨୫ ଆମ୍ବାଆସି ବାଦୁହାରା ତଲେ କାହିନି ତାଣା ଆଣ୍ଟିନେସି ଏଞ୍ଜାସି ବାରେ ନେହଁକିଁ ଜାପିନେସି; ଏଞ୍ଜାରି ଗାଡ଼େକେଏ ନାସଡ଼ି ଆନି ଟପେରି ବେଟାଆହାଲି କାହିମାନେରି; ସାମା ମୀରୁ ଏତେଲାଞ୍ଜା ନାସା ଆଆଗାଟି ଟପେରି ବେଟାଆହାଲି ଏଲେ କିନ □

୨୬ ଏଦାଆଁତାକି ନାନୁ ହଟିମାଇଁ, ସାମା ଗୁରି ହିଲାଆ ତାଣା ଆଏ, ନାନୁ ମୁଟିତଲେ କୁଡ଼କି ଆନି ଜୁଡୁ କିହିମାଇଁ, ସାମା ଞ୍ଜାରଇ ଗାଲିତି ଝେନି ଲକ୍ଷୁଲେହେଁ ଆଏ □

୨୭ ଏଟକା ଲକ୍ଷୁତାଣା ନେହଁ କାରୁ ଝେସିହଁ ନାନୁ ଏନିକିଁ

ଅପାଆ ଗାଗାତେଏଁ ଆଥୁଁ ଏଦାଆଁତାକି ନା ଆଜ୍ଞାତି କସ୍ତ ବାଦା ହୀହାନା ଲକ୍ଷିମାଙ୍କୁ □

## ୧୦

ପେଶ୍‌କା ବମାୟାଁ ସେବାଟି ଜାଗ୍ରାତା କିନାୟି

<sup>୧</sup> ଇତିହୁଁ ଏ ତାୟିୟାଁ ଅଡ଼େ ତାଜିସ୍‌ମାତେରି ମା ଆକୁ ଆବାୟାଁ ବାରେ ଦୁହା ଡ଼ଇକା ମାତେରି □

<sup>୨</sup> ଅଡ଼େ ବାରେଜାଣା ସାମ୍‌ଦୁରି ବିତ୍ରାଟି ହାଚେରି, ଇଞ୍ଜା ବାରେଜାଣା ଦୁହା ଅଡ଼େ ସାମ୍‌ଦୁରିତା ମସା ତାଣାଟି ବାପ୍‌ସ୍‌ସ୍‌\* ଅଡ଼େରି □

<sup>୩</sup> ଅଡ଼େ ଏଞ୍ଜାରି ବାରେଜାଣା ରଣ୍ଡିଏ ଜୀଞ୍ଜୁତି ରାନ୍ଦା ତିଚେରି □

<sup>୪</sup> ଅଡ଼େ ବାରେଜାଣା ରଣ୍ଡିଏ ମାହାପୁରୁ ହୀତି ଜୀଞ୍ଜୁତି ଏୟୁ ଗସ୍‌ସେରି, ଇତିହୁଁ ଏଞ୍ଜାରିତଲେ ହାଜିମାଟି ମାହାପୁରୁ ହୀତି ଜୀଞ୍ଜୁତି ପାକା ଖାଲିତି ଏୟୁ ଗସ୍‌ସେରି ଏ ପାକା ଖାଲି କ୍ରୀସ୍ତ,

<sup>୫</sup> ଆଡ଼ିଜିକେଏ ଏଞ୍ଜାରି ବିତ୍ରାଟି ହାରେକା ଲକୁତାଣା ମାହାପୁରୁତି ରାହାଁ ହିଲାଆତେ, ଇଞ୍ଜା ଏଞ୍ଜାରି ଲକୁ ହିଲାଆ ଗାୟୁତା ହାହାହାଚେରି, ଇ ବାରେ କାତା ମୀରୁ ପୁନାଆନା ମାଞ୍ଜୁ ଇଞ୍ଜୁଁ ନା ମନ ହିଲେଏ □

<sup>୬</sup> ଏଞ୍ଜାରି ଏନିକ୍‌ ଲାଗେଏ ପଲେଏତାଣି ତାକି ଜୁପକା ଆହାମାଚେରି, ଏଲେକ୍‌ ମାର ଏଲେତି ଜୁପକା ଆଆୟି, ଏଦାଣିତାକି ଇ ବାରେ କାତା ମାଜେତାକି ପୁଶ୍‌ମ୍‌କିନାୟି ଆହାମାନେ □

<sup>୭</sup> ଏନିକ୍‌ ଏଞ୍ଜାରି ବିତ୍ରାଟି ଏତରଜାଣା ପେଶ୍‌କା ପୂଜା କିନାରି ଆଡ଼େରି, ଏଲେକ୍‌ ମୀରୁ ପେଶ୍‌କା ପୂଜା କିନାଚେରି ଆଆଦୁ; ଏନିକ୍‌ ରାସ୍‌କି ଆହାମାନେ, “ଲକୁ ତିଞ୍ଜା ଉଣ୍ଡାଲି କୁରିଚେରି, ଅଡ଼େ ଏନିହୁଁ ରାହାଁ କିହାଲି ନିଜିଚେରି □”

<sup>୮</sup> ଏନିକ୍‌ ଏଞ୍ଜାରିତାଣା ଏତରଜାଣା ଦାରିକାମା କିହାନା ରଣ୍ଡିଏ ନେରୁ କଡ଼େ ତାନି ମାଣା ଲକୁ ହାଚେରି, ଏଲେକ୍‌ ମାର ଦାରିକାମା କିଆପ □

\* ୧୦:୨ ୧୦:୨ମୁଞ୍ଜିନାୟି

୯ ଏନିକିଏ ଏଞ୍ଜାରି ବିଦ୍ରାପି ଏଚରଜାଣା ପ୍ରବୁଇଁ ତାୟିପାରି କିହାଁ  
ରାରୁ ତଲେ ହାଡ଼େରି, ଏଲେକିଏ ମାର ପ୍ରବୁଇଁ ତାୟିପାରି କିଆପି □

୧୦ ଏନିକିଏ ଏଞ୍ଜାରି ବିଦ୍ରାପି ଏଚରଜାଣା ବାଟା କିହାଲିଏ  
ନାସାକିନି ଦୂତୁ କେୟୁଟି ହାଡ଼େରି, ଏଲେକିଏ ମାରୁ ବାଟା କିଆଦୁ  
□

୧୧ ଈ ବାରେ ପୁଣ୍ଡିକିନିଲେହେଁ ଏଞ୍ଜାରାକି ଆଡେ, ଅଡେ  
ଆମ୍ବାଆରି ବେଲାତା ଜୁଗୁରାନ୍ଦି ଦିନା ଏଜିମାଞ୍ଜାନେ, ଏଲେକିହ  
ମାର ମା ସେଡନା ତାକି ଏ ବାରେ ରାସ୍ତକି ଆହାମାନେ □

୧୨ ଏଦାଆଁତାକି ଆମ୍ବାଆସି ନାନୁ ତୀରି ଗାଟାଦେଏଁ ଇଞ୍ଜିହ  
ଅଣ୍ଡି ମାନାସି, ଏଞ୍ଜାସି ଏନିକିଏ ତରଗଅସି, ଏଦାଆଁତାକି ଏଞ୍ଜାସି  
ଜାଗ୍ରାତା ଆପାସି □

୧୩ ମାଣ୍ଡିତାକି ଏନିଲେହେଁତି ତାୟିପାରି କିନାୟି କସ୍ତାଗାୟି  
ଆଏ, ଏଦାଆଁ ପିସ୍ପେ ମିଜେତାକି ଏଟକାତି ତାୟିପାରି କିନାୟି  
ଆହା ହିଲେଏ, ସାମା ମାହାପୁରୁ ଟିକାଣାତାସି, ଏଞ୍ଜାସି ମିଜେ ଏନି  
ଆଡାଆଗାଟି ତାୟିପାରି କିହାଲି ହିୟଅସି, ସାମା ମାରୁ ଏନିକିଏ  
ଅରହାଲି ଆଡିଦେରି, ଏଦାଆଁତାକି ତାୟିପାରି କିଖନିଏ ଏଞ୍ଜାସି  
ଗେଲ୍ପିନି ଜିରୁ ଜିକେଏ କେପିନେସି □

୧୪ ଏ ନା ଜାଞ୍ଜୁତି ତାୟିୟାଁ ଅଡେ ତାଜିସ୍ତାତେରି ପେଣ୍ଡାକା ବମାୟାଁ  
ପୂଜା କିନି ତାଣାଟି ଏଟକା ଆଦୁ □

୧୫ ନାନୁ ବୁଦିଗାଟି ଲକ୍ଷୁଣି ଝେହ୍ନିଲେହେଁ ଝେସିମାଞ୍ଜାଇଁ, ନାନୁ  
ଏଦାଆଁ ଝେସିମାଇଁ ଏଦାଆଁ ମାରୁ ମାରୁଏ ଅଣ୍ଡାଦୁ □

୧୬ \*ଆମିନି ପ୍ରବୁତି ବଜି ସଲା ତାକି ଜହରା କିନାୟି, ଏଡି କ୍ରୀସ୍ତତି  
ନେତେରିତା ଆଣ୍ଡିହଲେଏ ? ଆମିନି ରୁଟି ମାର ଡିକ୍‌ହି ମାନାୟି ଏଡି  
କି କ୍ରୀସ୍ତତି ଆଜ୍ଞାତା ଆଣ୍ଡିହଲେଏ ?

୧୭ ଇତିହ  
ରୁଟି ରଣ୍ଡିଏ ଆଡାକି ମାର ହାରେକା ଆଡିଜିକେଏ  
ରଣ୍ଡିଏ ଆଜ୍ଞା ଲେହେଁ, ଏଦାଆଁତାକି ମାର ବାରେଜାଣା ରଣ୍ଡିଏ ରୁଟିତି  
ବାଟା □

୧୮ ଆଜ୍ଞାତି ଜାର୍ନା ତଲେ ଆମ୍ବାଆରି ଇସ୍ତାୟେଲ ଲକ୍ଷୁ, ଏଞ୍ଜାରାଇଁ  
ସିନିକିଦୁ ଆମ୍ବାଆରି ପୂଜା କିତି ଉଜ୍ଞା ତିନେରି, ଏଞ୍ଜାରି ପୂଜା ପିଣ୍ଡାତି

☆ ୧୦:୧୭ ୧୦:୧୭ ମାତି ୨୭:୨୭-୨୮; ମାର୍କ ୧୪:୨୨-୨୪; ଲୁକ ୨୨:୧୯,୨୦

ପୂଜାତା ଆଣ୍ଡିହିଲଅରି ?

୧୯ ଆତିହିଁ ପେଶକା ବମାୟାଁ ବଗୁ ଇଞ୍ଜିହିଁ ଏନାୟି ମାନେ, ଅଡ଼େ ପେଶକା ବମାୟାଁ ଇଞ୍ଜିଁ ଏନାଇ ମାନୁ, ଏଦାଆଁ କି ନାନୁ ଝେସିମାଞ୍ଜାଇଁ ?

୨୦ ଆଏ, ସାମା ନାନୁ ଝେସିମାଞ୍ଜାଇଁ, ଏନାଆଁ ଜୀହୁଦିଆଆତାରି ପୂଜା କିନେରି ଏ ବାରେ ଏଞ୍ଜାରି ମାହାପୁରୁ ତାକି ପୂଜା କିଆନା ବୁଡୁୟାଁକି କିନେରି, ଅଡ଼େ ମୀରୁ ବୁଡୁୟାଁ ତଲେ ଆଣ୍ଡାନ୍ତୁ, ଇଦି ନା ମନ ଅଶ୍‌ପୁଟି ଆଏ □

୨୧ ମୀରୁ ପ୍ରବୁ ବଜିତା ରାସା ଗହନିତାଣା ଅଡ଼େ ବୁଡୁୟାଁ ଗହନିତାଣା ଗସାଲି ଆଡ଼ଅଡ଼େରି; ମୀରୁ ପ୍ରବୁତି ବଜି ଅଡ଼େ ବୁଡୁ ବଜିତା ଆଣ୍ଡାଲି ଆଡ଼ଅଡ଼େରି □

୨୨ ମାର ଏନାଆଁ ପ୍ରବୁଇଁ କାର୍‌ବି କିନାୟି ? ମାର କି ଏଞ୍ଜାଣି କିହାଁ ଗାତି ବାଡ଼ୁୟାଁ ଗାଟାତାୟି ?

୨୩ ବାରେ କିହାଲି ମାର ଆଡ଼ିନାୟି, ସାମା ବାରେ ମା ତାକି ନେହାୟି ଆଏ, ବାରେ କିହାଲି ଆଡ଼ିନାୟି, ସାମା ବାରେ ମା ତାକି ଲାବାଗାଟାୟି ଆଏ □

୨୪ ଆମ୍ବାଆସି ଜାହାରାତାକି ଅଶ୍‌ପାଆପେସି, ସାମା ବାରେଜାଣା ତାକି ନେହାଁଣି ଅଶ୍‌ପାପେସି □

୨୫ ମନୁତି ନେହିଁକିଁ ଇଟାଲି ହାଟା ବାଜାରାତା ପାର୍‌ପି ଆହିମାନି ଉଚ୍ଚା, ଆମ୍ବାଆରାଇଁ ଝେନାଆନା ଅଡ଼େ ଇଚାଣି ଅଶ୍‌ପାଆନା ତିଞ୍ଜୁ □

୨୬ ଦାମ୍‌ପତିତା ରାସ୍‌କି ଆହାମାନେ; “ଇତିହିଁ ଦାର୍‌ତି ଅଡ଼େ ଏମ୍ବାଆଁ ମାନାୟି ବାରେ ମାହାପୁରୁଞ୍ଜାୟି □”

୨୭ ନାମାଆତାରି ମିଙ୍ଗେ ତିଞ୍ଜାଲି ହାଟାତିହିଁ, ଇଞ୍ଜାଁ ମୀରୁ ହାଜାଲି ମନ କିତିସାରେ, ଅଡ଼େ ଏମ୍ବାଆଁ ଏନାଆଁ ତିଞ୍ଜାଲି ହାପ୍‌କିଆନେ, ମୀ ଅଶ୍‌ପୁ ତାକି ଇଚାଣି ଝେନାଆନା ତିଞ୍ଜୁ □

୨୮ ସାମା ଆମ୍ବାଆସି ମିଙ୍ଗେ ଏଲେଇଞ୍ଜାନେସି, ଇଦି ପେଶକା ବମାୟାଁକି ତାକି କିଞ୍ଜିଆହାମାନେ, ଆତିହିଁ ଏଞ୍ଜାଣି ତାକି ଇଞ୍ଜାଁ ମୀ ଅଶ୍‌ପୁ ତାକି ତିନାଆଦୁ;

୨୯ ମୀ ଅଣ୍ଠୁ ତାକି ଇଞ୍ଜିଁ ଖେସିମାଞ୍ଜିଅଁ, ସାମା ଏଞ୍ଜାଣି ଅଣ୍ଠୁ ତାକି □ ଏନାଆଁତାକି ନା ମନତଲେ ମାନାୟି ଏଟକା ଲକ୍ଷୁତି ନେହାଁଣି ଲାଗେଏତାଣି ପୁନାଣି ତଲେ ବିଚାରା ଆନେ ?

୩୦ “ନାନୁ ମାହାପୁରୁଇଁ ଜହରା କିହାନା ଆମିନି ରାନ୍ଦା ତିଞ୍ଜିମାଇଁ, ଏ ରାନ୍ଦା ତାକି ନାଞ୍ଜେ ଏନାଆଁତାକି ରଅସି ଲାଜାକିହିଁ ଜଲାନେସି ?”

୩୧ ଏଦାଆଁତାକି ମୀରୁ ତିଞ୍ଜୁ ଉଣ୍ଡୁ କି ଏନାଆଁ କିଦୁ, ଏଦାଆଁ ମାହାପୁରୁତି ଗାଞ୍ଜୁରମି ତାକି କିଦୁ □

୩୨ ଜୀହୁଦି ଆପେ, ଜୀହୁଦିଆଆତାରି, ଇଞ୍ଜା ମାହାପୁରୁତି କୁଲମିତି ଲକ୍ଷୁ ଆପାରି, ଆମ୍ବାଆରାକି କସୁ ହୀନାତେରି ଆଆଦୁ □

୩୩ ଏନିକିଁ ନାନୁ ଜିକେଏ ଜାହାରାତାକି ଅଣ୍ଠପାଆନା ହାଟେକା ଲକ୍ଷୁତି ଗେଲ୍ପି ଆୟାଲିତାକି ଏଞ୍ଜାରି ନେହାଁଣି ଅଣ୍ଠପିମାଇଁ, ଅଡେ ବାରେ କାତାତା ବାରେ ଜାଣାଇଁ ରାହାଁ କିୟାଲି ଅଣ୍ଠପିମାଇଁ □

## ୧୧

୧ ☆ନାନୁ ଏନିକିଁ କ୍ରୀସ୍ତ କିତିଲେହେଁ କାମା କିହିମାଇଁ, ମୀରୁ ଜିକେଏ ନାନୁ କିହିମାନି ଲେହେଁ କିଦୁ □

### ପ୍ରାତାନା କିନାଟି ତାୟଁ ୟୁକ୍ନାନାୟି

୨ ନାନୁ ମିଞ୍ଜେ ଗାଞ୍ଜୁରମି କିହିମାଞ୍ଜାଇଁ ଏନାଆଁତାକି ଇତିହିଁ ମୀରୁ ନାଞ୍ଜେ ବାରେବେଲା ଅଣ୍ଠପିମାଞ୍ଜାଦେରି ଅଡେ ନାନୁ ଆମିନି ନେରା ହୀହାମାଞ୍ଜାଇଁ, ଏଦାଆଁ ବାରେ ମାନୁଞ୍ଜି ଆହିମାଞ୍ଜେରି □

୩ ସାମା କ୍ରୀସ୍ତ ବାରେ ଆବାୟାଁ ତାୟଁ ୟୁଲେହେଁ ଅଡେ ଆବା ଇୟାନି ତାୟଁ ୟୁଲେହେଁ ଇଞ୍ଜା ମାହାପୁରୁ କ୍ରୀସ୍ତତି ତାୟଁ ୟୁଲେହେଁ, ଇଦାଆଁ ମୀରୁ ପୁଞ୍ଜୁ ଇଞ୍ଜିଁ ନା ଅଣ୍ଠପୁ □

୪ ଆମିନି ଆବା ତାନି ତାୟଁ ୟୁକ୍ନାନା ପ୍ରାତାନା କିନେସି, ତାୟଁ ଆନି କାତା ଖେହ୍ନେସି, ଏଞ୍ଜାସି ତାନି ତାୟଁ ତୁଁ ହୀଣି ପାଣ୍ଠପି କିନେସି □

୫ ସାମା ଆମିନି ଆୟାତି ତାନି ତାୟ୍ ଛୁଗାଆନା ପ୍ରାତାନା କିନେ ଅଡ଼େ ମାହାପୁରୁ ଅଣପୁତି ବଲୁ ଷ୍ଟେକନେ ଏଦି ତାନି ତାୟ୍ ତୁ ଲାଜା ପାଣ୍ଡି କିନେ ଇତିହ୍ ତାନି ତାୟ୍ ହିଣ୍ଡି ଆଡ଼ି ଇୟା ସମାନା □

୬ ଇତିହ୍ ତାୟ୍ ଛୁଗାଆଗାଟି ଆୟାତି ତାନି ତାୟ୍ ବୁଣାୟା ରାଡ଼ହା କତାପେ; ଇତିହ୍ ଇୟାନାକି ତାୟ୍ ରାଡ଼ନାୟି କି ହିଣ୍ଡନାୟି ଲାଜାତି କାତା ଆଡ଼ିହ୍ ଏଦି ତାୟ୍ ଛୁଗାପେ □

୭ ଆବା ମାହାପୁରୁତି ଖାଣା ଇଞ୍ଜା ଗାଝୁରମି ଲେହେଁ ଆଡ଼ାକି ତାନି ତାୟ୍ ତୁ ପୁକ୍ନାୟି ଲଡ଼ା ହିଲେଏ, ସାମା ଇୟା ଆବାତି ଗାଝୁରମି ଲେହେଁ □

୮ ଇତିହ୍ ଆବା ଇୟାନି ତାଣାଟି ଗାଡ଼ି ଆହାହିଲଅସି ସାମା ଇୟା ଆବା ତାଣାଟି ଗାଡ଼ି ଆହାମାନେ □

୯ ଅଡ଼େ ଇୟା କି ଆବା ଗାଡ଼ି ଆହାହିଲଅସି ସାମା ଆବାକି ଇୟା ଗାଡ଼ି ଆହାମାନେ □

୧୦ ଏଦାଆଁତାକି ଦୁଡ଼ୁୟା ତାକି ଡକ୍ତି ତାନି ଡକ୍ତି ଅଦିକାରାତି ସିନାଲେହେଁ ତାୟ୍ ତୁ ପୁକ୍ନା କତାପେ □

୧୧ ଆଡ଼ିଜିକେଏ ପ୍ରବୁ ତାଣା ଆବା ତାଣାଟି ଆୟାତି କାଜାୟି ଆଏ, ସାମା ଇୟା ତାଣାଟି ଆବା କାଜାସି ଆଏ,

୧୨ ଇତିହ୍ ଆୟାତି ଏନିକ୍ ଆବା ତାଣାଟି ଗାଡ଼ି ଆହାମାନେ □ ଏଲେକିହ୍ ଏ ଆବା ଜିକେଏ ଇୟା ତାଣାଟି ଗାଡ଼ି ଆହାମାନେସି, ସାମା ବାରେ ମାହାପୁରୁ ତାଣାଟି ଗାଡ଼ି ଆହାମାନେ □

୧୩ ମୀରୁ ମୀରୁଏ ବିଚାରା କିହାଁ କତାଦୁ, ତାୟ୍ ଛୁଗାଆନା ମାହାପୁରୁ ନକିତା ପ୍ରାତାନା କିନାୟି ଇୟାନାକି ନେହେଁ କି ?

୧୪ ମାଣ୍ଡକି ମାଙ୍ଗେ ଷ୍ଟେସିମାଞ୍ଜାନେ ଆବା ଲାମ୍ବା ତାୟ୍ ବୁଣାଁ ପିହ୍ନାୟି ତାଙ୍ଗେତାକି ଲାଜାତି କାତା □

୧୫ ସାମା ଆୟାତି ଲାମ୍ବା ତାୟ୍ ବୁଣାୟା ପିସ୍ତି ସାରେ ତାଙ୍ଗେତାକି ଗାଝୁରମି ସମାନା, ଇତିହ୍ ତାୟ୍ ପୁକ୍ନି ଆୟାଲି ଇୟାନାକି ଲାମ୍ବା ତାୟ୍ ବୁଣାୟା ହାପ୍କି ଆହାମାନେ □

୧୬ ସାମା ଆମ୍ବାଆସି ଏ କାତାତାକି ବାଦିବାଦା କିହାଲି ଅଣ୍ଡପତିହ୍ ଏଞ୍ଜାସି ପୁନାପେସି, ମାଙ୍ଗେ ଇଲେତି ମୋରା ହିଲେଏ,

ଇଞ୍ଜା ମାହାପୁରୁ କୁଲମିତା ଜିକେଏ ହିଲେଏ □

**ପ୍ରବୁତି ବଢ଼ି**

୧୭ ସାମା ମୀ ଆଶୁଓ ଆନାୟି ନେହାୟି ଆଆନା ସାମା ଲାଗେଏ ପଲେଏତାୟି ଆହିମାନେ, ଏଦାଆଁତାକି ମିଙ୍ଗେ ନେହାଁତେରି ଇଞ୍ଜାଲି ଆଡ଼ାଆନା ଇ ହୁକୁମି ହୀହାମାଞ୍ଜାଇଁ □

୧୮ ଏଦାଆଁତାକି ଇଚିହଁ ନାନୁ ତଲିଏ ଖେଞ୍ଜିମାଇଁ, କୁଲମି ଲେହେଁ ରୁଣ୍ଡା ଆନାଟି, ମୀ ବିତ୍ରା ଗତି ଗତି ଆହିମାଞ୍ଜେରି, ଇଞ୍ଜା ଇ କାତା ବିତ୍ରା ଏଚେକା ସାତା ଇଞ୍ଜଁ ନାନୁ ନାମିମାଇଁ □

୧୯ ଏନିକଁ ମୀ ବିତ୍ରାଟି ଆମ୍ବାଆରି ସାତା ତାୟିପାରିତା ଜୀଣା ଆଡ଼ାରି ଏ ତଞ୍ଜାଆନେରି, ଏଦାଣିତାକି ମୀ ବିତ୍ରା ଗତି ଗତି ଆନାୟି ପିଟେଓି ଆଏ □

୨୦ ଏଚେତା ମୀରୁ କୁଲମିତା ରୁଣ୍ଡା ଆଦେରି, “ଏଦି ପ୍ରବୁତି ବଢ଼ି ଆଏ,”

୨୧ ଏଦାଆଁତାକି ଇଚିହଁ ବଢ଼ି ତିନାଟି, ରଥସି ଅଡ଼େ ରଥଣାଇଁ କାଆନା ତାମି ରାନ୍ଦା ତିନେରି, ଏଦାଆଁତାକି ରଥସି ହାକିଟି ମାନାଟି ଅଡ଼େ ରଥସି ହଚାହାଁ ତୟିମାନେସି □

୨୨ ଏଦାଆଁ ମିଙ୍ଗେ ତିଞ୍ଜା ଉଣ୍ଡାଲି ଇଲକା ହିଲାଉ ? ମୀରୁ ଏଦାଆଁ ମାହାପୁରୁ କୁଲମିତି ମାନଓି ଆହି ହିଲଅତେରି, ଅଡ଼େ ଆମ୍ବାଆରାକି ହିଲାଉ ଏଞ୍ଜାରାଇଁ ଲାଜା କିହିମାଞ୍ଜେରି, ନାନୁ ମିଙ୍ଗେ ଏଦାଆଁ ଖେପ୍ପାଇଁ ? ମିଙ୍ଗେ ଏନିକଁ ଗାଓୁରମି କିୟାଇଁ ? ଇଦାଆଁତାକି ମିଙ୍ଗେ ଗାଓୁରମି କିହିମାଞ୍ଜଅଁ □

୨୩ ଇଚିହଁ ନାନୁ ପ୍ରବୁ ତାଣାଟି ବେଟାଆହାମାନି ଜାପ୍‌ନାଣି ମିଙ୍ଗେ ଜାପ୍‌ହି ମାଞ୍ଜାଇଁ, ଏଦି ଇଦି ପ୍ରବୁ ଜୀସୁ ସାତୁୟାଁ କେୟୁତା ହେରପିଆଡ଼ି ଲାଆଁୟାଁ ରୁଟି ଅହାନା, ମାହାପୁରୁଇଁ ଜହରା କିହାନା, ଏଦାଆଁ ତିକହାନା ଏଲେଇଚେସି,

୨୪ ଇଦି ମିଙ୍ଗେତାକି ନା ଆଜା; ନାଙ୍ଗେ ଅଶ୍‌ପାଲିତାକି ଇଦାଆଁ କିଦୁ □

୨୫ ଏଲେକିହଁ ଏ ତିଟି ତାୟୁ ଗହ୍‌ନି ସଲା ଅହାନା ଏଲେଇଚେସି, ଇ ସଲା ନା ନେତେରିତା ତାରିକିତି ପୁଠନି ରାଜିମାନା; ମୀରୁ

ଇ ସଲ୍ଲୀଟି ଏତର ଦେବା ଗହ୍‌ଦେରି ଏତର ଦେବା ନାଙ୍ଗେ  
ଅଣ୍‌ପାଲିତାକି କିଦୁ □

୨୭ ଇଚିହ୍‌ ଏତର ଦେବା ମୀରୁ ଇ ରୁଟି ତିଞ୍ଜେରି ଅଡ଼େ ଇ  
ସଲ୍ଲୀଟି ଗହ୍‌ଦେରି, ଏତର ଦେବା ମୀରୁ ପ୍ରବୁତି ଖାନ୍ତି ଦିନା ପାତେକା  
ତାନି ହାକିତି କାରୁ ଝେକ୍‌ଦେରି □

୨୮ ଇଚିହ୍‌ ଆମ୍ବାଆସି ଜଟେଗ ଆଆନା ପ୍ରବୁ ବଜିତି ରୁଟି ତିନେସି  
ଅଡ଼େ ଇ ସଲ୍ଲୀଟି ଗହ୍‌ନେସି, ଏଞ୍ଜାସି ପ୍ରବୁତି ଆଙ୍ଗା ଅଡ଼େ ନେତେରିତି  
ଦାୟି ଆନେସି □

୨୯ ଏଦାଆଁତାକି ମାଣ୍‌ସି ତଲିଏ ତାନୁଏ ତାଙ୍ଗେ ତାୟିପାରି କିହ୍‌  
କଡାହ୍‌ ଇ ରୁଟି ତିଣ୍‌ମେସି ଅଡ଼େ ଇ ଗହ୍‌ନି ସଲ୍ଲୀଟି ଗସ୍‌ପେସି □

୩୦ ଇଚିହ୍‌ ଆମ୍ବାଆସି ପ୍ରବୁତି ଆଙ୍ଗାତି ଏନ୍‌ୟା ଇଞ୍ଜି  
ଅଣ୍‌ପାଆନା ତିନେସି ଅଡ଼େ ଗହ୍‌ନେସି ଏଞ୍ଜାସି ତାନି ମୁହେଁ ତଣ୍ଡ  
ବେଟାଆହାଲି ତିନେସି ଅଡ଼େ ଗହ୍‌ନେସି □

୩୧ ଏଦାଆଁତାକି ମୀ ବିତ୍ରାଟି ହାରେକା ଲକୁ ବାଡ଼ୁନ୍ତୁ  
ହିଲାଆଗାଟାତେରି ଇଞ୍ଜା ହାରେକା ଲକୁ ନଟେରି ଗାଟାରି ଅଡ଼େ  
ହାରେକା ଜାଣା ହାହା ହାଜାମାନେରି □

୩୨ ସାମା ମାରୁ ତଲିଏ ଜାହା ଜାହାରାଲ୍‌ ତାୟିପାରି କିତିହ୍‌ ମା  
ମାହାପୁରୁ ମାଙ୍ଗେ ବିଚାରା କିୟାଆତେସିମା □

୩୩ ଅଡ଼େ ଦାର୍‌ତି ତଲେ ଏନିକ୍‌ ମାରୁ ତଣ୍ଡ ପ୍ଲାଃଆୟି,  
ଏଦାଆଁତାକି ପ୍ରବୁତି ତାଣା ବିଚାରା କିଞ୍ଜି ଆହ୍‌ ସାସ୍ତି ବେଟାଆହି  
ମାନାୟି □

୩୪ ଏଦାଆଁତାକି ନା ତାୟିୟା, ମୀରୁ ପ୍ରବୁତି ବଜି ତିଞ୍ଜାଲି ତାକି  
ରୁଣ୍ଡା ଆନାଟି ମୀରୁ ରଅତେରି ରଅଣାଲ୍‌ କାଦୁ □

୩୫ ମୀରୁ ରୁଣ୍ଡା ଆନାୟି ଏନିକ୍‌ ମାହାପୁରୁତି ତଣ୍ଡ ବେଟାଆହାଲି  
ଆଏ, ଏଦାଆଁତାକି ଆମ୍ବାଆସି ହାକି ଆହାମାନେସି ଏଞ୍ଜାସି ତାନି ଇଜ  
ତିନାପେସି, ଅଡ଼େ ଆଗାଡ଼ା ଝେସ୍‌ୟାନି କାତା ନାନୁ ଖାଡ଼ିସାରେ ତେଲ୍‌ହି  
କିୟାଲ୍‌ □



୧ ତାୟିୟାଁ ଅଡ଼େ ତାଙ୍ଗିସ୍ନାତେରି ସୁଦୁଜୀଝୁ ଦାନାତି କାତା ମୀରୁ ନେହଁକଁ ପୁଞ୍ଜୁ ଇଞ୍ଜଁ ନାନୁ ଅଣ୍ପିମାଇଁ □

୨ ମୀରୁ ପୁଞ୍ଜାମାଞ୍ଜେରି, ଏଚିବେଲା ମୀରୁ ଜୀହୁଦିଆଆତାତେରି ମାଚେରି, ଏଚେତା ଏନିକଁ ସାଲ୍ଲୁଞ୍ଜି ଆହିମାଚେରି, ଏଲେକିହଁଏ ନାଡ଼ିକିଞ୍ଜି ଆହାନା ଜୀଝୁ ହିଲାଆଗାଟି ପେଣକା ବମାୟାତି ଜେଚ ହାଜିମାଚେରି □

୩ ଏଦାଆଁତାକି ନାନୁ ମିଙ୍ଗ ଖେସିମାଞ୍ଜାଇଁ, ମାହାପୁରୁତି ସୁଦୁଜୀଝୁ ତଲେ ସାଲ୍ଲୁଞ୍ଜି ଆହାନା ଆମ୍ବାଆସି ଜିକେଏ ଜୀସୁଇଁ ବାକା ଇଗାଲି ଆଡ଼ଅସି, ଅଡ଼େ ଆମ୍ବାଆସି ସୁଦୁଜୀଝୁ ପ୍ଲାଃଆତାସି ଜୀସୁଇଁ ପ୍ରୁ ଇଞ୍ଜଁ ଖେସାଲି ଆଡ଼ଅସି □

୪ ✽ସୁଦୁଜୀଝୁ ହାନି ଦାନା ଏଚକା ଏଚକାତାୟି ସାମା ଏ ରଣ୍ଡିଏ ସୁଦୁଜୀଝୁ □

୫ ସେବା ଏଚକା ଏଚକାତାୟି ସାମା ପ୍ରୁ ରଅସିଏ □

୬ କାମା କିନି ବାଡ଼ମୁଁ ଏଚକା ଏଚକାତାୟି ସାମା ମାହାପୁରୁ ରଅସିଏ, ଏଞ୍ଜାସି ବାରେ ତାଶା ବାରେ କାମା କିନେସି □

୭ ସାମା ବାରେ ଜାଣାତାତି ସୁଦୁଜୀଝୁତି ଗୁଣୁ ତହୁନି ଦାନା ବାରେ ଲକୁତି ନେହେଁତାକି ହୀପକିଆନେ □

୮ ରଅଶାକି ସୁଦୁଜୀଝୁ ତଲେ ବୁଦିତି କାରୁ ଖେସାଲି ହୀନେ, ଅଡ଼େ ରଅଶାକି ଏ ସୁଦୁଜୀଝୁ ତଲେ ବୁଦିତିକାତା ଜାପୁହାଲି ହୀନେ,

୯ ଅଡ଼େ ରଅଶାକି ଏ ସୁଦୁଜୀଝୁ ତଲେ ନାମାଲି, ଅଡ଼େ ରଅଶାକି ଏ ରଣ୍ଡିଏ ଜୀଝୁତି ଦାନା ତଲେ ରଗାଟି ନେହଁ କିୟାଲି ବାଡ଼ମୁଁ ହୀନେ,

୧୦ ରଅଶାକି କାବାଆନି ବାଡ଼ମୁଁତି କାମାୟାଁ କିୟାଲି, ଅଡ଼େ ରଅଶାକି ମାହାପୁରୁ ଅଣ୍ପୁତି କାତା ଖେକହାଲି, ଅଡ଼େ ରଅଶାକି ଏଚକା ଏଚକାତି ଜୀଝୁୟାଁ ପୁଞ୍ଜାଲି ଆଡ଼ିନି ବାଡ଼ମୁଁ, ଅଡ଼େ ରଅଶାକି ପୁନାଆତି ପୁଃନି ହାଡ଼ା ଜଲାଲି, ଅଡ଼େ ଏଚକାତାରାକି ପୁନାଆତି ହାଡ଼ାତି ଅର୍ତ ପୁଣ୍ଡିକିନି ବାଡ଼ମୁଁତି ଦାନା ହୀପକିଆନେ □

୧୧ ସାମା ଏ ରଣ୍ଡିଏ ଜୀଝୁ ତାନି ମନ କିତିଲେହେଁ ବାରେଜାଣାତି ଏଚକା ଏଚକାତି ଦାନା ହୀହାନା ଇ ବାରେ କାମା କିହିମାନେ □

**ରଣ୍ଡିଏ ଆଜ୍ଞାତି ଆଜ୍ଞା ଉଡ଼େଲି**

୧୨ ✨ ଇତିହାସ ଏନିକି ଆଜ୍ଞା ରଣ୍ଡିଏ, ଅଡ଼େ ଆଜ୍ଞାତି ଏଟ୍‌କା ଏଟ୍‌କା ବାଗାୟାଁ ମାନୁ, ସାମା ଆଜ୍ଞାତି ବାଗାୟାଁ ହାରେକା ଆଡ଼ିଜିକେଏ ରଣ୍ଡିଏ ଆଜ୍ଞା ଆନେ, ଏଲେକିହାସ କ୍ରୀସ୍ତୁ □

୧୩ ଇତିହାସ ମାର ଜୀହୁଦି କି ଜୀହୁଦିଆଆତି ଜିକେଏ, ହଲେଏସି ଆପେସି ହଲେଏସି ଆଆପେସି, ବାରେତାୟି ରଣ୍ଡିଏ ଜୀହୁତଲେ ରଣ୍ଡିଏ ଆଜ୍ଞା ଆହାଲି ବାପ୍ତିସ୍ତୁ\* ଆହାମାନାୟି; ଅଡ଼େ ବାରେତାୟି ରଣ୍ଡିଏ ଜୀହୁତଲେ ଗସି ମାନାୟି □

୧୪ ଏଦାଆଁତାକି ଆଜ୍ଞା ରଣ୍ଡିଏ ବାଗା ଆଏ, ସାମା ଆଜ୍ଞାତି ଏଟ୍‌କା ଏଟ୍‌କା ବାଗାୟାଁ ଆଣ୍ଡାନା ର ଆଜ୍ଞା ଆହାମାନେ □

୧୫ କଡା ଏଲେଇନେ ନାନୁ କେୟୁଡେଏ ଆଏ, ଏଡ଼ି ଆଜ୍ଞାତି ବାଗା ଆଏ, ଏଦାଆଁତାକି ଏଡ଼ି ଆଜ୍ଞାତି ବାଗା ଆଏ ଏଲେକି ଆଏ □

୧୬ ଅଡ଼େ କିୟୁ ଏଲେଇନେ ନାନୁ କାନୁ ଆଏ, ଏଡ଼ି ଆଜ୍ଞାତି ବାଗା ଆଏ, ଏଦାଆଁତାକି ଏଡ଼ି ଆଜ୍ଞାତି ବାଗା ଆଏ ଏଲେକି ଆଏ □

୧୭ ବାରେ ଆଜ୍ଞା କାଣକା ଆନୁ, ଆଡ଼ିହାସ ଏନିକି ଝେନାୟି ? ବାରେ ଆଜ୍ଞା କୀକା ଆନୁ ଆଡ଼ିହାସ ଆମ୍ବିଟି ମୂଞ୍ଜନାୟି ?

୧୮ ସାମା ମାହାପୁରୁ ଆଜ୍ଞା ଉଡ଼େଲିଇଁ ରଣ୍ଡା ରଣ୍ଡାଆଁ କିହା ତାନି ମନତଲେ ଆଜ୍ଞାତା ଆର୍‌ହାମାନେସି □

୧୯ ଅଡ଼େ ଏ ବାରେ ଆଜ୍ଞାତି ରଣ୍ଡିଏ ବାଗା ଆଡ଼ିହାସ ମା ଆଡ଼ିହାସ ଆଜ୍ଞା ଆମ୍ବିୟା ?

୨୦ ସାମା ସାତେଏ ଆଜ୍ଞାତି ବାଗାୟାଁ ହାରେକା, ସାମା ଆଜ୍ଞା ରଣ୍ଡିଏ □

୨୧ ନୀ ତାଣା ନାଜେ ଲଡ଼ା ହିଲେଏ ଇଞ୍ଜି କାନୁ କେୟୁଡି ଏଲେଇଞ୍ଜାଲି ଆଡ଼େଏ, ଇଞ୍ଜା ନୀ ତାଣା ନା ଲଡ଼ା ହିଲେଏ ଇଞ୍ଜି ତାୟୁ କୁଡାତି ଏଲେଇଞ୍ଜାଲି ଆଡ଼େଏ □

୨୨ ଅରଞ୍ଜାକି ଆଜ୍ଞାତି ଆମିନି ଆଜ୍ଞା ଉଡ଼େଲି ବାଡ଼ୟୁ ହିଲ୍ୟାଆଗାଗାଇ ଇଞ୍ଜି ପୁରିହାସ ଜିକେଏ ଏଞ୍ଜି ବାରେ ଲଡ଼ାତା ମାନୁ;

---

☆ ୧୨:୧୨ ୧୨:୧୨ ରମି ୧୨:୪,୫      \* ୧୨:୧୩ ୧୨:୧୩ ମୂଞ୍ଜନାୟି

୨୩ ଅଡ଼େ ଆଜ୍ଞାତି ଆମିନି ଆଜ୍ଞା ଉଡ଼େଲି ଲଡ଼ାହିଲାଆ ଗାଟାଇ  
ଇଞ୍ଜି ଅଣ୍ଠିନାୟି, ଏ ବାରେ ଆଜ୍ଞାତି ଆଜ୍ଞା ଉଡ଼େଲିକାଇଁ ମାର  
ହାରେକା ଜାଡ଼ୁ କିନାୟି; ଅଡ଼େ ମା ଲଡ଼ାହିଲାଆ ଆଜ୍ଞା ଉଡ଼େଲି  
ହାରେକା ନେହଁ ତଞ୍ଜିକିୟାନ୍ତୁ,

୨୪ ସାମା ମା ଅଜିତି ଆଜ୍ଞା ଉଡ଼େଲି ନେହଁକଁ ତଞ୍ଜା ଆନାୟି  
ଲଡ଼ା ଆଏ,

୨୫ ସାମା ଏନିକଁ ଆଜ୍ଞାତି ବିତ୍ରା ଗଡ଼ହା ଆଏ, ଇଞ୍ଜା ଆଜ୍ଞାତି  
ବାଗାୟାଁ ସମାନା ତଲେ ବାରେଜାଣାତି ନେହଁଣି ଅଣ୍ଠିନ୍ତୁ □  
ଏଦାଆଁତାକି ଲଡ଼ାହିଲାଆ ଆଜ୍ଞାତି ହାରେକା ଅଜି କିହାନା ମାହାପୁରୁ  
ଜାଟୁ କିହାମାନେସି □

୨୬ ଏଦାଆଁତାକି ର ଆଜ୍ଞା କସ୍ତୁ ବେଟାଆଡ଼ିସାରେ ବାରେ ଆଜ୍ଞା  
ତାନିତଲେ ଦୁକୁ କିନ୍ତୁ, ସାମା ର ଆଜ୍ଞା ଗାଞ୍ଜୁରମି ବେଟାଆଡ଼ିସାରେ  
ବାରେ ଆଜ୍ଞା ତାନିତଲେ ରାହଁ କିନ୍ତୁ □

୨୭ ଏଲେକିହଁ ଏ ମାରୁ କ୍ରୀସ୍ତତି ଆଜ୍ଞାତି ବାଗାୟାଁତେରି, ଅଡ଼େ  
ର ର ଲକୁ ର ର ଆଜ୍ଞାତି ବାଗାୟାଁ ଲେହେଁ □

୨୮ ✱ଅଡ଼େ ମାହାପୁରୁ କୁଲମିତା ତଲିଏ ପାଣ୍ଡୁଞ୍ଜି ଆଡ଼ାରାଇଁ, ଇଞ୍ଜା  
ଡାୟୁ ମାହାପୁରୁ ଅଣ୍ଠିପୁତି ବଲୁ ଝେହ୍ନାରାଇଁ, ଡାୟୁ ଜାପ୍ନାରାଇଁ,  
ଏଲେକିହଁ ହାରେକା ଲକୁଣି ନିପ୍ତହାମାନେସି; ଅଡ଼େ କାବାଆନି  
କାମା କିନାରାଇଁ, ଡାୟୁ ରଗତି ନେହଁ କିନାରାଇଁ, ଇଞ୍ଜା ଲକୁଇଁ  
ସାୟେମି କିନାୟି, ସାଲଞ୍ଜି କିନାରି ବାଡ଼ୟୁ ଅଡ଼େ ଏଟକାତି ପୁନାଆତି  
ହାଡ଼ା ଜଲିନି ଦାନା ହାହାମାନେସି □

୨୯ ବାରେଜାଣା କି ପାଣ୍ଡୁଞ୍ଜି ଆହାମାନାରି ? ବାରେଜାଣା କି  
ମାହାପୁରୁ ଅଣ୍ଠିପୁତି ବଲୁ ଝେହ୍ନାରି ? ବାରେଜାଣା କି ଜାପ୍ନାରି  
? ବାରେଜାଣା କି କାବାଆନି କାମାକିନାରି ?

୩୦ ବାରେଜାଣା କି ନେହଁକିନି ବାଡ଼ୟୁତି ଦାନା ବେଟା  
ଆହାମାନାରି ? ବାରେ ଜାଣାକି ଏଟକା ହାଡ଼ାତଲେ ଜଲିନେରି ?  
ବାରେଜାଣା କି ଏଟକା ହାଡ଼ାତି ଅର୍ଡ଼ ଝେହ୍ନେରି ?

୩୧ ସାମା ବାରେତେରି ନେହଁ ଦାନା ବେଟାଆହାଲି ଅଣ୍ଠିପାଦୁ,  
ସାମା ଏ ବାରେକିହଁ ଅଡ଼େ ହାରେକା ଆଗାଡ଼ା ମାନି ର ନେହଁ

ଜିରୁ ତସିମାଞ୍ଜାଇଁ □

## ୧୩

### ଜୀଝୁନନାୟି

୧ ଇଚିହଁ ନାନୁ ମାଣସିୟାଁ ଅଡ଼େ ଦୁଡୁୟାଁ ହାଡ଼ାତଲେ ଜଲିଇଁ, ସାମା ନା ଜୀଝୁନନାୟି ହିଲେଏ, ଆତିହଁ ନାନୁ ଚିଶି ଚିଶି ଆନ୍ତି ଜିଣ୍ଠା ଅଡ଼େ ଟାପୁଡ଼ି ଝେନି ହାଡ଼ାଲେହେଁ ତାଡ଼େଏଁ □

୨ ☆ଇଚିହଁ ନାନୁ ମାହାପୁରୁ ଅଣ୍ଠପୁତି ବଲୁ ଝେହ୍ନି ବାଡ଼ୟୁ ମାନେ, ଅଡ଼େ ବାରେ ଡ଼ଗୁମାନାଣି ଇଞ୍ଜା ବୁଦିତିକାତା ପୁନାଡ଼େଏଁ, ଅଡ଼େ ହରୁଇଁ ଏଟକା ଗୁଚି କିହାଲି ନାଞ୍ଜେ ହାରେକା ନାମୁ ମାତି ଜିକେଏ, ସାମା ନା ତାଣା ଜୀଝୁନନାୟି ହିଲେଏ, ଆତିହଁ ନାନୁ ଏନାଡ଼େଏଁ ଆଏଁ □

୩ ଇଚିହଁ ନାନୁ ହିଲାଆଗାଟି ଲକୁତାକି ତିଞ୍ଜାଲି ବାରେ ଦନ ହୀଇଁ, ଅଡ଼େ ନାନୁ ନା ଆଙ୍ଗାତି ଝେହାଲି ତାକି ହେରପିଇଁ, ସାମା ନା ତାଣା ଜୀଝୁନନାୟି ହିଲେଏ ଇଚିହଁ ନାନ୍ତି ଏନ୍ତି ଲାବା ଆଏଁ □

୪ ଜୀଝୁନନାୟି ଅରୁହିନାୟି, ଜୀଝୁନନାୟି ନେହାଁଣି ଅଣ୍ଠପିନାୟି, ତାହାରା କିଆଗାଟାୟି, ବତପଣ ଆଆଗାଟାୟି, ଆଙ୍କାରା କିଆଗାଟାୟି □

୫ ଲାଗେଏ କିହଁ ଲେମ୍ବେଏ, ଜାହାରା ତାକି ଅଣ୍ଠପେଏ, ବିରିବିରା ଆଏଁ, ଲାଗେଏ କିହାଲି ଅଣ୍ଠପୁତା ଇଟେଏଁ □

୬ ଲାଗେଏତି କାମାତାକି ରାହାଁ ଆଆଗାଟାୟି, ସାମା ସାତାତା ରାହାଁ କିନାୟି;

୭ ଜୀଝୁ ନନ୍ତିତାଣା ବାରେ ଅରୁହିନାୟି, ବାରେ ତାଣା ନାନିନାୟି, ବାରେ ତାଣା ବାର୍ସୁ ହୀନାୟି, ବାରେ କାତାତା ସାସା ଆହ୍ନାୟି □

୮ ଜୀଝୁନନାୟି ଏତେଲା ରାଏ; ସାମା ମାହାପୁରୁ ଅଣ୍ଠପୁତି ବଲୁ ଝେକହା ମାନାୟି, ଦିନା ଝାଡ଼ିସାରେ ମିତି ଜିକେଏ ଆନେ; ଏଟକା ଏଟକା ଜଲିନି ହାଡ଼ା ମାତି ଜିକେଏ ଏଡ଼ି ର ଦିନା ସାପି ଆନେ; ବୁଦିତିକାତା ମାତି ଜିକେଏ ଏଡ଼ି ମେଣ୍ଠାହାନେ □

☆ ୧୩:୨ ୧୩:୨ ମାତି ୧୭:୨୦; ୨୧:୨୧; ମାର୍କ ୧୧:୨୩

<sup>୯</sup> ଇତିହାସ ମାର ରଗାଣିଏ ପୁନାୟି ଅଡ଼େ ମାହାପୁରୁ ଅଶ୍ୱପୁତି ବଲୁ  
ଇଚେକେଏ ଝେକ୍‌ହାଲି ଆଡ଼ିନାୟି □

<sup>୧୦</sup> ସାମା ପୁରା ଆନାୟି ଝାଡ଼ିହାସ ଉଜେଏତାୟି ମେଶ୍‌କାହାନେ  
□

<sup>୧୧</sup> ନାନୁ ଉଣା ମାଚିବେଲା ଉଣା କକାରି ଲେହେଁ ଜଲି ମାଚେଏଁ,  
ଉଣା କକାରି ଲେହେଁ ଅଶ୍ୱିମାଚେଏଁ, ଉଣା କକାରି ଲେହେଁ  
ପୁଞ୍ଜାମାଚେଏଁ; ନାନୁ ପାତାଆଡ଼ି ମାଶ୍ୱି ଆୟାଲିଏ ନାନୁ ଉଣା କକାରି  
କାତା ପିସାତୁସ୍ତେଏଁ □

<sup>୧୨</sup> ଇତିହାସ ନୀଏଁ ମାର ଡ଼ଗୁମାନି କାତା ଲେହେଁତି ଦାପେଣିତା  
ମେସିମାନାୟି, ସାମା ଏଚିବେଲା ମୁମୁମୁମୁତୁ ମେସ୍‌ପି ଆନାୟି;  
ନୀଏଁ ନାନୁ ଏନିକ୍‌ ପୁଞ୍ଜାମାକ୍, ସାମା ଏଚିବେଲା ନାକେ ଏନିକ୍‌  
ପୁଞ୍ଜାମାଞ୍ଜାନେସି, ନାନୁ ଜିକେଏ ଏଲେକ୍‌ ତାୟୁ ପୁକ୍‌ □

<sup>୧୩</sup> ଏଦାଆଁତାକି ନାମିନାୟି, ଆସା କିନାୟି, ଜୀଞ୍ଜୁନନାୟି, ଇ  
ତାନିଗଟା କାଲେଏତାକ, ସାମା ଇ ବିତ୍ରାଟି ଜୀଞ୍ଜୁନନାୟି ବାରେକିହାଁ  
କାଜାୟି □

## ୧୪

### ମାହାପୁରୁ ଜୀଞ୍ଜୁତି କାତା ପୁନାୟି

<sup>୧</sup> ଜୀଞ୍ଜୁ ନନାଣି ପାରାଦୁ, ଅଡ଼େ ସୁଦୁଜୀଞ୍ଜୁତି ଦାନା ବେଟାଆହାଲି  
ବାରେତି କିହାଁ ଏନିକ୍‌ ମାହାପୁରୁ ଅଶ୍ୱପୁତି ବଲୁ ଝେକ୍‌ହାଲି  
ଆଡ଼ିଦେରି, ଇଦାଆଁତାକି ହାରେକା ଅଶ୍ୱପାଦୁ □

<sup>୨</sup> ଇତିହାସ ଆମ୍ବାଆସି ଏଟ୍‌କା ଏଟ୍‌କାତି ହାଡ଼ାତଲେ ଜଲିନେସି,  
ଏଞ୍ଜାସି ମାଶ୍‌ସିୟାକ୍ ଜଲଅସି, ସାମା ମାହାପୁରୁକ୍ ଜଲିନେସି,  
ଆମ୍ବାଆସି ଏଦାଆଁ ତେଲ୍‌ହଅସି, ସାମା ଏଞ୍ଜାସି ସୁଦୁଜୀଞ୍ଜୁ ବାଡ଼୍‌ଡୁଟି  
ଡ଼ଗୁମାନାଣି ଝେହ୍‌ନେସି □

<sup>୩</sup> ସାମା ଆମ୍ବାଆସି ମାହାପୁରୁ ଅଶ୍ୱପୁତି ବଲୁ ଝେହ୍‌ନେସି, ଏଞ୍ଜାସି  
ଲକୁକ୍ ସାୟେମି କିହାନା, ସାସା ଅଡ଼େ ବାସୁତି କାତା ଝେହ୍‌ନେସି □

<sup>୪</sup> ଆମ୍ବାଆସି ଏଟ୍‌କାତି ହାଡ଼ାତଲେ ଜଲିନେସି ଏଞ୍ଜାସି ଜାହାରା  
ନାମୁତା ପାଡ଼ିକିହାଁ କଡ଼ିନେସି, ସାମା ଆମ୍ବାଆସି ମାହାପୁରୁ ଅଶ୍ୱପୁତି  
ବଲୁ ଝେକ୍‌ନେସି ଏଞ୍ଜାସି କୁଲମିକ୍ ନାମୁତା ପାଡ଼ିକିନେସି □

୫ ମୀରୁ ବାରେତେରି ଏଟକା ହାଡ଼ାତଲେ ଜଲ୍ଲାଦୁ ଇଞ୍ଜି ନା ଅଣ୍ଠପୁ, ସାମା ମୀରୁ ମାହାପୁରୁ ଅଣ୍ଠପୁତି ବଲୁ ଝେହ୍‌ଦୁ ଇଦି ହାରେକା ନା ଅଣ୍ଠପୁ; ଆମ୍ବାଆସି ଏଟକା ଏଟକାତି ହାଡ଼ାତଲେ ଜଲ୍ଲିନେସି ଏଝାସି କୁଲମିତି ପାଡ଼ିକିହାଲି ଏ କାତାତି ଅର୍ତ୍ତ ଝେହ୍‌ଅସି ଇତିହ୍ ଏଦାଣିକିହ୍ ଆମ୍ବାଆସି ମାହାପୁରୁ ଅଣ୍ଠପୁତି ବଲୁ ଝେକ୍‌ନେସି ଏଝାସି କାଜାସି □

୬ ଏଦାଆଁତାକି ତାୟିୟାଁତେରି ନାନୁ ମୀ ତାଣା ଝାହାନା ମାହାପୁରୁତି ଝେକ୍‌ହି ବଲୁ, ବୁଦିତିକାତା, ମାହାପୁରୁ ଅଣ୍ଠପୁତି କାତା ଝେକ୍‌ନାଣି କି ଜାପୁନି କାତା ଝେହ୍‌ଆନା, ଏଟକା ଏଟକାତି ହାଡ଼ାତଲେ ଜଲ୍ଲିଇଁ, ଆତିହ୍ ଏମ୍ବାଆଁ ନାନୁ ମୀ ଏନି ଲାବା କିତେଏଁ □

୭ ପୀରୁଡ଼ି ଅଡ଼େ ସେରଞ୍ଜି ଲେହେଁତି ଜୀଝୁ ହିଲାଆଗାଟି ବାକାୟାଁ ଉକିତିହ୍ ଜିକେଏ ଏମ୍ବାଆଁ ତାନି ତିସା ହଏ ଇତିହ୍ ପୀରୁଡ଼ି ଏନିକ୍ ଡ଼ାହିମାନେ ସେରଞ୍ଜି ଏନିକ୍ ଡ଼ାହିମାନେ ଏଦାନି ତିସା ଏନିକ୍ ପୁନେରି ?

୮ ଇଞ୍ଜା ତୀତି ଉକିନାସି ନେହ୍‌କ୍ ଉକଅସି ଆତିହ୍ ଆମ୍ବାଆସି ଜୁଜୁ ତାକି ତିୟାରା ଆନେସି □

୯ ଏଲେକିହ୍ ଏ ମୀରୁ ଜିକେଏ ଏଟକା ହାଡ଼ାତଲେ ନେହ୍ ତୀରିତଲେ ଜଲ୍ଲଅତେରି, ମୀରୁ ଏନାଆଁ ଜଲ୍ଲିତେରି ଏନିକ୍ ପୁନେରି, ଇତିହ୍ ମୀରୁ ଜଲ୍ଲିନାୟି ଗାଲିତି ଜଲ୍ଲିନିଲେହେଁ ଆନେ □

୧୦ ଦାର୍ଡିତା ହାରେକା ତିସା ମାନେ, ଅଡ଼େ ଆମିନି ତିସାତି ଅର୍ତ୍ତ ହିଲାଆଗାଟାଇ ଆଏ □

୧୧ ସାମା ନାନୁ ଏ ଜଲ୍ଲିନି ହାଡ଼ା ତେଲ୍‌ହଅଁ ଆତିହ୍ ଆମ୍ବାଆସି ଜଲ୍ଲିନେସି ନାନୁ ଏଝାଣାକି ପୁନାଆତାତେଏଁ ଲେହେଁ ଆଇଁ, ଅଡ଼େ ଏଝାସି ନା ତାଣାଟି ପୁନାଆତାସି ଲେହେଁ ଆନେସି □

୧୨ ଏଲେକିହ୍ ଏ ମୀରୁ ଜିକେଏ ଜୀଝୁତି ଦାନା ବେଟାଆହାଲି ଅଣ୍ଠପି ମାନାକି କୁଲମିତି ପାଡ଼ିକିହାଲି ଗାଡ଼ି ବେଟାଆହାଲି ଅଣ୍ଠପାଦୁ □

୧୩ ଆମ୍ବାଆସି ଏଟକାତି ହାଡ଼ାତଲେ ଜଲ୍ଲିନେସି, ଏଝାସି ଏନିକ୍

ଏମ୍ବାତି ଅର୍ତ୍ତ ଝେସାଲି ଆଡ଼ିନେସି, ଏଦାଆଁତାକି ପ୍ରାଡାନା କିପେସି □  
 ୧୪ ଇତିହିଁ ନାନୁ ଏଟ୍‌କା ହାଡ଼ାତଲେ ପ୍ରାଡାନା କିଇଁ, ଇତିହିଁ ନା  
 ଜୀଝୁ ପ୍ରାଡାନା କିନେ, ସାମା ନା ଅଣ୍‌ପୁ ଏମ୍ବାତି ଏନି ଲାଡ଼ା ହିଲେଏ  
 □

୧୫ ଆତିହିଁ ନାନୁ ଏନାଆଁ କିନାୟିମାନେ, ନାନୁ ସୁଦୁଜୀଝୁ ତଲେ  
 ପ୍ରାଡାନା କିଇଁ; ଇଞ୍ଜା ବୁଦିତଲେ ଜିକେଏ ପ୍ରାଡାନା କିଇଁ; ସୁଦୁଜୀଝୁ  
 ତଲେ ଜହରା ପାରୁ ପାଡ଼ିଇଁ, ଅଡ଼େ ବୁଦିତଲେ ଜିକେଏ ଜହରା ପାରୁ  
 ପାଡ଼ିଇଁ □

୧୬ ନାନୁ ଝାରଇ ସୁଦୁଜୀଝୁ ତଲେ ମାହାପୁରୁଇଁ ଜହରା କିଦି,  
 ଏମ୍ବାଆଁ କୁଗାମାନସି ପୁନାଆନା ଏନିକିଁ ନୀ ପ୍ରାଡାନାତା ଡାୟୁ  
 ଆମେନ୍ ଇନେସି □

୧୭ ଇତିହିଁ ନାନୁ ନେହିଁକିଁ ମାହାପୁରୁଇଁ ଜହରା କିହିମାଞ୍ଜି  
 ସାତା, ସାମା ଏଟ୍‌କାତସି ପାଡାଆଅସି □

୧୮ ନାନୁ ମୀ ବାରେକିହାଁ ହାଟ୍‌ରେକା ଗାଡ଼ି ଏଟ୍‌କାତି ହାଡ଼ାତଲେ  
 ଜଲିଇଁ ଇଞ୍ଜିଁ ନାନୁ ମାହାପୁରୁଇଁ ଜହରା କିହିମାଞ୍ଜି;

୧୯ ଆଡ଼ିଜିକେଏ ନାନୁ ଏନିକିଁ ଏଟ୍‌କାତାରାଇଁ ଜାପୁହାଲି  
 ଆଡ଼ିଇଁ, ଏଦାଆଁତାକି କୁଲମିତା ଦସ ମାଣା ଏଟ୍‌କାତି କାତାୟାଁ  
 ଜଲିନି କିହାଁ ବୁଦିତଲେ ପାସାଗଟା କାତା ଝେହ୍‌ନାୟି ନେହେଁ □

୨୦ ଏ ଡାୟିୟାଁତେରି ବୁଦିତା ଡ଼ଣା କକାରି ଲେହେଁ ଆଥାଦୁ, ସାମା  
 ଲାଗେଏ ପଲେଏ କାତାତାକି ଡ଼ଣା କକାରି ଲେହେଁ ଆଦୁ, ସାମା  
 ବୁଦିତା ଅଡ଼େ ଅଣ୍‌ପୁତା ପାଡାଆଡ଼ି ଲକୁଲେହେଁ ଆଦୁ □

୨୧ ମସା ମେରାତା ରାସ୍‌କି ଆହାମାନେ,  
 “ପ୍ରବୁ ଏଲେ ଇଞ୍ଜିମାନେସି, ଏଟ୍‌କା ଦେସାତି ଜଲିମାନି ହାଡ଼ାତଲେ,  
 ଏଟ୍‌କା ଲକୁତି ଗୁଡ଼ି ତଲେ

ନାନୁ ଇ ଲକୁଣି ଜଲିଇଁ,  
 ଆଡ଼ିଜିକେଏ ଏଞ୍ଜାରି ନା କାତା ଝେନଅରି □”

୨୨ ଏଦାଆଁତାକି ଏଟ୍‌କା ହାଡ଼ାତଲେ ଜଲିନାୟି ନାମୁ ଗାଟାରାକି ର  
 ସିନାଲେହେଁ ଆଏ, ସାମା ନାମାଆ ଗାଟାରାକି ସିନା ସମାନା; ଅଡ଼େ  
 ଅରଞ୍ଜାକି ମାହାପୁରୁ ଅଣ୍‌ପୁଡ଼ି ବଲୁ ଝେହ୍‌ନାୟି ନାମାଆ ଗାଟାରାକି  
 ସିନାଲେହେଁ ଆଏ, ସାମା ନାମାନାରାକି ସିନା ସମାନା □

୨୩ ଅଡ଼େ ଜିକେଏ ବାରେ କୁଲମିତି ଲକୁ ରୁଣ୍ଡା ଆତିହିଁ, ଇଞ୍ଜା ବାରେଜାଣା ଏଟକା ଏଟକା ହାଡ଼ାତଲେ ଜଲିନେରି, ଅଡ଼େ ପୁନାଆତାରି କି ନାମାଆତାରି ଏମ୍ପାଆଁ ଖାନେରି, ଆତିହିଁ ମିଙ୍ଗେ ବାୟା ଆତାରି ଇଞ୍ଜାଁ ଇନଅରି କି ?

୨୪ ସାମା ବାରେଜାଣା ମାହାପୁରୁ ଅଣ୍ଟପୁତି ବଲୁ ଝେକ୍‌ନେରି, ରଅସି ପୁନାଆତାସି କି ନାମାଆତାସି ଖାନେସି, ଆତିହିଁ ଏଝାସି ନାନୁ ପାପୁ ଗାଟାତେଏଁ ଇଞ୍ଜାଁ ପୁଞ୍ଜା କତିନେସି ଅଡ଼େ ଏଝାସି ବାରେ ଲକୁତାଣା ଦହଗାଟାସି ଇଞ୍ଜାଁ ବିଚାରା ଆନେସି □

୨୫ ଅଡ଼େ ତାନି ହିୟାତା ଡ଼ଗୁମାନି ପାପୁତି ଅଣ୍ଟପୁ ବାରେ ତଞ୍ଜାଆନେ; ଇଞ୍ଜାଁ ଏଝାସି ମୁନୁ କୁତାହାଁ ମାହାପୁରୁଇ ଜହରା କିନେସି, ଇଞ୍ଜାଁ “ସାତେଏ ମାହାପୁରୁ ମୀ ତାଣା ମାନେସି ଇଞ୍ଜାଁ ଇନେସି □”

### କୁଲମିତି ମେରା

୨୬ ଏଦାଆଁତାକି ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ଏନାଆଁ କିନାୟିମାନେ ? ମୀରୁ ରୁଣ୍ଡା ଆନାଟି ଆମ୍ପାଆରି ର ପାରୁ, ଆମ୍ପାଆରି ର କାତା ଜାପୁନାୟି, ଆମ୍ପାଆରି ମାହାପୁରୁ ତସାମାନି ବଲୁ ଝେକ୍‌ନାୟି, ଆମ୍ପାଆରି ଏଟକା ଏଟକାତି ହାଡ଼ା ଜଲିନାୟି, ଆମ୍ପାଆରି ହାଡ଼ାତି ଅର୍ତ ପୁଣ୍ଡିକିନାୟି, ଇଲେକ୍‌ ବାରେତାକି ଏନାୟି ଆଆତେଁ ଏନାୟି ମାନେ, ଇ ବାରେ କୁଲମିତି ପାତିକିହାଲି କିଞ୍ଜିଆପେ □

୨୭ ଆମ୍ପାଆରି ଏଟକା ହାଡ଼ାତଲେ ଜଲିନେରି ଇତିହିଁ ରିଆରି ଆଆତେଁ ତାନିଜାଣା ପାଲି କିହିଁ ଜଳାପେରି ଅଡ଼େ ରଅସି ତାନି ଅର୍ତ ଝେସ୍‌ପାସି □

୨୮ ସାମା ଆମ୍ପାଆସି ଅର୍ତ ତେଲ୍‌ହି କିନାସି ହିଲଅସି ଇତିହିଁ ଏଝାସି କୁଲମିତା ପାଲେଏ ମାଣ୍ଡମେସି, ଇଞ୍ଜାଁ ତାନୁ ତାନି ହିୟାତା ମାହାପୁରୁଇଁ ଝେସ୍‌ପାସି □

୨୯ ଅଡ଼େ ରିଆରି କି ତାନି ଜାଣା ମାହାପୁରୁ ଅଣ୍ଟପୁତି ବଲୁ ଝେସ୍‌ପେରି, ଅଡ଼େ ଏଟକାତାରି ଝେସିମାନାଣି ନେହିଁକେଁ ଝେଣ୍ଡାରି □



୩୦ ସାମା ଏମ୍ବାଆଁ କୁଗାମାନାରି ବିଦ୍ରା ଆମ୍ବାଆରାକି ମାହାପୁରୁତି ଏନ୍ଦି ବଲୁ ଖାଡ଼ିସାରେ ନଚକଏ ଖେସିମାନାସି ପାଲେଏ ମାଣ୍ଡେସି □

୩୧ ଇତିହଁ ଏନିକଁ ବାରେଜାଣା ଜାପିନେରି, ଇଞ୍ଜା ବାରେଜାଣା ସେଡନା ଆନେରି, ଏଦାଆଁତାକି ରଅ ରଅତେରି ମାହାପୁରୁ ଅଣ୍ଡପୁତି ବଲୁ ଖେସାଲି ଆଡ଼ିଦେରି □

୩୨ ସାମା ମାହାପୁରୁତି ବଲୁ ଖେହ୍ନି ବାଡ଼ୟୁ ଖେହ୍ନାଣି ତାଣାଟି ଲପ୍ପକି ଆନାୟି ମାନେ □

୩୩ ଏନାଆଁତାକି ଇତିହଁ ମାହାପୁରୁ ଗଡ଼ହା କିନି ମାହାପୁରୁ ଆଏ, ସାମା ହିଡ଼ଡ଼ିତି ମାହାପୁରୁ □ ଏନିକଁ ମାହାପୁରୁ ସୁଦୁ ଲକୁତି କୁଲମିତା ଆନେ □

୩୪ ଏଲେକଁ ଇୟାସିକା କୁଲମିତା ପାଲେଏ ମାଣ୍ଡମ୍ପୁ ଇତିହଁ କାତା ଜଲ୍ଲାଲି ଏଞ୍ଜି ହେଲ ବେଟା ଆହାହିଲାଡ, ମସା ମେରାତା ରାସ୍ତକି ଆହାମାନି ଲେହେ ଏଞ୍ଜି ମାନି ତଲେ ମାନାପୁ □

୩୫ ସାମା ଇୟାସିକା ଏନାଆଁ ପୁଞ୍ଜାଲି ଅଣ୍ଡପିତିହଁ, ତାମି ଇଜ ତାମି ତକ୍ରାୟାଣି ଖେଣ୍ଡମ୍ପୁ ଇତିହଁ କୁଲମିତା କାତା ଜଲ୍ଲିନାୟି ଇୟାନାକି ଲାଜାଟି କାତା □

୩୬ ମାହାପୁରୁତି ବଲୁ ମୀ ତାଣାଟି ହରାମାନେ କି ? ଇଞ୍ଜା ଖାରଇ ମିଙ୍ଗେତାକି ଖାହାମାନେ କି ?

୩୭ ଆମ୍ବାଆସି ନାନୁ ମାହାପୁରୁ ଅଣ୍ଡପୁତି ବଲୁ ଖେହ୍ନାତେଏଁ, ଇଞ୍ଜା ନେହଁ ଜାଖୁତି ଦାନା ବେଟାଆହାମାଲ୍ ଇଞ୍ଜା ଅଣ୍ଡପିନେସି, ଆତିହଁ ନାନୁ ମିଙ୍ଗ ଏନା ଏନାଆଁ ରାଡ଼ିମାଞ୍ଜାଲ୍, ଏଡ଼ି ବାରେ ମାହାପୁରୁତି ହୁକୁମି ଏଦାଆଁ ଏଞ୍ଜାସି ପୁନାପେସି □

୩୮ ସାମା ଆମ୍ବାଆସି ତେଲ୍‌ହଅସି ଆତିହଁ ଏଞ୍ଜାସି ଏନାଆଁ ତେଲ୍‌ହଆନା ମାନାପେସି □

୩୯ ଏଦାଆଁତାକି ତାୟିୟା, ମାହାପୁରୁ ଅଣ୍ଡପୁତି ବଲୁ ଖେକହାଲି ଅଣ୍ଡପେମାଞ୍ଜୁ; ଇଞ୍ଜା ଏଚକାତି ହାଡ଼ା ଜଲ୍ଲାଲି କାହିକିଆଦୁ □

୪୦ ସାମା ବାରେ କାମା ନେହଁ ତଲେ ସୂସି ତଲେ କିନାୟିମାନେ □

## ୧୫

### କ୍ରୀସ୍ତ ହାକିଚି ନିଜିନାୟି

୧ ନା. ତାୟିୟାଁ ଅଡ଼େ ତାଜିସ୍ତାତେରି, ନାନୁ ମୀ ତାଣା ଆମିନି ନେହଁ କାରୁ ଝେକ୍‌ହାମାଚେଏଁ, ଆମିନି କାରୁ ମୀରୁ ତୀରିତଲେ ଆସାମାଚେରି ଆମିନି ତାଣା ତୀରିତଲେ ମାଞ୍ଜାମାଞ୍ଜେରି, ନାନୁ ଏନିକଁ ମୀ ତାଣା ଝେକ୍‌ହାମାଚେଏଁ, ଏଦାଆଁ ମିଙ୍ଗେ ଅଣ୍ଡିପି କିହିମାଞ୍ଜାଇଁ □

୨ ମିଙ୍ଗେ ଝେକ୍‌ହା ମାଞ୍ଜାନି ନେହଁ କାରୁ ମୀରୁ ଜାଣ୍ଡେ ଆସା ମାଚିହଁ, ଇ ନେହଁ ବଲୁ ତାକି ମୀରୁ ଗେଲ୍‌ପି ଆହାମାଞ୍ଜେରି, ଆଆତଁ ମୀରୁ ଉଜେଏ ନାମୁ ଗାଟାଚେରି ଆହାମାଚେରି □

୩ ଇଚିହଁ ନାନୁ ଆମିନି ଜାପ୍‌ନାଣି ବେଟା ଆହାମାଚେଏଁ, ଏ ବିତ୍ରାଚି ଇ କାଜା କାତା ମିଙ୍ଗେ ହାହାମାଞ୍ଜାଚେଏଁ, ଇଚିହଁ କ୍ରୀସ୍ତ ଦାମ୍‌ପୁ ପତିତା ରାୟ୍‌କି ଆହାମାନି ଲେହେଁ ମା. ପାପୁ ତାକି ହାଚେସି □

୪ ✨ମୁସ୍‌ପି ଆଚେସି, ଇଞ୍ଜା ଦାମ୍‌ପୁ ପତିତା ରାୟ୍‌କି ଆହାମାନି ଲେହେଁ; ତାନିଦିନା ତାୟୁ ହାକିଚି ଝେଣ୍ଡେ ନିଜିଚେସି □

୫ ✨ଏଞ୍ଜାସି କେପା\* ଅଡ଼େ ବାରଜାଣା ସୀୟୁୟାଣି ତଞ୍ଜାଆଚେସି □

୬ ତାୟୁ ରଣ୍ଡିଏ ଦେବା ପାସା ଝାଞ୍ଜାଚିଏ ଆଗାଡ଼ା ତାନି ଜେଚ ହାନି ତାୟିୟାଁ ତଞ୍ଜାଆଚେସି; ଏଞ୍ଜାରି ବିତ୍ରାଚି ହାଚେକା ଲକୁ ନୀଞ୍ଜୁପାଚେକା ନୀତାମାନେରି, ସାମା ଏଚେକା ଲକୁ ହାହାମାନେରି □

୭ ଏଚେଟିଏ ଏଞ୍ଜାସି ଜାକୁବଇଁ ଇଞ୍ଜା ତାୟୁ ବାରେ ପାଣ୍ଡୁଞ୍ଜି ଆଡ଼ାରାଇଁ ତଞ୍ଜାଆଚେସି □

୮ ✨ବାରେତି ତାୟୁ ଲେଞ୍ଜୁ ପୁରାଆଆନା ଜାର୍‌ନାଆଡ଼ି ଲେହେଁ ତାଚେଏଁ ନାଙ୍ଗେ ଜିକେଏ ତଞ୍ଜା ଆୟାଚେସି □

✨ ୧୫:୪ ୧୫:୪ ମାତି ୧୨:୪୦; କାମା ୨:୨୪-୩୨ ✨ ୧୫:୫ ୧୫:୫ ଲୁକ ୨୪:୩୪; ମାତି ୨୮:୧୭,୧୭; ମାର୍କ ୧୬:୧୪; ଲୁକ ୨୪:୩୨; ଜହ ୨୦:୧୯ \* ୧୫:୫ ୧୫:୫ ପିତର ✨ ୧୫:୮ ୧୫:୮ କାମା ୯:୩-୬

୯ ✨ ଇତିହାସ ମାହାପୁରୁଷ କୁଳମିତି ଲକ୍ଷ୍ମୀଙ୍କୁ ସାସ୍ତି ହାସିମାଚାକି ପାଣ୍ଡୁ ଆହାମାନାରି ତାଣା ବାରେକିହାଁ ନାନୁ ଉଣାତେଏଁ, ଇଞ୍ଜା ପାଣ୍ଡୁଆହାମାନି ଦରୁ ବେଟାଆହାଲି ପାଡ଼ା ଆଆଗାଟାତେଏଁ □

୧୦ ସାମା ନାନୁ ଏଦି ଆହାମାଲ୍, ଏଦି ମାହାପୁରୁ କାର୍ମାମେହନି ତାଣାଟି ଆହାମାନେ, ଇଞ୍ଜା ନା ତାକି ତାନି କାର୍ମାମେହନାୟି ଉଦେଏ ଆହା ହିଲେଏ, ସାମା ନାନୁ ଏ ବାରେଜାଣା କିହାଁ ହାରେକା କାମା କିହାମାଲ୍, ଆଡ଼ିଜିକେଏ ନାନୁ ଆଏ, ସାମା ମାହାପୁରୁଷ କାର୍ମାମେହନାୟି ଏଦାଆଁ କିହାମାନେ □

୧୧ ଏଦାଆଁତାକି ନାନୁ ଆପେ କି ଏଞ୍ଜାରି ଆପେରି ଏଲେକିହାଁ ମାମ୍ମୁ ଚୁଞ୍ଚିମାନମି ଅଡ଼େ ମାରୁ ଜିକେଏ ଏଲେକିହାଁ ନାମାମାଞ୍ଜେରି □

### ମାର ହାକିଟି ନିଜାମାୟି

୧୨ କ୍ରୀସ୍ତ ହାକିଟି ନିଜାମାନେସି ଇଞ୍ଜାଁ ଇ କାରୁ ଶ୍ରେୟପି ଆହିମାନେ, ଆତିହାଁ ହାଡ଼ାରି ଶ୍ରେଣ୍ଡେ ନିଜାମାୟି ହିଲେଏ ଇଞ୍ଜାଁ ଏନିକାଁ ମୀ ବିତ୍ରାଟି ଏଚରଜାଣା ଏଲେ ଇଞ୍ଜାମାନେରି ?

୧୩ ହାଡ଼ାରି ଶ୍ରେଣ୍ଡେ ନିଜାମାୟି ହିଲେଏ, ଇତିହାଁ କ୍ରୀସ୍ତ ଜିକେଏ ଶ୍ରେଣ୍ଡେ ନିଜା ହିଲଅସି □

୧୪ ଇଞ୍ଜାଁ କ୍ରୀସ୍ତ ହାକିଟି ଶ୍ରେଣ୍ଡେ ନିଜା ହିଲଅସି, ମାମ୍ମୁ ଶ୍ରେକ୍‌ହିମାନାୟି ବାରେ ଉଦେଏତାୟି, ଅଡ଼େ ମୀ ନାମ୍ମୁ ଜିକେଏ ଉଦେଏତାୟି □

୧୫ ଅଡ଼େ ମାମ୍ମୁ ମାହାପୁରୁଷ ମିଟି ଶ୍ରେହନିଲେହେଁ ତଞ୍ଜାଆନେ, ଏଦାଆଁତାକି ଇତିହାଁ ମାମ୍ମୁ ମାହାପୁରୁ କପାଟି ଇ କାତା ସାକି ହୀତମିମା କି କ୍ରୀସ୍ତ ଇ ନିକହାମାନେସି, ସାମା ହାଡ଼ାରି ନିଜାଅରି, ଆତିହାଁ ଏଞ୍ଜାସି କ୍ରୀସ୍ତ ଇ ଜିକେଏ ନିକହା ହିଲଅସି □

୧୬ ଏଲେଆହାଁ ହାଡ଼ାରି ନିଜାହିଲଅରି, ଆତିହାଁ କ୍ରୀସ୍ତ ଜିକେଏ ନିଜା ହିଲଅସି □

୧୭ ଇଞ୍ଜା କ୍ରୀସ୍ତ ନିଜା ହିଲଅସି ଇଚିହିଁ ମୀ ନାମ୍ ଜିକେଏ ଉଜେଏତାୟି ଆଚେନ, ଇଞ୍ଜା ମୀରୁ ନୀଏଁ ପାତେକା ମୀ ପାପୁ ତଲେ ମାଞ୍ଜାମାଞ୍ଜେରି □

୧୮ ଆତିହିଁ ଆମ୍ବାଆରି କ୍ରୀସ୍ତ ତାଣା ନାମାମାଞ୍ଜାନା ହାହାମାନେରି, ଏଞ୍ଜାରି ଜିକେଏ ନାସା ଆହାମାନେରି □

୧୯ ମାରୁ ଖାରଇ ଇ ଜୀଝୁତାକି କ୍ରୀସ୍ତଇଁ ଆସା କିହିମାନାୟି, ଆତିହିଁ ମାରୁ ବାରେ ମାଣସିୟାଁ କିହାଁ କାର୍ମା ହିଲାଆଗାଟାତାୟି □

୨୦ ସାମା ସାତାତଲେ କ୍ରୀସ୍ତ ହାତି ଲକୁତି ମୁଲୁତି ପାଡ଼େୟି ଲେହେଁ ହାଡ଼ାରି ବିତ୍ରାଟି ଖେଣ୍ଡେ ନିଜାମାନେସି □

୨୧ ଇଚିହିଁ ମାଣସି ତାଣାଟି ହାନାୟି ଖାହାମାନାକି ଅଡ଼େ ମାଣସି ତାଣାଟିଏ ହାଡ଼ାରି ବିତ୍ରାଟି ଖେଣ୍ଡେ ନିଜାମାନାୟି ଜିକେଏ ଖାହାମାନେ □

୨୨ ଇଚିହିଁ ଆଦମ ତାଣାଟି ବାରେ ମାଣସିକି ହାକି ଖାଡ଼େ, ଏଲେକିହିଁ ଏ କ୍ରୀସ୍ତ ତାଣାଟି ବାରେଜାଣା ଜୀଝୁ ବେଟାଆଚେନରି □

୨୩ ସାମା ବାରେଜାଣା ତାନି ପାଲି ଏତିସାରେ ତଲିତି ପାଡ଼େୟି କ୍ରୀସ୍ତ, ତାୟୁ କ୍ରୀସ୍ତତି ଖାନିଦିନାତି କାଡ଼ାମାନାରି ଖେଣ୍ଡେ ନିଜାମାନେରି □

୨୪ ଏଚେଟିଏ ଜୁଗୁ ରାନି ଦିନା ଖାଚେନ, ଏଚିବେଲାତା କ୍ରୀସ୍ତ ବାରେ କାଜାପାଣା, ବାରେ ଅଦିକାରା, ବାଡ଼ୟୁ ମେକ୍‌ହି ତାୟୁ ଆବା ମାହାପୁରୁକି ସାଲୁଝି କିନି ପାଣା ହେରପିନେସି □

୨୫ ମାହାପୁରୁ ବାରେ ସାଡ଼ୁୟାଁଇଁ ହାରୁଝି କିହାଁ କ୍ରୀସ୍ତତି କଡ଼ାୟାଁ ତୁଇ ଇଟାଆ ପାତେକା ଏଞ୍ଜାସି ସାଲୁଝି କିନାୟିମାନେ □

୨୬ ତାୟୁତି ସାଡ଼ୁ ସମାନା ହାକିତି ଜିକେଏ ମେକ୍‌ନାୟି ମାନେ;

୨୭ ଏନାଆଁତାକି ଇଚିହିଁ ଦାମ୍‌ପତିତା ରାୟୁକି ଆହାମାନେ, “ମାହାପୁରୁ ବାରେତି ତାନି କଡ଼ାଁ ତୁଇ ଲକ୍‌ନେସି,” ଇଞ୍ଜା ଏଚେତା ଏଞ୍ଜାସି ଏଲେଇନେସି, “ବାରେ ଲକ୍‌ହାମାନେସି,” ଏଡ଼ି ସାତା କ୍ରୀସ୍ତ ବାରେ ତାନୁ ଲକ୍‌ହେସି, ଏ ବାରେ ତାଣା ତାନୁ ଆଣ୍ଡା ହାଲଅସି □

୨୮ ଅଡ଼େ ବାରେତି କ୍ରୀସ୍ତ କଡ଼ାୟାଁ ତୁଇ ଲକ୍‌ହି ଜେତ, ଆମ୍ବାଆସି ବାରେତି ତାନି ତାଣା ଲକ୍‌ହେସି, ମୀରୁଏସି ଜିକେଏ ତାନି ଆବା ମାହାପୁରୁ ତୁଇ ତୁୟିନେସି; ଅଡ଼େ ମାହାପୁରୁ ବାରେତି ଲାକ ସାଲୁଝି କିନେସି □

୨୯ ହାଡ଼ାରି ନିଜାଆସାରେ, ଆମ୍ବାଆରି ହାଡ଼ାରି ତାକି ବାପ୍ତିସ୍ମା<sup>†</sup> ଅନେରି, ଏଞ୍ଜାରି ଏନାଆଁ କିନେରି ? ଆତିହ<sup>୯୯</sup> ହାଡ଼ାରି ନିଜାଆସାରେ, ଏଞ୍ଜାରି ତାକି ଏନାଆଁତାକି ବାପ୍ତିସ୍ମା ଆନେରି □

୩୦ ଅଡ଼େ ମାର ଜିକେଏ ଏନାଆଁତାକି ବାରେବେଲା ଡ଼ଣ୍ଡ ତଲେ ନାସା ଆନି ତାଣା ହାନାୟି ?

୩୧ ତାୟିୟା ଅଡ଼େ ତାଜିସ୍ମାତେରି, ମା ପ୍ରବୁ କ୍ରୀସ୍ତ ତାଣା ମିଜେତାକି ନାନୁ ଆମିନି ବଡ଼ପଣ ଆହିମାୟି, ଏମ୍ବାତି ମାନି କିହା ଏଲେ ଇଞ୍ଜିମାୟି, ନାନୁ ବାରେଦିନା ହାନିଲେହେତି କସ୍ତ ବେଟାଆହିମାୟି □

୩୨ ଇତିହ<sup>୯୯</sup> ମାଣସିକ୍ ଅଣ୍ପିନି ଲେହେଁ ଏପିସିୟ ଗାଡ଼ାତା ନାନୁ ଖାରକ “ଜାଡ଼ା ଜନ୍ତୟା” ତଲେ ଜୁଜୁ କିହାମାୟି, ଆତିହ<sup>୯୯</sup> ଏମ୍ବାଆଁ ନାଜେ “ଏନି ଲାବା ?” ସାମା ହାଡ଼ାରି ନିଜାଅରି, “ଆତିହ<sup>୯୯</sup> ଖାଦୁ ମାର ତିନ ଉନ ଇତିହ<sup>୯୯</sup> ଝିଏ ମାର ହାନାୟି □”

୩୩ ମୀରୁ ନାଡ଼ି ଆଆଦୁ, “ଇତିହ<sup>୯୯</sup> ପଲ୍ଲଆ ଗାଟାରି ତଡ଼ୁ ଚୁନହ<sup>୯୯</sup> ଲକୁଡ଼ି ଗୁଣୁ ନସ୍ତ କିନେ □”

୩୪ ମୀରୁ ନେହ<sup>୯୯</sup> କ<sup>୯୯</sup> ଜାଗ୍ରାତା ଆଦୁ, ପାପୁ କିଆଦୁ, ଇତିହ<sup>୯୯</sup> ଆମ୍ବା ଆମ୍ବାଆରାକି ମାହାପୁରୁକ୍ ପୁନି ବୁଦି ହିଲେଏ; ନାନୁ ମୀ ଲାଜା ତାକି ଇ କାତା ଝେସିମାଞ୍ଜାୟି □

### ହାକିଟି ଝେଣ୍ଡେ ନିଜାନି ଆଜା

୩୫ ସାମା ଆମ୍ବାଆରି ଏଲେଇନେରି, “ହାଡ଼ାରି ଏନିକ<sup>୯୯</sup> ନିଜାନେରି ? ଏନିଲେହେତି ଆଜା ତଲେ ଏଞ୍ଜାରି ଖାନ୍ନେରି ?”

୩୬ ବୁଦି ହିଲାଆ ଗାଟାତେରି, ମୀରୁ ଏନାଆଁ ମାଟିମାଞ୍ଜେରି ଏଡ଼ି ହାଆସାରେ ଝେଣ୍ଡେ ଜୀଞ୍ଜୁଆହାଁ ଗଜା ଆଏ □

୩୭ ଅଡ଼େ ଏମିନି ଆଜା ଆନ୍ନେ ଏନାଆଁ ମୀରୁ ମାଟିହିଲଅତେରି, ସାମା ଗହଁୟାଁ ଆପୁ କି ଏନି ଆନାଁ ଆଡ଼େ, ଏଡ଼ି ପାଡ଼େୟି ଲେହେଁ □

୩୮ ସାମା ମାହାପୁରୁ ତାନି ଅଣ୍ପୁ ଲେହେଁ ଏଞ୍ଜାରାକି ଆଜା ହାନେସି, ଅଡ଼େ ବାରେ ପାଡ଼େୟି ତାକି ତାନି ଆଜା ହାନେସି □

† ୧୫:୨୯ ୧୫:୨୯ମୁଞ୍ଜିନାୟି

୩୯ ବାରେ ଆଜ୍ଞା ରଣ୍ଡିଏ ରଲେଏତି ଆଜ୍ଞା ଆଏ, ସାମା ମାଣ୍ଡିୟାକି ରଲେତି ଆଜ୍ଞା, ଜନ୍ତୁୟାକି ରଲେତି ଆଜ୍ଞା, ଅଡ଼େ ପଚାୟାକି ଅର ରଲେତି ଆଜ୍ଞା, ଅଡ଼େ ମୀଣ୍ଡାକା ତାକି ଅର ରଲେତି ଆଜ୍ଞା □

୪୦ ଲାକପୁରୁକି ଆଜ୍ଞା ମାନେ, ଅଡ଼େ ଦାରତିକି ଆଜ୍ଞା ଜିକେଏ ମାନେ, ଲାକପୁରୁତି ଆଜ୍ଞା ରଲେତି ଅଜୁ, ଅଡ଼େ ଦାରତିତି ଆଜ୍ଞାତି ଅଜୁ ଅର ରଲେତାୟି □

୪୧ ଝେଡ଼ାତି ଉଜେଡ଼ି ରଲେତାୟି, ଅଡ଼େ ଲେଞ୍ଜୁତି ଉଜେଡ଼ି ଅର ରଲେତାୟି, ଅଡ଼େ ହୁକାୟାତି ଉଜେଡ଼ି ରଲେତାୟି, ଇଞ୍ଜା ର.ହୁକା ଟିଏ ଅର ହୁକାତି ଉଜେଡ଼ି ଅର ରଲେତାୟି □

୪୨ ହାଡ଼ାରି ନିଜ୍ଞାନାୟି ଜିକେଏ ଏଲେତାୟିଏ, ନାସା ଆନିଲେହେଁ ମାଟ୍ଟକି ଆନେ, ସାମା ନାସା ଆଆଗାଟାୟି ଲେହେଁ ନିଜ୍ଞାନେ;

୪୩ ଲଡ଼ାହିଲାଆ ଗାଟାୟି ଲେହେଁ ମାଟ୍ଟକି ଆନେ ଏଦି ଗାଞ୍ଜୁରମି ତଲେ ନିଜ୍ଞାନେ; ବାଡ଼ୁୟୁ ହିଲାଆଗାଟାୟି ଲେହେଁ ମାଟ୍ଟକି ଆନେ, ବାଡ଼ୁୟୁ ଗାଟାୟି ଆହାଁ ନିଜ୍ଞାନେ □

୪୪ ଇରଥାତି ଆଜ୍ଞା ତଲେ ମୁସ୍ପିଆନେ ଜୀଞ୍ଜୁତି ଆଜ୍ଞା ତଲେ ନିଜ୍ଞାନେ; ସାମା ଇରଥାତି ଆଜ୍ଞା ମାନେ ଇତିହଁ ଜୀଞ୍ଜୁତି ଆଜ୍ଞା ଜିକେଏ ମାନେ □

୪୫ ଦାମ୍ବୁପତିତା ରାସ୍ତକି ଆହାମାନେ, ତଲିତି ମାଣ୍ଡି ଆଦମ ଜୀଞ୍ଜୁତି ମାଣ୍ଡି କିହଁ ଗାଡ଼ି ଆଡେସି; ସାମା ତାୟୁତି ଆଦମ ପୂଣ୍ଡା ହାନି ଜୀଞ୍ଜୁ ଆଡେସି □

୪୬ ସାମା ଜୀଞ୍ଜୁ ଗାଟାସି ନକେଏ ଆଏ, ଆଜ୍ଞା ତଲେତାସି ନକେଏ, ଅଡ଼େ ତାୟୁ ଜୀଞ୍ଜୁ ଗାଟାସି ଆଡେସି □

୪୭ ନକେଏତି ମାଣ୍ଡି ଆଦମ ଦାରତିତି ମାନି ଇରଥା ତଲେ ଗାଡ଼ି ଆହାମାଡେସି, ଅଡ଼େ ତାୟୁତି ମାଣ୍ଡି ଲାକପୁରୁତି ଝାହାମାଡେସି □

୪୮ ଆମ୍ବାଆରି ଇରଥା ତଲେ ଗାଡ଼ି ଆହାମାନେରି, ଏଞ୍ଜାରି ଇରଥାତି ଗାଡ଼ି ଆଡି ଏ ମାଣ୍ଡିଲେହେଁ, ଇଞ୍ଜା ଆମ୍ବାଆରି ଲାକପୁରୁତାରି ଏଞ୍ଜାରି ଲାକପୁରୁତି ଝାହାମାନି ଏ ମାଣ୍ଡି ଲେହେତାରି □

୪୯ ଅଡ଼େ ମାର ଇରୁଆଟି ଗାଡ଼ି ଆହାମାନି ଏ ମାଣସିତି ଖାଣା ଆସାମାନାୟି, ଏଲେକିହି ଏ ଏ ଲାକପୁରୁତି ମାଣସିତି ଖାଣା ଜିକେଏ ଆହନାୟି □

୫୦ ତାୟିୟା ଅଡ଼େ ତାଜିସ୍ମାତେରି ନାନୁ ଖେସିମାଞ୍ଜାଇଁ, ନେତେରି ଅଡ଼େ ଉଜ୍ଜା ମାହାପୁରୁତି ରାଜିତି ଅଦିକାରା କିହାଲି ଆଡ଼େଏ, ସାମା ହାନାୟି ହାଆଗାଟାଣି ଅଦିକାରା କିହାଲି ଆଡ଼େଏ □

୫୧ \*ମେହଦୁ ନାନୁ ମିଙ୍ଗେ ର ଡ଼ଗୁମାନି କାତା ଖେସିମାଞ୍ଜାଇଁ, ମାର ବାରେ ଜାଣାତାୟି ହାଆୟି, ସାମା ମାର ବାଦଲଞ୍ଜି ଆନାୟି,

୫୨ ଦେବୁଣିଏ, କାନୁ ମିଟି କିନିଲେହେଁ, ତାୟୁତି ତୀତ୍ରି ମହୁରି କାଜା ହାଡ଼ା ଖେଟିସାରେ ମାର ବାରେତାୟି ଅର ଖାଣା ଆନାୟି; ଇତିହିଁ କମ୍ପୁ ତୀନେ ଅଡ଼େ ହାଡ଼ାରି ନାସା ଆଆନା ନିଙ୍ଗିନେରି, ଅଡ଼େ ମାର ବାଦଲଞ୍ଜି ଆନାୟି □

୫୩ ଇତିହିଁ ଇ ମେଣ୍ଡିନି ଆଙ୍ଗାତି ମେଣ୍ଡିଆଗାଟି ହିମ୍ବୁରି ପରନାୟି ମାନେ, ଅଡ଼େ ଇ ହାନି ଆଙ୍ଗାତି ହାଆଗାଟି ହିମ୍ବୁରି ପରନାୟି ମାନେ □

୫୪ ସାମା ଇ ମେଣ୍ଡିନି ଆଙ୍ଗାତି ମେଣ୍ଡିଆଗାଟି ହିମ୍ବୁରି ଅଡ଼େ ହାନି ଆଙ୍ଗାତି ହାଆଗାଟି ହିମ୍ବୁରି ହୁଚିତି ଜେଟ, ଇ ରାଟାମାନି ବଲ୍ଲୁ ସାତା ଆନେ; “ହାକି ନାସା ଆହାମାନେ; ଜୀଣା ଆନାୟି ଆହାମାନେ □”

୫୫ “ଏ ହାକି ନୀ ଜୀଣା ଆନାୟି ଆମ୍ବିୟା ?

ଏ ହାକି ନୀ ନାସାକିନି ବାଡ଼ୁୟୁ ଆମ୍ବିୟା ?”

୫୬ ହାକିତି ସାତୁ ପାପୁ, ଅଡ଼େ ପାପୁତି ବାଡ଼ୁୟୁ ମସାତି ମେରା;

୫୭ ସାମା ଏମିନି ମାହାପୁରୁ ମା ପ୍ରବୁ ଜୀସୁ କ୍ରୀସ୍ତତି ତାକି ମାଙ୍ଗେ ଜୀଣି କିୟାନେସି ଏଞ୍ଜାଣାକି ଜହରା ଆପେ □

୫୮ ଏଦାଆଁତାକି ଏ ନା ଜୀସୁତି ତାୟିୟା ଅଡ଼େ ତାଜିସ୍ମାତେରି, ପ୍ରବୁତି ସେବାତା ମୀ କସ୍ତଲେ କାମା କିନାୟି ଉଜେଏ ଆଏ, ଇଦାଆଁ ପୁଞ୍ଜାନା ପ୍ରବୁତି କାମାତା ତୀରିଆହାଁ ବାଡ଼ୁୟୁ ତଲେ ସେବାତା ହାରେ ହାରେକା ଜାଡ଼ନ୍ଦୁ ଆଦୁ □

୧୭

ମାହାପୁରୁତି ଲକୁତାକି ଦାନା

୧ ✨ମାହାପୁରୁ ଲକୁ ତାକି ତାରୁୟା କୁଡ଼ିକିନି କାତା ନାନୁ ଏନିକି  
ଗାଲାତିୟା କ୍ରୀସ୍ତାନା କୁଲମିତା ଝେସାମାଚେଏ, ମୀରୁ ଜିକେଏ  
ଏଲେକି କିପୁ □

୨ ମୀରୁ ବେଟାଆହିମାନି ଲେହେଁ ବାରେ ଝାରାତି ମୂଲୁ ଦିନା  
ମୀରୁ ବାରେତେରି ମୀ ଆଡ଼ିନି ଲେହେଁ ମୀ ବିତ୍ରା ଏଚେକା ତାରୁୟା  
କୁଡ଼ିକିହାଁ ଇଟାଦୁ, ଆତିହଁ ନାନୁ ଝାଡ଼ିସାରେ ମିଙ୍ଗେ ଅଡ଼େ ତାରୁୟା  
ରୀସାଲି ଲଡ଼ା ଆଏ □

୩ ଅଡ଼େ ନାନୁ ଝାଡ଼ିଜେଚ, ମୀରୁ ଆମ୍ବାଆରାଇଁ ଜଟେ ଇଞ୍ଜି  
ଆଚାମାଞ୍ଜେରି ନାନୁ ଏଝାରାକି ଆକୁ ରାଚାହାଁ ଜିରୁସାଲମତା ମୀ  
ଦାନା ଅହାଲି ପାଣ୍ଡିଇଁ;

୪ ସାମା ନାଙ୍ଗେ ଜିକେଏ ହାଜାଲି ଲଡ଼ାଆଚେନ ଇଚିହଁ ଏଝାରି ନା  
ତଲେ ଝାପେରି □

କାମାତାକି ପାଞ୍ଜୁଲତି ଅଣ୍ପୁ

୫ ✨ସାମା ନାନୁ ମାକିଦନିୟା ହାଚି ତାୟୁ ମୀ ତାଣା ଝାଇଁ,  
ଏନାଆଁତାକି ଇଚିହଁ ନାଙ୍ଗେ ମାକିଦନିୟାଚି ହାନାୟି ମାନେ □

୬ ଆଆତଁ ନାନୁ ଝାଡ଼ିସାରେ ଏଚେଦିନା ମୀ ତାଣା ଡ଼ୟିଇଁ,  
ଇଚିହଁ ପେନିବେଲା ହାଲ୍‌ଝେ ମାଞ୍ଜାଲି ଅଣ୍ପିମାଇଁ, ଏଚେତା ନାନୁ  
ଆନିନି ଚାୟୁତା ହାଇଁ, ଏମ୍ବାଆଁ ହାନାଚି ମୀରୁ ନାଙ୍ଗେ ଇଚିଝାୟାଦେରି  
□

୭ ଇଚିହଁ ନୀଏଁ ନାନୁ ହାନାଚି ମୀ ତାଣା ଗାଡ଼େକା ତାକି  
ତଞ୍ଜାଆହାଲି ଅଣ୍ପି ହିଲଅଁ, ଇଚିହଁ ପ୍ରବୁ ନାଙ୍ଗେ ହେଲ  
ହିୟାଡ଼ିହଁ, ନାନୁ ମୀ ତଲେ ଏଚେଦିନା ମାଞ୍ଜାଲି ଆସା କିହିମାଇଁ  
□

୮ ✨ସାମା ନାନୁ ପେନ୍ତିକସ୍ତ୍ର ଦିନା ପାତେକା ଏପିସିୟ ଗାଡ଼ାତା  
ଡ଼ୟିଇଁ;

☆ ୧୭:୧ ୧୭:୧ ରିନି ୧୫:୨୫,୨୬ ☆ ୧୭:୫ ୧୭:୫ କାମା ୧୯:୨୧ ☆ ୧୭:୮ ୧୭:୮  
କାମା ୧୯:୮-୧୦



୯ ଇତିହାସ ପ୍ରଭୃତି କାମା କିହାଲି ଅସାରା ଦାରା ଦେପିଆହାମାନେ, ଆଥାତ୍ ଜିକେଏ ନାଜେ ଅପାଆଗାଟାରି ହାରେକା ମାନେରି □

୧୦ ଶ୍ରୀମତି ମୀ ତାଣା ଖାଡ଼ିସାରେ ଏଞ୍ଜାସି ଏନିକ୍ ଆଜାଆନା ମୀ ତାଣା ଡିୟିନେସି, ଏଦାଆଁତାକି ମୀରୁ ଅଣ୍ପାଦୁ, ଇତିହାସ ନାନୁ ଏନିକ୍ ଏଞ୍ଜାସି ଜିକେଏ ଏଲେକିହାସି ପ୍ରଭୃତି କାମାକିନାସି □

୧୧ ଏଦାଆଁତାକି ଆମ୍ବାଆତେରି ଏଞ୍ଜାଣାଇଁ ହୀଣି କିଆଦୁ, ସାମା ଏଞ୍ଜାସି ଏନିକ୍ ନା ତାଣା ଖାହାଲି ଆଡ଼ିମାନେସି, ଏଦାଆଁତାକି ଏଞ୍ଜାଣାଇଁ ହିଡ଼ି ଜୀଝୁତଲେ ଜିରୁ ତସା ପାଣ୍ଡାଦୁ; ଏଦାଆଁତାକି ଇତିହାସି ଏଞ୍ଜାସି ତାୟିୟାଁ ତଲେ ଖାନ୍ନେସି ଇଞ୍ଜା ନାନୁ କାଡ଼ିମାଇଁ □

୧୨ ସାମା ତାୟି ଆପଲ ତାକି ଖେସିମାଞ୍ଜାଇଁ, ନାନୁ ଏଟକାଡ଼ି ତାୟିୟାଁ ତଲେ ମୀ ତାଣା ହାଜାଲି ଏଚେକା ବାଡ଼ିମାଲିତେଏଁ, ସାମା ନୀଏଁ ଖାହାଲି ମନ୍ କିଆତେସି, ସାମା ପାରୁ ସିନିକିହାନା ଏଞ୍ଜାସି ଖାନ୍ନେସି □

### ଆକୁଡ଼ି ରାନ୍ତି କାତା

୧୩ ମୀରୁ ଜାଗ୍ରାତା ଆହାଁ ନାମୁତା ତୀରିତଲେ ମାଞ୍ଜୁ, ଅଡ଼େ ସାସା ଗାଟାତେରି ଆହାନା ବାଡ଼ିୟୁ ଆହୁଦୁ □

୧୪ ମୀ ବାରେ କାମା ଜୀଝୁ ନନାଣି ତଲେ ଆପେ □

୧୫ ଏ ତାୟିୟାଁ ଅଡ଼େ ତାଲିମ୍ବାତେରି ସ୍ତ୍ରୀପାନ ଇଲୁ କୁଟମି ଆକାୟାତି ମୂଲୁଏ ନାମିତାରି; ଅଡ଼େ ମାହାପୁର ଲକୁଣି ସେବା କିନି କାମାତାକି ହେର୍ପା କଡାମାନେରି ଏଦାଆଁ ମୀରୁ ପୁଞ୍ଜାମାଞ୍ଜେରି □

୧୬ ମୀରୁ ଏଲେତି ଲକୁଡ଼ି ଅଡ଼େ ତାମିତଲେ ଆଣ୍ଡାନା ଖାହୁତଲେ କାମା କିହିମାନାରାଇଁ ମାନି କିଦୁ, ଏଦାଆଁତାକି ନାନୁ ମିଙ୍ଗ ବାଡ଼ିମାଲିମାଞ୍ଜାଇଁ □

୧୭ ସ୍ତ୍ରୀପାନ, ପର୍ତ୍ତନାତ, ଅଡ଼େ ଆକାୟିକ ଖାଡ଼ାକି ନାନୁ ହାରେକା ରାହାଁ ଆହିମାଇଁ, ଇତିହାସି ମୀରୁ ହିଲାଆତାକି ନାଜେ ଏନାୟି ଲଡ଼ା ମାଚେ, ଏଞ୍ଜାରି ଏଦାଆଁ ହୀହାମାଞ୍ଜାନେରି □

୧୮ ଇଚିହ୍ନି ଏଞ୍ଜାରି ମୀ ଜୀଞ୍ଜୁତି ଅଡ଼େ ନା ଜୀଞ୍ଜୁତି ରାହାଁ କିହାଁ ମାଞ୍ଜାନେରି; ଏଲେତି ଲକ୍ଷୁଇଁ ଜଡ଼େ ଇଞ୍ଜି ପୁଞ୍ଜାନା ମାନି କିଦୁ □

୧୯ ☆ଆସିୟା ଦେସାତା ମାନି କୁଲମିକା ମିଙ୍ଗେ ଜହରା କିହିମାଞ୍ଜାନେରି, ଆକ୍ଞିଲା ଅଡ଼େ ପ୍ରିସ୍ଵିଲା ତାନି ଇଜ ରୁଣ୍ଡା ଆନି କୁଲମି ତଲେ ପ୍ରବୁ ତାଣା ମିଙ୍ଗେ ହାଡ଼େକା ଜହରା କିହିମାଞ୍ଜାନେରି □

୨୦ ଇମ୍ପାଆଁ ମାନି ବାରେ ତାୟିୟାଁ ଅଡ଼େ ତାଙ୍ଗିୟା ମିଙ୍ଗେ ଜହରା କିହିମାଞ୍ଜାନେରି □ ମୀରୁ ରଅତେରି ରଅଣାଇଁ ତାୟି ତାୟିୟାଁ ଲେହେଁ କ୍ରୀସ୍ତିତି ଜୀଞ୍ଜୁନହ୍ନି ସୁଦୁ ତଲେ ନଶୁଞ୍ଜି ଆହାନା ଜହରା କିଞ୍ଜିଆଦୁ □

୨୧ ନାନୁ ପାଞ୍ଜୁଲଡେଏଁ ନା କେୟୁଟି ରାଡ଼ାହାଁ ରାହାଁ ତଲେ ଜହରା କିହିମାଞ୍ଜାଇଁ □

୨୨ ଆମ୍ପାଆସି ମାହାପୁରୁଇଁ ଜୀଞ୍ଜୁ ନଅସି ଏଞ୍ଜାସି ବାକା ବେଟାଆପେସି, ମାରାନାତା ମା ପ୍ରବୁ ତବେ ଖାମୁ □

୨୩ ପ୍ରବୁ ଜୀସୁତି କାର୍ନାମେହ୍ନାୟି ମିଙ୍ଗେତାକି ଆୟାପେ;

୨୪ କ୍ରୀସ୍ତ ଜୀସୁ ତାଣାଟି ନା ଜୀଞ୍ଜୁନନାୟି ମୀ ବାରେଜାଣା ତାକି ଆୟାପେ □ ଆଡ଼େନୁ □

## ପୁସ୍ତକ ଖୋଲା

### **The New Testament the Kusaal language (Ghana)**

copyright © 1996 Wycliffe Bible Translators, Inc.

Language: Kusaal (Kuvi)

Contributor: Wycliffe Bible Translators, Inc.

## ପୁସ୍ତକ ଖୋଲା,

କୁଞ୍ଜ ପୁସ୍ତକ ଖୋଲା, 2020

The New Testament in Kuvi Language

The Word for the World International

All rights reserved.

2025-05-08

---

PDF generated using Haiola and XeLaTeX on 8 May 2025 from source files

dated 8 May 2025

c688c8bf-38ac-5c00-90bd-6e4eaa165a20